

DXUS YUWE SAN MATEO FXI'JNI

*Jesukristo ji'j nyafxiiteywe'sxtxi pta'sxni
(Lk 3.23-38)*

¹ Jesukristo ji'j nyafxiiteywe'sx kimtewap txãatxku pta'sxi' ayte'. Jesukristo' Abrahan Davxid ji'kh yu'. ² Abrahana' Isaak neyku yu', naapkaçxha' Isaakha', Jakob neyku yu'. Aça' Jakoba', Judáwe'sx neyku yu'. ³ Juda' Fxares vxite' Zara neyku yu', aça' njí'ja' Tamarku yaase yu'. Fxaresa' Esrom neyku yu', naapkaçxha' Esroma', Aram neyku yu'. ⁴ Arama', Aminadab neyku yu', naapkaçxha' Aminadaba' Naason neyku yu'. Aça' Naasona', Salmón neyku yu'. ⁵ Salmona' Booz neyku yu', naapkaçxha' njí'ja' Rahabku yaase yu'. Booza' Obed neyku yu', aça' njí'ja' Rutku yu'. Obeda' Isaí neyku yu', ⁶ naapkaçxha' Isaía', jxkaahsa Davxid neyku yu'. Aça' jxkaahsa Davxida', Salomón neyku yu', aça' Salomón njí'ja' Urias nyu yu'k nyafxii txãak yu'.

⁷ Salomona' Roboam neyku yu', naapkaçxha' Roboama', Abias neyku yu'. Aça' Abiasa', Asa neyku yu'. ⁸ Aça' Asa', Josafxat neyku yu', naapkaçxha' Josafxatha', Joram neyku yu'. Jorama', Uzias neyku yu'. ⁹ Uziasa' Jotam neyku yu', naapkaçxha' Jotama', Akaz neyku yu'. Aça' Akaza' Ezekías neyku yu'. ¹⁰ Ezekiasa' Manasés

neyku yu', aça' Manasesa' Amón neyku yu', naapkaçxha' Amona' Josías neyku yu'. ¹¹ Josiasa' Jekoniáswe'sx neyku yu'. Txãa ensutx Israelwe'sxa' Babilonia kiwen jxûna u'jni yuu. ¹² Aça' Jekoniasa' Salatiel neyku yu', naapkaçxha' Salatiela', Zorobabel neyku yu'. ¹³ Zorobabela' Abiud neyku yu', aça' Abiuda' Eliakim neyku yu'. Eliakima', Azor neyku yu'. ¹⁴ Azora' Sadok neyku yu', aça' Sadokha', Akim neyku yu', naapkaçxha' Akima' Eliud neyku yu'. ¹⁵ Eliuda' Eleazar neyku yu', aça' Eleazara' Matán neyku yu', naapkaçxha' Matana', Jakob neyku yu'. ¹⁶ Jakoba' Jose neyku yu', naapkaçxha' Jose' Maria nmi'k yu', Kristo Jesus yaasesa njĩj.

¹⁷ Abraham ji'jtx isate', katorce ney u'jweçtek Davxida' upxhna ũsu'. Aça' Davxid ji'jtx isate', ki' vxite katorce ney u'jweçtetx Israelwe'sxa' Babilonia kiwen jxûna u'jni yuu. Txãajũ ki' isani ki' vxite katorce ney u'jweçtek Kristo' upxhna ũsu'.

Jesukristo upxni
(Lk 2.1-7)

¹⁸ Jesukristo upxni' na'wěk yuu: Jesus njĩj Maria' José yakh imi'ya' puutx we'wenik ji'phu'. Nawa ih fxi'zeme, nasa ji'phuk Dxus Espiritu kaavxya'ja'jni. ¹⁹ Txajx nmi' Josea' txãawe'sx leytxi kxtey nwěese'jna fxi'zesak yu'. Nawa Maria nasa ji'phuni yu's khuēswe'sxtxi pãatxhĩ'khmée, paaçte txuteeya'wak yu' nasa jiyunimeete. ²⁰ Sa' txã'wě yajxna ũsiyna, ksxa'wte Dxus angel vxyaaçxa na'jĩk:

—José, Davxid ji'j, iidx nyu yuuwa'jsa Maria's jxpa'gaya' wa'lnu, na'wē nasa ji'pha' nawa txā' Dzus Espiritu kaavxya'ja'jni'. ²¹ Maria nçxi'k āaga vxyaate', txā'sa' Jesus yasene'ga. Txā'wē kxsusni yuuna, txāa pa'gatey txajx nasa pkaltewe'sxtxi nwe'wewa'jsa' jīnak we'we.

²² Txā'wē yuuk, nawa txāniitey Dzus yuwe pta'sxsa's Dzusíi kaaūsuthe'the' na'wēk we'we txāa kxtey yuukahñçxáak txā'wē yuu. ²³ Txā' na'wēk we'we:

Teeçx kna'sa' teeçx nçxi'k ji'phuna.

Txā' Emanwel kxsusni yuuna jīk.

Txāa Emanwel jīnisa': Dxusa' kwe'sx yakh ūsa' jīni'.

²⁴ Txajū' Josea' deenijū yajkçxa', Dzus angel we'weni's nwēese'jçxa Maria txajx nyu yu-uwa'jsa's nvxihtme'. ²⁵ Nawa ptam na'wē ih yu' fxi'zemeeta', María nçxi'k āaga yuupkaçx. Sa' Maria nçxi'k āaga yuute', txā'sa' Jesus yasek ki'p.

2

Sek kãanijuwe'sx Jesusa's weçxaya' pa'jni

¹ Jesusa' Belen çxhabtek upx, Judea kiwete. Txān ensu txāa kiwesu jxkaahsa' Herodesku yu'. Naapkaçxha' Jerusalem çxhabte maz piçthē'j pa'jtx sek kãani kiwejuwe'sx estrelxatx jiisa. ² Sa' na'jīnatx pējx:

—¿Mtee ūsna judiuwe'sxtxi jxkaahwa'jsa açxh u'se upxsa? Kwe'sxa' txajx upxni's pta'sxsa estrelxa's uytha'w sek kãani kiweju, txāasatha'w weçxaya' yuwé'.

³ Txã'jïte', Herodesa' wala kuh yajkxku, txã'wëy Jerusalem çxhabte nasawa jxukaysa. ⁴ Txajü' jxkaahsa' sacerdote npiiçthë'jwe'sx vxite' ley kaapiya'jsawe'sx jxukaysatx pa'yaçxa' paapëjxku:

—Kристо' ¿mteega upxwa'jsa yu? jïte', pta'sxtxi:

⁵ —Judea kiwete Belen çxhabtek upxwa'jsa yu'. Txajüik Dvus yuwe pta'sxsa' na'jïna fxi'j:

⁶ Judá kiwete Belen çxhab txã'wë maa çxhabtewa jxthaakwe ähmeekwesame'. Txãa pa'gately Belen çxhabuh teeçx npiiçthë'jsa kasehçxa Adx nasa Israelwe'sxtxi jxpe'jwa'jsa' jï'k.

⁷ Txã'jïte', Herodesa' estrelxa's uysaatx paaçte pa'yaçxa pëjxku:

—¿Makwe txaçx yuuçna estrelxa vxyaani? jïna wala ew paapëjxçxak ⁸ Belenna kaah na'jïna neewe'weçxa:

—Kxte me'jwe, sa' wala ew paapëyine'kwe txãa luuçx ma'wësatewa. Sa' ew jiyuçxa', adxa's pta'sxine'kwe, aça' adxwa weçxaya' u'jwe'nja jïte', ⁹ estrelxa's uysaawe'sxa' u'jtx. Naapkaçxha' sek kãani kiweju estrelxa uyne'ta txãa estrelxa' txãawe'sx yaçte vxyaana u'jçxa mteene' luuçx üsu' txãa kajkwete pa'jçxak kxtee yuju. ¹⁰ Txã'wë estrelxa ki' vxyaate', wala weçxatx, ¹¹ sa' yatte u'kaçxa luuçxa's uytxi njï'j yakh. Sa' peejxükweçxa' luuçxa's weçxatx. Txã'wë yüuçxatx txãawe'sx peeswa'j jxüçxa u'jni's phaadeçxa pees: vxyyuu beh, incienso vxite' miçxa. ¹² Txã'wë yüuniijü' kus

ksxa'wte pta'sxnitx yuu Herodes tasxna ki' sx-awedkahnén. Aça' vxite dxi'jsutx sxawedna u'j.

Egipto kiwen ùphna u'jni

¹³ Estrelxa's uysaawe'sx u'jni'jũ', José ksxa'wte', Dxus angel vxyaaçxa na'jĩk:

—Kiiteçxa me'j ùphna Egipto kiwen luuçxkuẽ's pe'jçxa petx nji'j yã'jçxa. Sa' kxtee ùsune'ga adx ki' pta'sxpkaçx. Txã'wẽme', Herodesa' luuçxkuẽ's ikhya' pakweya'wa' jĩte',
¹⁴ Jose' kusçxáa pe'jna Egipto kiwen u'kh.
¹⁵ Sa' kxteetx ùsu' Herodes uupkaçx. Dxus yuwe pta'sxsa we'weçxa': Egiptoju pa'yath Adx Nçxi'ka's jĩk txãa kxtey yuukahnçxáak txã'wẽ yũu.

¹⁶ Estrelxa's uysaawe'sx txã'wẽ Herodesa's weeçxa na'wẽ vxite dxi'jsu u'jni's jiyuçxa', seena' wala ùusaçxak. Sa' luuçxtxi kiikhe'kh Belen çxhabetewe'sx vxite' peeku'jsuwe'sx yã'jçxa jxuka, luuçx e'z anxu ji'phsate kãhpkaçx. Estrelxa's uysaawe'sxa' makwe txaçx yã'j yuuçtewa pta'sxne'ta txã'sna jiyuçxak txã'wẽ e'z anxu ji'phsate kãhpkaçx kiikhe'jna ùsu' Herodesa'.

¹⁷ Dxus yuwe pta'sxsa Jeremias na'jĩna fxi'jni kxtey yuuk:

¹⁸ Teeçx ahte Ramá yaasesate pthũusek Seena' pebeena nxus we'weni.

Txã' Rakelku txã'wẽ ù'ne' txajx luuçx pa'gate, Sa' kisxi'çme', txã'wẽtx ikhni yuu naa pa'ga jĩ'k.

¹⁹ Egipto kiwete ùsçxa José ksxa'wte', Dxus angel vxyaaçxa na'jĩk Herodes uuniijũ':

²⁰ —Ãçxha' luuçxa's ikh wẽesawa uuyã'jtx, aça' pe'jçxa sxawedna me'j Israel kiweníi jĩte',

21 Jose' sxawedna u'kh Israel kiwen luuçx petx njĩ'j yã'jçxa. 22 Nawa Herodes pa'gate nçxi'k Arkelao Judeate jxkaahna ũste jiyuçxa', ũukhku kxtee pa'jya' yu'. Sa' ksxa'wte' pta'sxnik yuu, txãasak Galilea kiwen u'j. 23 Kxtee pa'jçxa', teeçx çxhab Nasaret yaasesatek u'p-ya' u'j. Nyafxi-itey Dxus yuwe pta'sxsawe'sx we'weçxa', Je-susa' Nasareno ya'kxsusuna jĩ'tx txã'jĩni kxtey yuukahnçxáak txã'wē yūu.

3

Juan Bautista nasa u'pnimée kiwesu Dxus yuwe's pta'sxni

(Mr 1.1-8; Lk 3.1-9, 15-17; Jn 1.19-28)

1 Txãa ensu' Juan Bautista' Dxus yuwe's pta'sxna pa'kh Judea kiwesu nasa u'pnimeesu.

2 Sa' na'jĩ'k:

—Pkaltxi nvxihtçxa Dxus tasxte misxawedwe. Txã'wēme', Dxus jxkaahwa'j ena' ājxã'kh jĩ'k.

3 Naa Juana'sku we'wena fxi'j Dxus yuwe pta'sxsa Isaiasa' na'jĩna:

Nasa u'pnimée kiwesu sus we'weni pthūusek:

Dxus pa'jwa'ja's mpheu'jwe,

Dxi'ja's ku'le phaadena jĩ'k.

4 Juana' kamelxo khas atxh athçxa kha'txku jxtudu'. Sa' txajx ũ'nisa yu', khã'sx wala çxhi'dx miltxi yu'. 5 Kxtee wēse'jya' pa'jtx Jerusalenuwe'sx vxite' Judea kiwesuwe'sx jxuka vxite' Jordan yu'wala utxasuwe'sxwa. 6 Sa' txã'wē pkalsatha'w jĩna Dxusa's perdon pējxna pa'jsatxi' Juana' Jordan yu'walate bautisaĩ'k.

⁷ Nawa fxariseowe'sx vxite' saduceowe'sx txã'wẽ thegya' yuhte uyçxa', Juana' na'jĩ'k:

—I'kwe'sxa' ul weesweesa ji'ji'kwe txãa pa'ga kastigo seena'sa yuja', açã' txajũ iyuwa'ja's çkinga pta'sx? ⁸ Txã'wẽ kastigo seena'saju iyuwa'ja's jiyuyã'jçxa', ewçxáa yũuna mfxi'zewe, kxah maawa ew fxi'zeni's uysa': Naawe'sxa' pkaltxi nvxihtçxa Dxus luuçx yuh yuuta sũjutxna. ⁹ Txã'jĩte', i'kwe'sxa' na'wẽ iwejçx yaakxnuwe: Kwe'sxa' Abraham ji'tha'w na' pkalsameetha'w sũhna yaakxwa'j ji'phmẽe i'kwe. Na'jĩ'th na': Naa kwet yuhtxwa Abraham ji'j vxit-ya' ãjana Dxusa'. ¹⁰ Txã'wẽ ew fxi'zemeete', ama' ih yã'j ũsa' fxtũutasxtxi spẽ'thya'. Maa fxtũutasxwa ew yũnsameetxi' spẽ'thçxa ipxte kabwa'jçxáa yuuna. ¹¹ Adxa' i'kwe'sxtxi' yu'teçxáath bautisaĩ' pkaltxi nvxihtçxa Dxus tasxte sxawedsatxi'. Nawa adx e'suh vxite yuja' txã' Dxus Espiritu ipx na'wẽsate bautisaĩna. Txã' adxte jxthaakwe ãjawa'jsa', açã' adxa' txajx pelgatxiçxáa yuhtxwa ũsya' seelpimeesath. ¹² Txã' skuutxh kweejxa'jni plaatu's kusete at yã'jçxa ũsa' na' skuutxha's tamaju txudena sũupi'jna. Txã'wẽ yũuçxa skuutxha's jxaawuuna. Nawa tama yu'sa' kabuna ipx bagaçxte yuhwa ũçxhawa'jmeesate jĩ'k.

Jesus ya'bautisãyni

(Mr 1.9-11; Lk 3.21-22)

¹³ Naapkaçxha' Jesusa' Galilea kiweju yuhçxa Jordan yu'wala pukate Juan ũsnite pa'kh, Juan

yu'te bautisâykahn. ¹⁴ Nawa Juana' Jesusa's bautisây wêemeeçxa na'jîk:

—Wejx yuuwa idx adxa's bautisâywa'jsag, sa' ħma'wêga adxa's pi'ki' idxa's bautisâykahn? jîte', ¹⁵ Jesusa' na'wêk pas:

—Dxus jxthâasni's kxtey yuuní wejx ewna jîte', Juana' kxtey nwêese'kh. ¹⁶ Aça' Jesusa' yu'te ya'bautisâyçxa kasejeçpkaçxha', cielu' phaatek, aça' Jesusa' uyku Dxus Espiritu tub çxihme na'wêsa txajx kajkwete kîjaçte. ¹⁷ Aça' we'weniwa pthûusek cieluju na'jîna:

—Naaii Adx Nçxi'k wala wedxnisa'. Txâa pa'ga wala weçxana ũsthu jîk.

4

Eçxthê'j Jesusa's ĩsxii wêeni (Mr 1.12-13; Lk 4.1-13)

¹ Txajû' Dxus Espiritu' Jesusa's pe'jna u'kh nasa u'pnimée kiwesu, kxteea' eçxthê'j ĩsxii wêeni fxi'zeya'. ² Sa' kuarenta en kuarenta kus kîhwa ũ'mée u'pçxa', Jesusa' wêek. ³ Aça' eçxthê'ja' Jesus tasxte utxaaçxa na'jînak we'we ewmée vxit wêeçxa:

—Dxus Nçxi'k dxihçxa', naa kwettxi pan myuukaah jîte', Jesusa' na'wêk pas:

⁴ —Dxus librute na'jî'k: Nasa' pan yakhçxáa yu' ĩtxi fxi'zemeetxna, naasáa jxuka Dxus we'weni yakh yuuçxáa ĩtxi fxi'zetxna jîk.

⁵ Txajû' eçxthê'ja' Jesusa's pe'jna u'kh Jerusalen çxhabna, sa' kxteea' dxuus yatte êete kaateka'jçxa, ⁶ na'wêk jxkaah:

—Dxus Nçxi'k dxihçxa', ay ěejũ mũph. Txãa pa'gatey Dxus librute na'wěk we'we':

Dxusa' txajx angeleswe'sxtxi jxkaajana idxa's nwe'wekahn.

Aça' txãawe'sxa' kusete jxpa'gatxna,

Iidx çxida kwette kpã'yuukahmen jĩna fxi'jni' jĩte',

⁷ Jesusa' na'wěk pas:

—Vxite ahte Dxus librute' na'wěk we'we':

Idxna jxpe'jsa Dxusa's jxkaahwa'j ji'phmeeg jĩna fxi'jni' jĩk.

⁸ Txajũ' eçxthě'ja' ki' pe'jna u'kh vxiç walate, sa' txãajũ maa kiwesu çxhabtxiwa seena' zhiçkwesa's kaavxya'jak. ⁹ Sa' na'jĩk:

—Adxa's peejũkweçxa neewe'wene'ga aça' adxa' na'sa' jxuka idxa's ũsu'nja jĩte', ¹⁰ Jesus pasçxa':

—Eçxthě'j, adx tasxu mtzutée, txãa pa'gatey Dxus librute na'jĩ'k:

Idxna jxpe'jsa Dxusçxá's neewe'wewa'ja', sa' txãaçxá's selpiwa'ja' jĩna fxi'jni' jĩte',

¹¹ eçxthě'ja' Jesus tasxu txuteek, aça' Dxus angeleswe'sxa' puçxya' pa'jtx.

Galilea kiwesu Jesus mjũya' takhni

(Mr 1.14-15; Lk 4.14-15)

¹² Juan Bautista' kxuuphni ũsa' jĩni's Jesusa' jiyuçxa', Galilea kiwen u'kh. ¹³ Nawa Nasaret çxhabte yu' yujumée, Kapernaum çxhabtek u'p-ya' u'j. Txãa çxhaba' Zabulón vxite' Nefxtalí kiwe txãa ja'dasuk ũsu' ĩkh pukaga. ¹⁴ Txã'wě yũuk nawa Dxus yuwe pta'sxsa Isaias fxi'jni kxtey yuukahñçxáak txã'wě yũu. Txã' na'jĩnak fxi'j:

15 Zabulón Nefxtalí txãawe'sx kiwesu u'psa,
Vxite' ìkh pukasu dxi'j u'jna ùsa' txãa ja'dasu
u'psa,

Vxite' Jordan yu'kuteju, sek kãani ju'guwe'sx,
Vxite' Galilea kiwesu judiu ji'jmeesawe'sx

16 Txãa nasa' çxhi'dxte ùssa na'wẽ ùsçxawa,
Eena'sa's uytxi.

Sa' uuní na'wẽçxáa yã'j ùstewa,
Eena'sa' kweethku jĩ'k.

17 Txajũ' Jesusa' Dxus yuwe's pta'sxya' takhku:

—I'kwe'sxa' pkaltxi nvxihtçxa Dxus tasxte mis-
xawedwe. Txã'wẽme', Dxus jxkaahwa'j ena'
ãjxã'kh jĩ'k.

Wedx uwesáa pahzsatx Jesus pa'yani

(Mr 1.16-20; Lk 5.1-11)

18 Jesusa' Galilea ìkh pukasu u'jweççxa', e'z px-
akhtxi uyku, Adres vxite nyakha's Simon Pedro
jĩ'tx txãawe'sxtxi. Txãawe'sxa' wedx uwesaatx
yu', txãasatx wedx ukhe's ìkhte akhna ùsu'.

19 Aça' Jesusa' na'jĩk:

—Adx yakh myuhwe, aça' Dxus jĩi
nasaa pkhakhwa'jsa vxitu'nja i'kwe'sxtxi'.

20 Txã'jĩçpkaçxha', wedx ukhetx nvxihtçxa txãa
yakh u'jtx.

21 Aça' Jesusa' txãajũ wejkuẽ u'jnaçxáa, vxite
e'z pxakhtxi uyku, Zebedeo nçxi'kwe'sx Jakobo
vxite' Juan txãawe'sxtxi. Txãawe'sxa' barkote
ney yakhtxi u'p yu', wedx ukhe's pã'khna. Aça'
Jesusa' pa'yak. 22 Naapkaçxha' barko vxite'
txãawe'sx neyna nvxihtna'wa Jesus yakh u'jtx.

Nasa seena' wala kuhsatx Jesus kaapiya'jni

(Lk 6.17-19)

²³ Jesusa' Galilea kiwe jxukak pekūh, judi-
uwe'sx pkhaakheni yat-su Dxus jxkaahwa'j
yuwe ewsa's pta'sxna, txã'wěy nasa kīh weete
ãça'satxwa jxuka nuykatxhik. ²⁴ Txajū' Siria
kiwesuwe'sx jxuka jiyutx Jesus txã'wě yūuni's.
Txãa pa'gatx fxiyfxiy ãça'satxwa jxuka jxūna
pa'j, aka ji'phsa vxite' eçx iiyamunisa vxite'
wēeçpa'jsa vxite' ēseya' ājasameetxwa jxuka.
Txã'wēsaxku Jesusa' nuykatxhi. ²⁵ Txajū' Je-
sus yakh pi'kxna u'juya' nasa wala utxaatx,
Galileajuwe'sx vxite' Dekapolis kiwesuwe'sx vx-
ite' Jerusalenuwe'sx vxite' Judea kiwesuwe'sx
vxite' Jordan yu'kutejuwe'sx.

5

Thã'j vxiçte Jesus kaapiya'jni

¹ Nasa wala kuh kasehte uyçxa', Jesusa'
txajx txhitxhnisawe'sxtxi thã'thek pe'jna u'j.
Aça' txãawe'sxa' txajx tasxte utxaate', ² na'wēk
kaapiya'jya' takh:

Kim weçxana fxi'zewa'jsatxki

(Lk 6.20-23)

³ Wala yuh weçxa yuja' Dxusa's peejçxa pak-
wesáa yakha', txãa pa'gatey txã'wě yūusa' Dxus
jxkaahna ūsnite u'kaya' ājawa'jsata' naa pa'ga.

⁴ Wala yuh weçxa yuja' ewmeete fxi'zeni's
jiyuçxa ū'nena Dxusa's yaakksa yakha', txãa
pa'gatey txã'wě yūusa' Dxus kvxiisxa'jni yu-
uwa'jsata' naa pa'ga.

⁵ Wala yuh weçxa yuja' wa'lmée Dxus tasxte
utxasáa yakha', txãa pa'gatey txã'wě yūusá'

naa kiwe jxuka txãawe'sx jïiçxaçxáa yuuna pa'jwa'jsa' naa pa'ga.

⁶ Wala yuh weçxa yuja' Dxus dxi'pte ew fxi'zewa'ja's yuuçxáa ũusuh jxuka yajkxçxa pakwesáa yakha', txãa pa'gatey txã'wẽ yũusaatxi' Dxusa' pu'çxhina.

⁷ Wala yuh weçxa yuja' vxitetx peeygãhna fxi'zesa yakha', txãa pa'gatey txã'wẽ yũusa' Dxus peeygãanitx fxi'ze' naa pa'ga.

⁸ Wala yuh weçxa yuja' ũuste kïh pkala's yuhwa ka'ga'jmée fxi'zesa yakha', txãa pa'gatey txã'wẽ yũusa' Dxusa's uyya' ãjawa'jsata' naa pa'ga.

⁹ Wala yuh weçxa yuja' puiimée fxi'zewa'ja's pakwesáa yakha', txãa pa'gatey txã'wẽ yũusa' Dxus luuçxta' naa pa'ga.

¹⁰ Wala yuh weçxa yuja' Dxus yakh fxi'zepa'ga yahçena fxi'zesa yakha', txãa pa'gatey txã'wẽ yũuni fxi'zeçxawa Dxus jxkaahna ũsnite u'kawa'jsata' naa pa'ga.

¹¹ I'kwe'sxa' wala yuh weçxana mfxi'zewe, adxna nwēese'pha'gaçxáa nasa' wēesxuna pkxuuna kïjkïhwa ewmée nuywe'weçtewa. ¹² Txãa pa'gatey cielute' wala yuh jxpa'gawa'j ji'phi'kwe naa pa'ga. Dxus yuwe pta'sxsa txãniiteywe'sxtxi txã'wẽtx pkxuu na' ãçxhwa txã'wẽyçxáa yu-utxna, nawa nxusmée weçxana mfxi'zewe.

Naa kiwete nega na'wẽ pëethehna eena' kweethwa'jsa

(Mr 9.50; Lk 14.34-35)

¹³ I'kwe'sxa' nega na'wẽ naa kiwete pëethewa'jsa i'kwe. Nawa nega' sxũukãhçxa',

¿ma'wē pēethejekx? Kīh yūuwa'j yuhwa selpimeena, naasáa puhbçxa nasaa wakhi'khi'jwa'jçxáa yuuna.

¹⁴ I'kwe'sxa' naa kiwete eena' kweethsa i'kwe. Teeçx çxhab thã'j vxiçga ũssa' ¿nasa uyn-imée ũsma'k? ¹⁵ Lampara's aphçxa txajxa' txã'wē ya'pki'ta'çme', wejxwa ãatek ya'txaja', yatte jxuka kweethkahn. ¹⁶ Txã'wēy i'kwe'sxwa eena' mkweethwe nasaa dxi'pte, kxah i'kwe'sx ew fxi'zeni's uyçxa', Dxus ewsa ũsyuju'ga jīna we'wetxna i'kwe'sx Tata cielute ũssa's.

Moises leya's Jesus ãate kaapiya'jni

¹⁷ Moises ley vxite' Dxus yuwe pta'sxsawe'sx kaapiya'jni txātx nwēese'jya'méene' yuwé' sūhna yaakxnuwe adxa's. Txã'wē yūuya' yuwe'çmeeth, wejxwa txāa leya's jxthaakwe ew ãate kaajiyu'jya'th yuwé'. ¹⁸ Isath pta'sxi', cielu petx kiwe yã'jçxa skhēwpkaçx txāa leytxi' le'çxkuēçxáa yuhwa e'skhē nvxihtméé jxuka nwēese'jwa'tha'. ¹⁹ Txāa pa'ga maawa txāa ley jxkaahnitx wala le'çxkuēesa kīhtewa selpiwa'jmeesa na'wē thegte txātxi' nvxihtçxa, nasatxwa txã'wē yūuya' íçxáa kaapiya'jana na', txã'wē yūusa' Dxus jxkaahna ũsnite le'çxkuēçxáa seelpisa' jīni yuuna. Nawa txāa leytxi' le'çxkuēçxáa yuhwa nvxihtméé jxuka nwēese'jçxa vxitetxwa txã'wēy nwēese'jya' kaapiya'jsa', Dxus jxkaahna ũsnite wala seelpisa' jīni yuuna. ²⁰ Na'jī'th na': i'kwe'sxa' kaapiya'jsawe'sx vxite' fxariseowe'sx fxi'zenite jxthaakwe ew fxi'zemeçxa', bagaçxte yuhwa Dxus jxkaahna ũsnite u'kaya' ãjameene'kwe.

Ūsçxawa'jme'
(Lk 12.57-59)

²¹ I'kwe'sx yaçgawe'sxtxi na'jīna kaapiya'jni's iiwēse'jne'kwe: Nasa ikhwa'jme'. Txā'wēme', nasa ikhsatxi's maatxwa kastigāywa'j yuuna jī'tx. ²² Nawa adxa' na'wēth jxkaaja': Nasa yu's ikhmeçxawa, peekx yakhthē'ja's ūsçxa yaakxpagaçxáa txāawa yuuwesa kastigāywa'j yuuna. Meeçxawa peekx yakhthē'ja's wáa açewe'wena aç'a' txā'sa' khuēswe'sx tasxte jxūna u'jni yuuna. Sa' peekx yakhthē'ja's wēesxute', txā'sa' kastigo infxiernote akhwa'j yuuna. ²³ Txā'wē Dxusna peeswa'j ofxreda's jxūna pa'jçxa altalte akhmey yaakiwá'ga iidx yakhthē'j idxa's açeni's, ²⁴ sa' txāa ofxreda's altal pukate nvxihtna'wa u'jwene'ga iidx yakhthē'ja's perdon pējxya'. Txā'wē yūuçxa txāa ofxreda's altalte akhene'ga.

²⁵ Maawa idxa's açesa pāatxhī'khçxa khuēs tasxna jxūna u'jweçte', khuēs tasxte pa'jmey dxi'kha mpuutxwe'we khuēs tasxte jxūna u'khamen. Txā'wēme' khuēsa' policiawe'sxtxi dukhte', txāawe'sxa' karcelte txajatxna. ²⁶ Adxa' isath we'we', txajūyā'ja' kasejxa' ājameene'ga vxyu nmeh ji'phuni's dukhmeçxa yu'.

Ptamsa vxite yakh pkal yuuwa'jme'

²⁷ I'kwe'sxa' iiwēse'jne'kwe na'jīna nyafxiitey kaapiya'jni's: Ptamsayā'ja' vxite yakh pkal yu-uwa'jme' jīni's. ²⁸ Nawa adxa' na'wēth jxkaaja': Vxite yakh yu' pkal yuumeçxawa, teeçx u'ya's ewmée yajkxçxa thegni yakhçxáa, pkal yā'kh yu' txajx ūuste.

29 Yafxa' idxa's pkalte kweete'phçxâh yuuçte', kutxi'jçxa mwâatah. Wejxwa teeçx yafxçxá's ivxiituçxa', kakwe jxuka yu' infxiernote akhni yuunimée wejx ewa'. 30 Meeçxa' paçu kuse txã'wē pkalte kweete'phçxâh yuuçte', spē'thçxa mwâatah. Wejxwa teeçx kuseçxá's ivxiituçxa', kakwe jxuka yu' infxiernote akhni yuunimée wejx ewa'.

Ptamusa' txuteewa'jme'

(Mt 19.9; Mr 10.11-12; Lk 16.18)

31 Txã'wēy nyafxiitey na'jina pta'sxni'swa iiwēse'jne'kwe: Maawa nyu yakh txuteeççxa', txãa txuteni's eçte fxi'jçxa nvxiitwa'ja' jinatx kaapiya'ja'. 32 Nawa adxa' na'wēth jxkaaja': Nyua' vxite yakh pkal yūuteçxáa nmi'a' txuteeya' ājana. Txã'wēme', pkal yūsameete peekçxáa nmi'a' txuteeçxa', vxite yakh pkalte weteewa'ja's dxi'j phaadesa yuuna. Txãa pa'ga maa piçthē'jwa txãa u'y nvxiitnisa yakh ptamuuçxa', txãawa pkaltek wetesá yuuna pa'ja'.

Jurāywa'jme'

33 I'kwe'sx yaçgawe'sxtxi na'wē kaapiya'jni'swa iiwēse'jne'kwe: Dxus yase's kxsusçxa jurāyni's ĩsxiimée kxtey yuuwa'ja' jī'tx. 34 Nawa adxa' na'wēth jxkaaja': Kxtey yuune'jmeeçxa', ma'wēsaçxáa yuhtxwa kxsusna jurāywa'jme'. Cielu's kxsusna jurāynuwe, txã' Dxus jxkaahna ũsni' naa pa'ga. 35 Sa' kiwe'swa kxsusna jurāynuwe, txãa kiwe' dxuus çxida txaahwa'j vxitnisa' naa pa'ga. Sa' Jerusalennawa kxsusna jurāynuwe, txãa çxhaba' jxkaahsa çxhaba' naa pa'ga. 36 Sa' peekx dxikthe's

kxsusnawa jurãynuwe, txãa pa'gatey idxa' kïhte yuhwa seelpimeesag Dxus dxi'pte naa pa'ga. Txãasa teeçx dxkhasçxáa yuhnawa çxihme vxit-ya' ãjawa'jsameeg, sa' khũçxwa vxit-ya' ãjameene'ga. ³⁷ Jurãywa'j peejxme', isasa's teeçx jwedçxáa mwe'wewe, jiiçxa' jii íith jïna, jiimeeçxa' jiimeeth jïna. Txã'wëme', ïsxiina we'wenisa' eçxthë'j kwe'we'jni'.

Iideewewa'jme'
(Lk 6.29-30)

³⁸ I'kwe'sxa' iiwëse'jne'kwe na'jïna nyafxiitey kaapiya'jni's: Iidx yafxa's kpã'vxitte', ka'tuwa txã'wëy myüu. Sa' iidx ki'tha's çxkahdete', ka'tuwa txã'wëy myüu jï'tx. ³⁹ Nawa adxa' na'wëth jxkaaja': Iidxna ewmée yüusa's ka'tuja' iideewenu. Txã'wë yüumée, iidx dxi'pga pehtxate', ka'tu ju'guwe'sxnawa petxakahn mes. ⁴⁰ Meeçxawa idxa's päatxhĩ'khçxa iidx kmiisa's kusa'jaçte', jxkaaçni atxhnawa mes jxüna u'khan. ⁴¹ Teeçx ta'gute pa'j tu'sçxa nvxiht-ya' u'jwa'ja's jxkaathe', e'z ta'gute pa'j nvxiht-ya' me'j. ⁴² Maawa kïhçxáawa idxa's thãaste', mes. Sa' pki'the', wa'lwa'jme' ji'phçxa'.

Açesatx peeygãawa'ja'
(Lk 6.27-28, 32-36)

⁴³ Nyafxiitey na'jïna kaapiya'jni'swa iiwëse'jne'kwe: Nasatxi' mpeeygãh, nawa açesa yuutxi' peeygãanu jï'tx. ⁴⁴ Nawa adxa' na'wëth jxkaaja': I'kwe'stxxi açesatxi' mpeeygãhwe, sa' kxsewna ewmée we'wesatxi' ka'tu' ewçxáa mwe'wewe. Açesatxi' ew yüuna mfxi'zewe. Wëesxuna pkxuusatxi' txãawe'sx

pa'gate Dxusa's mneewe'wewe nwe'wekahn.
⁴⁵ Txã'wẽ yũuçxaçxáa i'kwe'sx Tata cielute ũssa
 luuçxçxa txã'wẽ yuune'kwe. Txã' maa nasatxwa
 seka's kaakweethe'je'k, ewsa ma'k yuu meeçxa'
 ewmeesa ma'k yuu nawa jxukaysatx. Sa' txã'wẽy
 nusnawa kaja'k, ew yũusa ma'k yuu meeçxa'
 ewmée yũusa ma'k yuu nawa jxukaysatx.
⁴⁶ Txã'wẽ i'kwe'sxtxi peeygãasaçxáatx ka'tuwa
 peeygãhçxa', ew yũusatha'w çjĩya' ajama'kwe?
 Makwe nasa ewmeesa gobierno jĩi vxyu
 pkhaksawe'sxwa txã'wẽ yũuwa'jçxáa yu'sa'
 aja'tx aça'. ⁴⁷ I'kwe'sx yakthẽ'jwe'sxçxáatx
 weçxate', çkĩh ew yũuni yaasena? Txã'wẽ
 yũuwa'j yu'sa' Dxusna jiimeesawa kxteytxi yũ'.
⁴⁸ I'kwe'sx Tata cielute ũssa' maa yakhwa jxuka
 ewsa' naa pa'ga i'kwe'sxwa txã'wẽy mfxi'zewe.

6

Jxpa'yakx ew yũuwa'ja'

¹ I'kwe'sx ew yũuni's nasa uyçxa ew we'we
 jxthãasçxa mjĩini's wala mpa'yajkxwe. Txã'wẽ
 ew we'we jxthãasçxaçxáa ew yũuna fxi'zete',
 iidx Tata cielute ũssa' kĩh yuhwa dewemeena.
² Txãa pa'ga peejxsatx kĩhçxáawa peesu'ççxa',
 nasa uykahñ sũhçxa nasa ksxavxyte txã'wẽ
 yũunu. Aateçxáa ew we'wesawe'sxçxáatx
 txã'wẽ yũ' judiuwe'sx pkhaakheni yat-su vxite'
 klxiikhunsu, nasa' uyçxa' ew yuh yũ'k jĩna
 tuuthe'j jxthãasçxatx txãawe'sxa' txã'wẽ yũ'.
 Nawa adxa' isath we'we': Txã'wẽ yũuçxa', nasaa
 pwe'sx tuuthe'jniçxáatx fxi'ze'. ³ Nawa peejxsatx
 kĩhçxáawa peesu'ççxa', kim yuhwa jiyunimeete

paaçte txã'wẽ myũu. ⁴ Aça' paaçte txã'wẽ yũuçte iidx Tata uyçxa', idxa's deweena.

Dxus yakh na'wẽ puutx we'wewa'ja'
(Lk 11.2-4)

⁵ I'kwe'sxa' Dxus yakh puutx we'weççxa', ãateçxáa ew we'wesawe'sx na'wẽ yũunuwe. Txãawe'sxa' judiuwe'sx pkhaakheni yat-su vx-ite' klxiikhunsu yujuçxatx Dxus yakh puutx we'wena pekũju' nasa uykahn sũhçxa. Isath we'we', txã'wẽ yũuçxa' nasaa tuuthe'jniçxáatx fxi'ze'. ⁶ Nawa idxa' Dxus yakh puutx we'weççxa', yat dxiite u'kaçxa vxitxa's aphçxa kim yuhwa uynimeete mpuutxwe'we. Aça' txã'wẽ paaçte puutx we'wete', iidx Tata cielute ũssa' deweena.

⁷ Dxus yakh puutx we'weççxa', lxisasáa na'wẽ txã'snaíçxáa kuh us peenana ũswa'jme'. Dxusa's jiimeesaçxáatx txã'wẽ yũ', wala we'wete', Dxusa' wẽse'jena sũhçxa. ⁸ Txãawe'sx na'wẽy yũunuwe. Txã'wẽ yũumeetewa, i'kwe'sx Tata' jiiyã'ja' i'kwe'sx peejini's pẽjxumeyna. ⁹ Txãa pa'ga i'kwe'sxa' na'wẽçxáa Dxus yakh puutx we'wena na'jĩne'kwe:

Kwe'sx Tata cielute ũssa
Idxa' bagaçxtewa jxtuhthe nes yuune'ga.

¹⁰ Iidx jxkaahwa'j ena'sçxáatha'w ũythasu',
Naa kiwete idx ma'wẽne'ga jxthãasu'
txã'snaçxáa kxtey tee yuu cielute na'wẽy.

¹¹ Kwe'sx ũ'wa'j een isa peejini's meen pees.

¹² Kwe'sx ewmée yũuni's meen peltunaĩ,
kwe'sxwa ma'wẽtka'w peltunãy kwe'sxtxi
ewmée yũusatx txã'wẽy.

¹³ Ewmeete wetekahmén, meen nwe'we. Txãa pa'gatey idx yuuçxáa kíhtewa jxuka ãjawa'jsag, sa' bagaçxtewa idx yuuçxáa jxkaahna nes yuuwa'jsag.

¹⁴ Txã'wē i'kwe'sxwa ewméé yūusatx pel-tunāyte', i'kwe'sx Tata cielute ūssawa pel-tunaína i'kwe'sxtxi. ¹⁵ Nawa ewméé yūusatx peltunaímeete', i'kwe'sx Tatawa peltunaímeena i'kwe'sxtxi.

Dxus yakh puutx we'weya' yūunani's kaapiya'jni

¹⁶ I'kwe'sxa' yūunaççxa', maa nasawa uykahn sūhçxa āate kaavxya'ja'jwa'jme'. Āateçxáa ewtha'w jīsaçxáatx txã'wē yū' nasa jiyukahn. Isath we'we': Txã'wē yūuçxa' nasaa tuuthe'jniçxáatx fxi'ze'. ¹⁷ Nawa idx txã'wē yūunaççxa', dxi'pna pçxhĩ'çxçxa dxkhasnawa ew mkid, ¹⁸ kxah idx yūunani's āate kaavxya'ja'jmeete', nasa jiyumeetxna, naasáa iidx Tata yuuçxáa jiyuçxa idxa's deweena.

Cielute ji'phuwa'jçxá's mpa'pçxuwe

(Lk 12.33-34)

¹⁹ Naa kiwete kījkiħwa ji'phuwa'ja's pa'pçxunuwe. Txã'wēme', wes ū'we'tx, aça' izwa suwu'tx. Naapkaçxha' peswé' pa'jçxa ji'phuni's kutxi'ji'tx. ²⁰ Wejxwa cielute ji'phuwa'jçxá's wala mpa'pçxuwe. Kxteea' weswa ū'meena, aça' izwa suwmeena, pesweewa kutxi'jmeena. ²¹ Txãa pa'gatey mtee jxaawni ji'phçxa', kxte yuuçxáak wejx jxthaakwe yajkxna ya'fxi'ze'.

Yafxa' kakwe's ewte kaafxi'ze'jsata'
(Lk 11.34-36)

²² Yafxa' kakwe's ewte kaafxi'ze'jsata'. Txã'wẽ iidx yafxa' ewsaçxá's thegsate', iidx kakwe' ewte sxiigmée fxi'zena. ²³ Nawa iidx yafxa' ewmeesaçxá's thegsate', iidx kakwe' jxuka ewmeete çxhi'dxteçxáa fxi'zena. Txã'wẽ eena'te ew kaafxi'ze'jwa'jsa yuu ewmeete çxhi'dxtewe'sxa'sçxáa thegsate', bagaçxte yuhwa eena'te fxi'zewa'ja's ya'ji'phumeena.

Dxusna yajkxna vxite' naa kiwete ji'phuni'swa yajkxna fxi'zeni
(Lk 16.13)

²⁴ Kim yuhwa e'z patrontxi selpiiya' ajameena. Txã'wẽ vxiteçxá's wedxna fxi'zeçxa', vxite patron yu'sa' açena. Sa' teeçxsa jxkaahniçxá's kxtey yuuçxa', vxite patron jxkaahni yu'sa' kxtey yuuya' ajameena. Txã'wẽy naa kiwete ji'phuni's pa'pçxuna Dxusnawa selpiina yuuya' ya'aja'çme'.

Kwe'sx peejini's Dxusa' jxuka pu'çxhina
(Lk 12.22-31)

²⁵ Na'wẽth yu'kxpeje': I'kwe'sxa' kĩh yuhwa kuh yajkxmée mfxi'zewe, ¿kĩh ũ'wekxtha'w? sa' ¿kĩh athekxtha'w? sũhna. Txãa pa'gatey ũ'nisate jxthaakwe peejsa itxi fxi'zeni's ji'phyã'ji'kwe, sa' athnisate jxthaakwe peejsa kakwe'swa ji'phyã'ji'kwe naa pa'ga. ²⁶ Mthegwe êesu fxuusa vxiçxakwetx. Txãawe'sxa' uja'çmeeta', sa' ũ' pkhakhe'çwameeta', sa' tee jwedte jxaawu'çwameeta'. Txã'wẽtewa i'kwe'sx Tata cielute ũssa' txãa vxiçxakwetxi'

peejxmeek sã'jĩ'. I'kwe'sxa' txãa vxiçxakwete jxthaakwe pa'gasa i'kwe, açã' wejx txã'wẽ sã'jĩna. ²⁷ Txã'wẽ wala pa'pçxuçxa' ç'i'kwe'sx maaçxá' peena medio metro thaakwe walaaya' aja'kwe'?

²⁸ ÇKĩjxa'çxáakwe txakwe pa'pçxu' i'kwe'sx athwa'j ropaçxá's? Mthegwe kite tasxti. Txãawe'sxa' mjĩ'çmeeta', sa' khaswa puduçmeeta', nawa ma'wẽta zhiçxkwe walá'.

²⁹ Na'jĩ'th na': Jxkaahsa Salomon yuhwa txãa kite tasx na'wẽ yu' zhiçxkwe iijxũme' makwe wala ji'phsaçxawa. ³⁰ Txã'wẽ kite tasxa' açxhii yu' zhiçxkwe ũsçxawa, kuskusa' ipxte kabwa'jçxáak yu', nawa txã'wẽsa'swa Dxusa' wala zhiçxkwe pheu'ju'k na' i'kwe'sxtxi' wejx thaakwe ew pheu'juna. Txãa sũjxa' aja'çmeene'kwe.

³¹ Txãa pa'ga i'kwe'sxa' kĩh yuhwa kuh yajkxmée mfxi'zewe, çkĩh ũ'wekxtha'w? sa' çkĩh athekxtha'w? sũhna.

³² Dxusna jiimeesaçxáatx txã'wẽ kuh yajkxna fxi'ze'. Nawa i'kwe'sxa' cielute Tata ji'phi'kwe txã' jxuka jiia' i'kwe'sx peejini's. ³³ Txãa pa'ga i'kwe'sxa' Dxus yakh fxi'zewa'ja's khuẽ'y wejx thaakwe mpa'pçxuwe, txajũyã'ja' kĩhwa thẽymée vxyaana.

³⁴ Açxha' jiyui'kwe na' kuskuskhẽwe'sxa's ũyhasna pa'pçxunuwe. Txã'wẽme', kuskuskhẽ' pa'pçxuwa'j thaakwe thẽysa pa'jana een isa fxiyfxiysa.

7

Jiimeeçxa' nuywe'wewa'jme'
(Lk 6.37-38, 41-42)

1 Ma'wēsatewa jiimeeçxa', ewmeesata' jīna nuywe'wewa'jme', Dxus dxi'pte i'kwe'sxwa ewmeesa yuuya'mée. 2 Txã'wēme', vxitesatx nuywe'wete', Dxusa' i'kwe'sxtxiwa ewmeesata' jīçxa kastigaīna nuywe'wepa'ga. I'kwe'sx ma'wē juuna' yūute', Dxuswa txã'wēyçxáa juuna' kastigaīna. 3 Iidx yakthē'j yafxte kxtã' le'çxkuēsa khēeçxa ūste ¿ma'wē uyuki'g iidx yafxte yu' fxtū pe'la yuu walasa khēeçxa ūste txã's khuē'y kutxi'jmeeçxa'? 4 Sa' ¿ma'wē iidx yakthē'ja's kxtã' le'çxkuēsa iidx yafxte ji'phgu txã'sa' kutxi'jith jīna we'weki'g, txã'wē iidx yafxte yu' fxtū pe'la walasa's ji'phçxa'? 5 Āakheçxáa ew we'wena u'jusa, iidx yafxte fxtū pe'la walasa's khuē'y mkuutxi'j. Txã'wē yūuçxa iidx yakthē'j yafxte kxtã' le'çxkuēsa's ew uyçxa kutxi'jya' ājane'ga.

6 Dxus yuwe's alkutx ūswa'jme', sa' kuçxixwa ūswa'jme'. Txã'wēme', jxuka wa'khi'khi'jçxa ūusaçxayã'jçxa', ūssa i'kwe'sxtxi íiçxáa wa'kxya' kūjutxna.

Dxusa's pēyni vxitxte tu'kakana
(Lk 11.9-13; 6.31)

7 Dxusa's mpējxwe, aça' ūsuna, sa' pakweçxa', uyuuné'kwe. Vxitxte mtu'kakawe, aça' phaadena. 8 Txã'wē maawa pēysa' jxpá'gana, aça' pakwesá' uyuuna. Vxitxte tu'kakate', phaadeni yuuna.

9 I'kwe'sx pwe'sx maaçxa' i'kwe'sx luuçx pan thāaste', ¿kweta's ūsma'kwe? 10 Meeçxa' wedx thāaste', ¿ula's ūsma'kwe? 11 I'kwe'sxa' Dxus dxi'pte ewmeesaçxawa, i'kwe'sx luuçxtxi'

ewsaxáa i'kwe peesu', aça' i'kwe'sx Tata cielute ũssa' wejx thaakwe ewsa's peesuna thãassatxi'.

¹² Bagaçxtewa i'kwe'sxtxi maa nasawa ewçxáa yũuna fxi'ze jxthãasçxa', i'kwe'sxwa txã'wëy maa nasatxwa ewçxáa yũuna mfxi'zewe. Txãa pa'gatey Moises ley vxite' Dxus yuwe pta'sxsawe'sx fxi'jniwa txã'wëçxaçxáatx jxkaaja'.

Vxitx pteezsa
(Lk 13.24)

¹³ Vxitx pteezte me'kawe. Txã'wëme', vxi-tuwa'the u'kawa'j vxitxa' wala tape', aça' dxi'jwa txã'wëy tape'. Kxteea' wala kuhsa u'kana ũsta'.

¹⁴ Naapkaçxha' vxitumée Dxus tasxte pa'jwa'j vxitxa' pteeza', aça' dxi'jwa txã'wëy pteeza'. Kxtee yu' kuhmeeçxáa u'kana ũsta'.

Nasa ma'wë yuuçtewa mpa'yajkxwe jiyuya'
(Lk 6.43-44)

¹⁵ Dxus jxkaahnisatha'w jĩna ĩsxiisatxi' mpa'yajkxwe. Txãawe'sxa' i'kwe'sx tasxte yu' piisxáa kakwe yakhtxi vxya', nawa ũuste yu' yu'kh eçx weeswée na'wësata'. ¹⁶ I'kwe'sxa' txãawe'sx fxi'zeni's jiyune'kwe. Miiyajkxwe: Uwa's çhũçh tasxte ya'ude'çme', sa' brewa's khãas tasxte ya'ude'çme'. ¹⁷ Txã'wë fxtũu tasx ewsa' ewsaçxáak yũnu', aça' fxtũu tasx ewmeesa' ewmeesaíçxáak yũnu'. ¹⁸ Fxtũu tasx ewsa' ũ' ewmeesa's yũnya' ajameena. Txã'wëy fxtũu tasx ewmeesa' ũ' ewsa's yũnya' ajameena. ¹⁹ Maa fxtũu tasxwa ewmée yũnsa's spë'thçxa ipxte ya'kabu'k. ²⁰ Txãa pa'ga txãawe'sx fxi'zeni's uyçxa jiyune'kwe ma'wësatewa.

*Jxukaysa yu' cielute u'kameetxna
(Lk 13.25-27)*

²¹ Yuwejuçxáa adxa's ew we'wesa jxuka yu' cielute Dxus jxkaahna ũsnite u'kawa'jsameeta', naasáa adx Tata jxthãasni's kxtey yuusaçxáa cielute u'kawa'jsata'. ²² Txãasa cielute u'kawa'j en ãhte', wala yuh maawa adxa's na'jĩtxna: Kwe'sxtxi jxpe'jsa mwēese'j: Kwe'sxa' iidx yuwe's pta'sxtha'w, sa' iidx yase's kxsusçxa eçxthē'jtxwa kutxi'tha'w, sa' kim yuhwa ãjanimeesa'swa kaavxya'ja'tha'w maz uswa jĩtxna. ²³ Nawa adxa' na'jĩna pasu'nja: Bagaçxte yuhwa adx jxpe'jnisa yu'çmeei'kwe, naa pa'ga i'kwe'sxtxi' jiimeeth. Ewmée yũuna fxi'zesa' adx tasxtewe'sx meei'kwe.

*Dxusa's nwēese'jsa vxite' Dxusa's
nwēese'jsamée
(Lk 6.47-49; Mr 1.22)*

²⁴ Maawa adx jxkaahni's wēse'jçxa kxtey yu-
usa', yat txajxa' jiisa na'wēsa yuuna: Txãa yata's
kwette kaaçxida'jçxa txahte', ²⁵ nus pa'jna, wejxa
wala kiitena, yu' walaana yuuçxawa, yata's
suwme', kwette kaaçxida'jçxa txaahnipa'ga.
²⁶ Nawa maawa adx jxkaahni's wēse'jçxawa
kxtey yuusame', yat txajxa' jiimeesa na'wēsa
yuuna: Txãa yata's kwetmuseteçxáa txahte',
²⁷ nus pa'jna, wejxa wala kiitena, yu' walaana
yuute', txãa yata' weteçxa jxuka suweek jík.

²⁸ Txajũ' Jesus we'wena jxã'the', nasa' wala
kuh yajkxna neeyũutx txajx kaapiya'jni's
wēse'jçxa, ²⁹ txã'wē leya's kaapiya'jsawe'sx

na'wēmée, nwēese'jwa'ja's ũukhnus we'wena kaapiya'pha'ga.

8

Teeçx piçthē'j wā'jy weete āça'sa's Jesus nuykatxhini

(Mr 1.40-45; Lk 5.12-16)

¹ Jesusa' thā'j vxiçu kīhte', nasa iiméh wala kuh pkhaakhetx. ² Aça' teeçx piçthē'j wā'jy wee seena' kazxsate āça'sa Jesus tasxte utxaaçxa peejxūkweçxa na'jīnak pxthaa we'we:

—Adxa's peeygāhçxa' nuykatxhine'ga naa weeju jīte', ³ Jesusa' na'jīnak kuseju jxa'dx:

—Ahçemée peeygāanisag, naa pa'ga katxhiçxa mneeyūu jīçpkaçxa', txāa wā'jy weeju katxhiçxak neeyūu. ⁴ Aça' Jesusa' na'wēk jxkaah:

—Maa yuhtxwa pta'sxmeene'ga, naasāa sacerdote yuuçxáana iidx kakwe's txwesya' me'j. Sa' Moises ma'wēga jxkaaja' txā'sçxáa kxtey yuune'ga, kxah nasa jxukaysa jiyutxna idx ew katxhiçxa neeyūutewa jīk.

Soldau kpiitan jxpe'jnisa's Jesus nuykatxhini

(Lk 7.1-10)

⁵ Txajū' Jesusa' Kapernaum çxhabte pa'the', soldau kpiitan romanowe'sx utxaaçxa' pxthaa we'wek na'jīna:

⁶ —Adx yatte jxpe'jnisa uuya' yā'j ũsa' ēseya' ājameeçxa jīte', Jesus pasçxa':

⁷ —Adxa' u'jçxa nuykatxhi'nja jīk. ⁸ Aça' kpiitana' na'wēk pas:

—Adxa' iidx dxi'pte kīhte yuhwa seelpimeesath. Txāasath adx yatte iidx pa'jni's

thaame', naasáa çxhãçxhana jĩna mwe'we aççxáa adx jxpe'jnisa' katxhina. ⁹ Adxwa ma'wẽtka walasa jxkaahnitxi' nwẽese'je', sa' adxna nwẽese'jsa soldauwe'sx iijxpe'th txãawe'sxtxi teeçxsa's me'j jĩte', adx jxkaahni's kxtey yu'k. Sa' vxite's pa'yate', txãawa kxtey nwẽese'je'k. Sa' adxna selpisa's kĩh jxkaathewa kxtey yu'k jĩk.

¹⁰ Txã'wẽ we'weni's Jesusa' wẽse'jçxa', wala kuh yajkxku, sa' na'jĩnak we'we txãa yakh yu-usatxi':

—Isath we'we', Israelwe'sx jxukaysa mteewe'sx yuhwa txã'wẽ adx we'weteçxáa katxhina sũhsa yu' iuymeeth naa piçthẽ'j na'wẽsa yu'. ¹¹ Na'jĩ'th na', judiu jĩ'meeçxawa wala yuh pa'jatxna sek kãanijũwe'sx vxite' sek khẽenijuwe'sx majũwe'sxwa jxuka, sa' Abraham, Isaak, Jakob txãawe'sx yakh ũ'ya' kaçxhiitxna cielute Dxus jxkaahna ũsnite. ¹² Naapkaçxha' kxtee ũswa'jsata' jĩnisa yu', kutxi'jçxa çxhi'dx walate akhni yuutxna. Kxteea' seena' yuh pebeena ki'thtxi ksuusu'jutxna ũukhna jĩk.

¹³ Sa' Jesusa' ki' we'wek kpiitana's:

—Yatna me'j, aç'a idx ma'wẽne'ga jxthãasu' txã' kxtey yuuna jĩçpkaçxha', txãa kpiitan jxpe'jnisa' katxhinik yuu.

Pedro nyu njĩ'ja's Jesus nuykatxhini

(Mr 1.29-31; Lk 4.38-39)

¹⁴ Txajũ' Jesusa' Pedro yatnak u'j, sa' kxteea' Pedro nyu njĩ'ja' kakwesekte uuya' ũstek uy.

¹⁵ Aç'a kusete jxa'dxku, naapkaçxha' kakweseka' ũçxhak. Txajũ' txãa u'ya' kiiteçxa selpiia'

kasejk. ¹⁶ Sa' txãa en jxuka çxhi'dxiçte', Jesus tasxte wala jxũna pa'jtx eçx iiyamunisatx. Aça' tee dxi'j we'weni yakhçxãa txãa eçxtxi' ũusuh kutxi'kh, sa' aça'sa jxukaysatx nuykatx-hik. ¹⁷ Nyafxii Dxus yuwe pta'sxsa Isaiasa' na'jĩnak we'we:

Txãaĩk kwe'sx çxhãçxhamée fxi'zeni vxite' kwe'sx aça'na fxi'zeni's jxuka txuhde jĩ'k txã'jĩni kxtey yuukahnçxãak txã'wē yũu.

Jesus yakh fxi'ze wēesa

(Lk 9.57-62)

¹⁸ Txã'wē nasa wala pkhaakhete', Jesusa' ĩkh kuten u'jwe'nja'w jĩnak we'we. ¹⁹ Txã'jĩte', ley kaapiya'jsa teechxsa Jesus tasxte utxaaçxa', na'jĩk:

—Idx yakh yuu wēeth idx mtee u'jweçtewa jĩte', ²⁰ Jesus pasçxa':

—Yu'kh niimal yuhwa deewa'j kafx ji'phta', txã'wēy vxiçxakwewa yat ji'phta'. Nawa Dxus Nçxi'k Nasa Yuusa' mtee yuhwa txajx dxik-theçxãa yuja'swa khikhwa'j ji'phme'.

²¹ Naapkaçxha' Jesusna nwēese'jsa teechxsa' na'jĩnak we'we:

—Adxa's mkaah adx tata khuẽ'yna pedaawa'j ji'phthu jĩte', ²² Jesus pasçxa':

—Uusaawe'sxa' peekx uusãa pwe'sx ya'pedaatxna. Aça' idxa' adx yakh txutemée myuh jĩk.

Marte wejxa wala's Jesus kxuujujni

(Mr 4.35-41; Lk 8.22-25)

²³ Txajũ' Jesusa' barkote khēek aça' txãa yakh u'jusawe'sxa' pi'kxna u'jtx. ²⁴ Txã'wē ĩkhte u'jweçpkaçxha', wejxaa wala sējk, aça'

yu'tũçxhasa' barko's aphy'a'wak yu'. Nawa Jesusa' deenik yu'. ²⁵ Aça' txãa yakh u'jusawe'sxa' fxĩtxtxi na'jĩna:

—Kwe'sxtxi jxpe'jsa, meen nwe'we. Txã'wẽme', ìkh dxiikhẽ khẽjeçtha'w jĩte', ²⁶ na'wẽk pas:

—¿Kĩjxa'kwe txakwe wala ũukhu'? ¿I'kwe'sxa' Dxusna yajkxya' yu' ew jiimeewá'kwe? jĩçxa', kiiteçxa wejxa vxite' ìkh txãatx we'wek, aça' jxuka yujuk. ²⁷ Txã'wẽ yũute', barkote u'jsawe'sxa' wala kuh yajkxçxa na'jĩnatx we'we:

—Naa piçthẽ'ja' ¿kimna açki'tx wejxa ìkh txã'wẽsa yuhwa nwẽese'je'? jĩ'tx.

Gadara kiwetewe'sx eçx iiyamunisa

(Mr 5.1-20; Lk 8.26-39)

²⁸ Txajũ' Jesusa' ìkh kuteju Gadara kiwete pe-sathe', e'z piçthẽ'j uusáa pedani kafxju kasehçxa Jesus tasxte utxaatx. Txãa e'zsa' eçx iiyamunisatx yu', txãasatx iiméh seena' weeswée yu', txãa pa'ga txãa dxi'jsu kim yuhwa skhẽwya' aja'çmeeta'. ²⁹ Txãa eçx iiyamunisa' na'jĩnatx sus we'we:

—Dxus Nçxi'k Jesus, kwe'sx nxuste ũswa'j en áhmeyna, ¿nxuste akhya' yuwe'wá'ga? jĩ'tx.

³⁰ Kxsũ thã'jsu kuçxi wala ũsu'tx aphna.

³¹ Aça' txãa eçxa' Jesusa's pxthaa we'wetx:

—Kwe'sxtxi neeuççxa', txãa kuçxi ũussu khẽeya' u'khan mkaah.

³² Txã'jĩte', Jesusa' kxtey yuukaakh. Aça' txãa eçxa' nasa ũusuh kasehçxa txãa kuçxi ũustetx khẽe. Txã'wẽ yũute', txãa kuçxi' penxakhẽ

peluçxa îkhhkê khêeçxa jxuka uutx. ³³ Aça' kxsũ kuçxi thegsa' ûukhçxa wuwuuçxáa çxhabna u'jçxa pta'stxi kîh yũuni'swa jxuka. Sa' txãa e'z piçthê'j eçx iiyamunisawe'stxi kîh yũutewa jxukatx pta'sx. ³⁴ Txajũ' çxhabte nasa jxuka thegya' u'jtx Jesus ũsnite. Sa' uyçxa' Jesusa's txãawe'sx kiweju kasehna u'khaahtx.

9

Ëseyá' ájasame's Jesus nuykatxhini (Mr 2.1-12; Lk 5.17-26)

¹ Txajũ' Jesusa' barkote khêeçxa sxawedçxa txajx çxhabtey ki' pa'kh. ² Aça' kxteea' teeçx piçthê'j ëseyá' ájasame'stxi yakhna pa'j. Txã'wê yakhna pa'jsawe'sxa' Jesusa' nuykatxhiyujuna sũhni's jiyuçxa', áça'sa's na'wêk we'we Jesusa':

—Çxhãçxha myajkx. Iidx pkala' peltunãyni yã'jtx neeyũ jíte', ³ ley kaapiya'jsawe'sx maafi yu' na'wêtx yajkx: Naa piçthê'ja' Dxusa's iiweeçx we'wena ájawa'jmeea'sku we'we' sũju'tx.

⁴ Nawa txãawe'sx yaakxni's Jesus jiyuçxa', na'jĩnak we'we:

—¿Kîh yuutekwe txã'wê ewmêe yaaki?
⁵ ¿Maa thêymeesakx? Iidx pkala' peltunãyni yã'jtx neeyũ çjĩniá'? Meeçxa': Kiiteçxa me'j çjĩniá'? ⁶ Makwe thêysatewa Dxus Nçxi'k Nasa Yuusa' naa kiwete pkaltxi peltunãyya' ájawa'jsa' naa pa'ga kaajiyu'j ya'wath áçxha'.

Txajũ' ëseyá' ájasame's na'wêk we'we:

—Kiiteçxa, iidx deeni's tu'sçxa yatna me'j jíte', ⁷ txãa ëseyá' ájasameea' kiitena'wa u'kh txajx yatna. ⁸ Txã'wê yũuni's nasa uyçxa',

ũukhtxi. Sa' Dxusna weçxana tuuthe'jtx txã'wẽ çxhãçxhawa'ja's Dxusa' peesne' sũhçxa.

Mateo's Jesus pa'yani
(Mr 2.13-17; Lk 5.27-32)

⁹ Jesusa' txajũ u'jçxa', teeçx piçthẽ'j Mateo yaasesa txã'wẽ gobierno jĩ vxyu pkhakhna u'pte uyçxa', na'wẽk we'we:

—Adx yakh myuh jĩna.

Aça' Mateo' kiiteçxa Jesus yakh u'kh.

¹⁰ Txajũ' Jesusa' ũ'ya' yatte u'kak, aça' gobierno jĩ vxyu pkhaksawe'sx vxite' pkalsawe'sxwa wala kuh u'katx vxite' Jesus yakh u'jusawe'sx yã'jçxa. ¹¹ Aça' txã'wẽ yũuni's fxariseowe'sx uyçxa' pějxtxi Jesus yakh u'jusawe'sxtxi na'jĩna:

—¿Ma'wẽçxaga i'kwe'sxtxi kaapiya'jsa' gobierno jĩ vxyu pkhaksawe'sx vxite' pkalsawe'sx yakh ũ'wé'? ¹² jĩni's Jesus wẽse'jçxa', na'wẽk we'we:

—Yu'çe'jsa's jxpeejxmeeta' aka ji'phmée wēt ũssa', naasáa aça'sa yuuçxáa yu'çe'jsa's jxpeejxta'. ¹³ Mpiyawé Dxus libruete na'wẽ fxi'jni ũsa' txã'sna: Tajkx ikhçxa Dxusa's weçxana kabni yu'sa' jxpeejxmeeth. Adxa' vxitetx peeygãaniçxá'sthu jxthãasu' jĩ'k. Adxa' nasa ewsatx pakweya' kĩhmeeth, naasáa pkalsatx pakweya'çxáath kĩh, kxah ewmée yũuna fxi'zeni's nvxihtçxa Dxus tasxte sxaweduutxna.

Yũunani's Jesusa's pēyni
(Mr 2.18-22; Lk 5.33-39)

¹⁴ Txajũ' Juan Bautista yakh u'jusawe'sxa' Jesus tasxte utxaaçxa na'wẽtx pějx:

—¿Kĩh yuupa'gatka'w kwe'sx vxite' fxarise-
owe'sx txakwe wala yũuna', naapkaçxha' idx
yakh u'jusawe'sx yu' yũuna'çmeeta'? jĩte',
¹⁵ Jesusa' na'wěk pas:

—Miiyajkxwe: ¿bodate pi'kxnisa' ũ'mée
nxusna ũswa'jsatxmanx novxio' txãawe'sx
yakh nee ũsiite'? Naasáa novxio's txãawe'sx
tasxuh txuhdete yuuçxáa yũunaatxna.

¹⁶ Ropa ĩisxsate tela u'sesa yakh
ya'pã'khe'çme'. Txã'wěme', tela u'sesa'
jweeĩçxáak sude' ĩisxsa's, aça' sutenisa'
jweeĩçxáa wala suteena. ¹⁷ Txã'wěy beka u'se
aahnisa's slun ĩisxsate ya'awu'çme'. Txã'wěme',
beke u'sesa slun ĩisxsa's sude'k, aça' beka yakh
slun yakh e'zĩi vxitu'tx. Txãa pa'ga beka u'sesa's
slun u'sesate awwa'ja'. Txã'wě yu', maa yuhwa
vxitumeetxna.

Jairo niisa vxite' Jesus atxhte jxa'dxsa
(Mr 5.21-43; Lk 8.40-56)

¹⁸ Jesus txã'wě we'wena ũspkaçxha', judiu
pkhaakhenite npiiçthě'jsa' Jesus tasxte pee-
jxũkweçxa na'wěk we'we:

—Adx niisa' uuyã'kh. Nawa idx yuhçxa kuseju
jxa'dxwaça', ĩtxi yuuna jĩte', ¹⁹ Jesusa' kiitena'wa
txãa yakh u'kh, txãa yakh u'jusawe'sx yã'jçxa.
²⁰ Txã'wě u'jweçpkaçxha', teeçx u'y doce anxu
kakwe yu'te ãça'na u'jusa Jesus e'ste paaçte
kũhçxa, atxh vxiçte kpaajxa'dxku. ²¹ Atxh
vxiçteçxáawa jxa'dxwaça', katxhi'nja sũhçxak
txã'wě yũ. ²² Nawa Jesusa' jiyuçxa txãa u'ya's
thegçxa na'wěk we'we:

—Ûukhnuwe, wejxwa katxhini i'kwe neeyũu, txã'wẽ katxhi'nja sũhçxane'kwe txã'wẽ yũu naa pa'ga jĩte', txãa dudtey katxhiçxak neeyũu.

²³ Txajũ' Jesusa' txãa npiiçthẽ'jsa yatte pa'jçxa uyku pedaaçte nxusna tukawa'jsa músiku jxuka pheu'jçxa ũste. Aça' nasa' nxusna wala ũ'nena ũste', ²⁴ na'wẽk jxkaah:

—Ayjxu mkaasehwe. Luuçxa' uunime', deeniçxáa ũsa' jĩte', nasa' npeevxysxijkatx. ²⁵ Nawa Jesusa' nasatx kasejkaahçxa dxiite u'kana'wa, txãa luuçxa's pu'kisuçpkaçxha', kiitek. ²⁶ Aça' txã'wẽ yũuni's txãa kiwesu jxuka tuuthe'jnik yuu.

E'z piçthẽ'j uyya' ãjasameetx Jesus nuykatxhini

²⁷ Txajũ' Jesus kasehna u'jweçte', uyya' ãjasamée e'ztxi sus we'wena yuwé':

—Davxid Nçxi'k, kwe'stxi mpeeygãh jĩna.

²⁸ Txajũ' Jesusa' yatte u'kate', txãa uyya' ãjasameewe'sxa' utxaana kũhtx. Aça' Jesusa' na'wẽk pẽjx:

—¿Uywa'ja's ũsuna sũju'kwe' i'kwe'sxa'? jĩte', txãawe'sx pasçxa':

—Txãa sũju'íitha'w jĩtx. ²⁹ Aça' Jesusa' txãawe'sx yafxte jxa'dxku na'jĩna:

—I'kwe'sx jxthãasni' kxtey yuuna jĩçpkaçxha', ³⁰ txãawe'sx yafxa' ewuutx. Aça' Jesusa' wala neewe'wek na'jĩna:

—Kim yuhtxwa pta'sxmeene'kwe jĩtewa, ³¹ txajũ kasehna' txãa kiwesu jxuka pta'stxi Jesus txã'wẽ yũuni's.

We'weya' ãjasame's Jesus nuykatxhini

³² Txãawe'sx kasehna u'jweçpkaçxa', Jesus tasxte vxite piçthê'j nuypa'jtx, we'weya' ãjasamée eçx iyamunisa's. ³³ Aça' Jesusa' txãa eçxa's ũusuh kutxi'the', txãa piçthê'ja' we'weya' ãjak. Txã'wē yūute', nasa' wala kuh yajkxtxi na'jīna:

—Israel kiwete bagaçxte yuhwa na'wēsa yu' iuymeetha'w jī'tx. ³⁴ Nawa fxariseowe'sx yu' na'wētx we'we:

—Naa piçthê'ja' eçxtxi nasa ũusuh kutxi'ji'k, nawa eçxthê'j pu'çxteçxáak txã'wē yū' jī'tx.

Mjīsa yu' kuhmeeta'

³⁵ Jesusa' çxhab walasu çxhab le'çxkwesu judiuwe'sx pkhaakheni yat iisa kaapiya'jnak pekūju'. Sa' Dxus jxkaahwa'ja'swa pta'sxna vxite' wee ma'wēsate nasa ãça'satxwa nuykatxhina kīh akatxwa jxuka kaykase'je'k. ³⁶ Sa' Jesusa' txãa nasatx thegçxa', txãawe'sxtxi peeygājk txã'wē nxusna çxhãçxhameekuē piisxáa namu ji'phmeesa na'wē ũspa'ga. ³⁷ Sa' txãa yakh u'jusawe'sxtxi na'wēk we'we:

—Isath we'we', mjīia' seena' wala', nawa mjīisa yu' kuh meeta'. ³⁸ Txãa pa'ga mjīi namu's mpējxwe mjīiwa'jsa kaakhan jīk.

10

Doce nasa Jesus txhitxhni (Mr 3.13-19; Lk 6.12-16)

¹ Txajū' Jesusa' txãa yakh u'jusa docesatx pa'yaçxa na'wē yūuya' ãjawa'ja'sku ũs: eçxtxi nasa ũusuh kutxi'jna kīh weete ãça'satxwa

nuykatxhina, kîh aka ji'phtewa jxuka yu'çe'jya' ãjawa'ja'sku ũs.

² Txãa docesawe'sxa' na'wêtx yaase yu': Nyafx-tewe'sxa' Simonku yu', txã'sa' Pedro jî'tx. Vxite' txajx nyakh Adres. Vxite' Zebedeo nçxi'ktxi yu', Jakobo Juan pxakhsa. ³ Vxite' Fxelipe, Bartolomé, Tomás, vxite' Mateo gobierno jîi vxyu pkhakhsa. Vxite' Alfxeo nçxi'k Jakobo, vxite' Lebeo txã'snaíçxáa Tadeo jî'tx. ⁴ Vxite' Simonku yu', kananista nasa. Vxite' Judas Iskariote, Jesusa's açesawe'sx kusete dukhwa'jsa.

*Docesatx Dxus yuwe's pta'sxya' kaahni
(Mr 6.7-13; Lk 9.1-6)*

⁵ Txãa yakh u'jusa docesatx Jesusa' na'wêk neewe'weçxa kaah:

—Judiu jîjmée vxite nasa kiwesu' u'jnuwe, sa' Samaria kiwesu çxhab ũstxna kxsūwa u'jnuwe, ⁶ wejxwa Israel jî'j piisxakuẽ na'wê jxpubana ũsta' kxsūçxáa me'jwe. ⁷ Sa' pta'sxine'kwe Dxus jxkaahwa'j ena' ãjxã'kh jîna. ⁸ Åça'satxwa nuykatxhine'kwe, uusaatxwa ki' îtxi vxitune'kwe, wã'jy wee kazx ji'phsaxwa nuykatxhine'kwe. Eçxtxiwa nasaa ũusuh kutxi'jine'kwe. I'kwe'sx txã'wê ãjawa'ja's vxyupa'gamée i'kwe jxpa'ga na', nuykatxhipa'ga vxyu pějxmeene'kwe.

⁹ Kîh vxyu yuhwa jxūmée me'jwe. ¹⁰ Ya'ja, spaatu, khãabu txãaçxáa yuhtxwa jxūmée me'jwe, naasáa teeçx kmiisaçxáa jxūçxa me'jwe, txãa pa'gatey mjîisa' puuçni fxi'zewa'jsa'.

¹¹ I'kwe'sxa' çxhab wala meeçxa' çxhab le'çxkwesu mtee pa'jçxawa, kxtee

paadejene'kwe nasa ewsa tasxsu, vxite ahte u'jwa'j en āhpkaçx. ¹² Yatte pa'jçxa, ewçxáa we'wena weçxana pa'jane'kwe. ¹³ Txãa yatte nasa ew jxpa'gate', Dxus yakh weçxana fxi'zewa'ja's pta'sxine'kwe. Nawa txã'wẽ yũumeete', pta'sxmeene'kwe. ¹⁴ Sa' i'kwe'sxtxi jxpa'gamée, pta'sxni'swa wẽse'jya' wa'lte', yatte ma'k yuu meeçxa' çxhabte ma'k yuu nawa txajũ kasejeççxa', i'kwe'sx çxidate kiwe tuhda's sakweekweçxa kasejene'kwe kxah yuuwesa yuutxna. ¹⁵ Isath we'we', Dxus kastigãywa'j en āhte', txã'wẽ yũusa nasa' seena' yuh ya'kastigaĩtxna, Sodoma Gomoçxa çxhabsu nasate jxthaakwe.

I'kwe'sxtxi açewa'j en pa'jana

¹⁶ Mwẽese'jwe, adxa' i'kwe'sxtxi piisxakuẽ na'wẽ kajaçthu yu'kh eçx ksxavxysu. Aça' i'kwe'sxa' ikhwe'sxte ul na'wẽ jxpa'yakx mfxi'zewe, nawa iideewewa'j yu'sa' ji'phmée tub çxihme na'wẽ myuuwe. ¹⁷ Mpa'yajkxwe, txã'wẽme' nasa' i'kwe'sxtxi uweçxa khuẽswe'sx tasxte dukhetxna, sa' judiuwe'sx pkhaakheni yat-suwa pãpatxna. ¹⁸ Kxsũçxáa kuutxa'jmée ne'jwe'sx tasxsu vxite' jxkaahsa tasxte yuhwa pe'jna u'jni yuune'kwe, adx yuwe's pta'sxpa'ga. Txã'wẽ yũutewa, kxsũwa txãawe'sx dxi'pte tuuthe'jeiççxáa ne'kwe adxa's vxite' judiu ji'jmeesa dxi'ptewa. ¹⁹ Txã'wẽ khuẽswe'sx tasxsu kuutxa'the', kuh yaakxnuwe, aççha' çma'wẽ pasukxtha'w? sũhna. Txãa pa'gatey txã'wẽ yũuçpkaççha', Dxusa' i'kwe'sxtxi kaaũsuthe'jena ma'wẽ paswa'ja'swa.

20 I'kwe'sx ũus yaakxniju we'wemeene'kwe; Dxus Espiritu i'kwe'sxtxi kwe'we'jena.

21 Peekx nwe'sxíçxáa txãawe'sx nyakhtxi ahçeçxa kiikhe'jetxna. Aça' neywe'sxa' peekx nçxi'ktxi ahçeçxa kiikhe'jetxna, naapkaçxha' nçxi'kwe'sxa' neywe'sxtxi ahçeçxa kiikhe'jetxna.

22 Adxna nwēese'pha'ga naa kiwete nasa jxukay i'kwe'sxtxi açetxna. Txã'wētewa, ũukhmée çxhãçxha uu entepkaçx fxi'zesa' txãawe'sx ũusa' Dxus nwe'weni yuutxna. 23 Txã'wē ahçeçxa ikhya' pakweeçpkaçxha', txãa çxhabuh kasehçxa vxite ahte me'jwe. Isath we'we', i'kwe'sx txã'wē Israelwe'sx çxhabsu jxuka pekūhmeyna, Dxus Nçxi'k Nasa Yuusa' kījana.

24 Piyasa' maa yuhwa kaapiya'jsate jxthaakwemeeta'. Txã'wē selpisa' patronte jxthaakwesame'. 25 Kaapiya'jsa ma'wē pkxuuni yuute', piyasaawa txã'wēy nxuswa'ja's jxpa'gawa'jsata'. Aça' selpisaawa patron ma'wē pkxuuni yuute', txãawa txã'wēy nxuswa'ja's jxpa'gawa'jsa'. Yat namu's Eçxthē'j jīna kxsusçxa', txajx jxpe'jnisa yuutxi' wejx txã'jīna we'wetxna.

Kimna wejx ũukhwa'jcx

(Lk 12.2-9)

26 Txã'wē yūutewa, nasatxi' ũukhnuwe. Adx we'weni' kīh yuhwa txã'wē paaçte yu' neeyūuwa'jsame', sa' kīh yuhwa txã'wē sūthçxa jiyunimée yu' neeyūumeena. 27 Adxa' i'kwe'sxçxáatxthu we'we', nawa txãa we'weni's nasa ma'wēsaxwa jxuka āate mwe'wewe. Sa' naa ja'date ayteçxáa we'weni's msuuwa jxuka mwe'wewe. 28 Kakweçxá's ikhsa's ũukhwa'jme'.

Txãawe'sxa' ũus yu'sa' ikhya' ãjameetxna. Wejxwa kakwe petx ũus yã'jçxa infxiernote kaajxa' ãjawa'jsa's wejx ũukhwa'ja'.

²⁹ E'z vxiçxakwetx teeçx centawote çtxweyu'çyuhmeetxna' wakx? Txã'wẽ pa'gameekwesaçxawa, maa yuhwa kiwekhẽ wete'çmeeta', i'kwe'sx Tata' txã'wẽ jxthãasmeete yu'. ³⁰ I'kwe'sx dxikthete dxkhas yuhwa jxuka isani ũsta'. ³¹ Ũukhnuwe, i'kwe'sxa' txãa vxiçxakwete jxthaakwe pa'gasai'kwe.

³² Maawa ũukhmée adx ju'gu we'wesatxi', adxwa adx Tata cielute ũsa' txajx tasxte txãawe'sx ju'gu we'we'nja. ³³ Nawa maawa nasatx ũukhçxa adxa's jiimeeth jĩna ĩsxiijana txã'sa' adxwa txã'wẽyçxáa jiimeeth jĩna we'we'nja adx Tata cielute ũsa' txajx tasxte.

Jesusa' nasatx kaapui'jsa na'wẽ yuuni

(Lk 12.51-53; 14.26-27)

³⁴ Naa kiwete yahçemée fxi'zewa'ja's nvxiht-ya' kĩhmeeth, nxuste yahçena fxi'zewa'ja's nvxiht-ya'th kĩh. ³⁵ Adxna nwēese'pha'gaçxáa neya' nçxi'ka's açena, naapkaçxha' njĩ'ja' niisa's açena, aç'a' swegra' nkuẽmyu's açena. ³⁶ Txã'wẽ adxna nwēese'pha'ga peekx yattewe'sxíçxáa yaaçeni fxi'zetxna.

³⁷ Maawa adx yu's yajkxmée naasáa ney vxite' njĩ'j txãawe'sxçxáatx jxthaakwe yaakxsa', adxa's selpiiya' ãjameetxna. Txã'wẽy maawa adx yu's yajkxmée naasáa nçxi'k vxite' niisa txãawe'sxçxáatx jxthaakwe yaakxsa' adxa's selpiiya' ãjameetxna. ³⁸ Makwe thẽysa

uuwa'jma'k pa'j nawa txãatxi' yajkxmée fxi'zesame' adx tasxte selpiiya' ãjameena. ³⁹ Naa kiwete peekx ãtxi fxi'zewa'jçxá's ya'nwe'wesa', cielute fxi'zewa'j thaakwe ewsa yu'sa' ivxiituna. Naapkaçxha' adxna nwēese'pha'ga naa kiwete ãtxi fxi'zeni's yajkxmée ivxiitusa' cielute ãtxi fxi'zewa'j yu'sa' ivxiitumeena.

Dxus peesni's jxpa'gawa'jsa

(Mr 9.41)

⁴⁰ Maawa i'kwe'sxtxi wa'lmée jxpa'gasa', adx-nawa jxpa'gasaçxa txã'wē yuuna. Sa' adxna jxpa'gaçxa', adxna jxkaahsanawa jxpa'gasa yu-una. ⁴¹ Dxus yuwe pta'sxsa txãawe'sxa' Dxus jxkaahnisata', aç'a' maawa txãawe'sxtxi wa'lmée ew jxpa'gasa', Dxus peesni's jxpa'gawa'jsata', Dxus yuwe pta'sxsatx peesni's íçxáa. Sa' nasa ewsatx jxpa'gasa' ewsaçxa txã'wē yuuna, sa' nasa ewsatx dewenisa's íçxáa jxpa'gana. ⁴² Isath we'we': Adxna nwēese'jsa makwe wala ãhmeekwesatewa txã'sna yu'fxizeçxáawa yussa' dewenisa yuuna.

11

Juan Bautista yuwee kaahnisa

(Lk 7.18-35)

¹ Jesusa' ma'wē yūuwa'ja'swa txãa yakh u'jusa docesatx pta'sxna jxã'jçxa', txajū kasehna u'kh txãa kiwesu çxhab le'çxkwesu kaapiya'jya'. ² Aç'a' Jesus txã'wē yūuni's Juan Bautista kx-uuphni ũsçxa jiyuçxa', txajx jxpe'jnisatx Jesus tasxna kaakh ³ na'jīna pějxya':

—Kristo naa kiwete kiiwa'jsa ũsu'k idxa' ¿txãa dxihgá', meeçxa' vxite ũythasuwá'nja'w? jíte',
 4 Jesusa' na'wêk pas:

—U'jçxa Juana's pta'sxine'kwe adx na'wê yũuna fxi'ze'th txã'sa' yafxju uyi'kwe sa' kaapiya'jni'swa wêse'ji'kwe txã'sna: 5 uyya' ãjasameewa uyu'tx, legsawa katxhiçxa legmeetx neeyũ', wã'jy wee kazx ji'phsawa katxhinitx neeyũ', wêse'jya' ãjasameewa wêse'jya' ãja'tx, uuniisawa ki' itxi yu'tx, sa' naa kiwete pxthaakuêesa yuutxi' Dxus tasxte pa'jwa'ja's pta'sxnik yuu jĩne'kwe. 6 Aça' adxa's kuh yajxna jxpubasamée yakh yu' wala yuh weçxa yuja'.

7 Txajũ' txãa pēysa Jesus tasxu u'the', Jesusa' Juan ma'wēsatewa pta'sxku kxtee wêse'jsa nasatxi' na'jĩna:

—Nasa u'pnimée kiwete', i'kwe'sxa' ¿kĩhnakwe thegya' u'j? ¿Khĩih tasx wejxate ēse'sesa's wá'kwe thegya' u'j? 8 Kxte' ¿kĩh ũski sũhçxakwe thegya' u'j? Meeçxa' ¿teeçx piçthē'j ropa zhiçxkwesa athçxa u'pna sũhçxa wá'kwe thegya' u'j? I'kwe'sxa' peekx jii i'kwe txã'wê ropa zhiçxkwesa athsa' jxkaahsawe'sx yat-suçxáatx u'pu'. 9 Kxte' ¿kinnakwe uy? Dxus yuwe pta'sxsa's wá'kwe uy. Isa txã'sna yuh uyne'kwe, nawa Dxus yuwe pta'sxsa maatewa jxthaakwesa's i'kwe uy. 10 Txã'sna we'weçxak Dxus librute na'jĩ':

Adxa' yuwee pta'sxsa kajaçthu iidx yaçte, iidx pa'jwa'ja's pheu'khan jĩna fxi'jni'.

11 Isath we'we', naa kiwete maa nasa yuhwa Juan Bautistate jxthaakwe walasa yu' kasehnimeeta'

ãçxpkaçx. Makwe txã'wētewa, ãçxh naa en-suwe'sx maatewa jxthaakwe le'çxkuēsaçxawa Dxus jxkaahnite u'kasa' Juan Bautistate jxthaakwe walasata'.

¹² Juan Bautista pa'jnijũjx Dxus jxkaahni ena' açeni ũsa' ãçxpkaçx, txãa pa'gatx kaak-nayu'jya'mée çxhãçxha puiina fxi'ze'. ¹³ Nawa Dxus jxkaahwa'j ena's Moises ley vxite' Dxus yuwe pta'sxsa txãawe'sxa' txagaçxhíitx pta'sx Juan Bautista pa'phkaçx. ¹⁴ I'kwe'sxa' jiyu wēeçxa', jxpa'yakx mwēese'jwe: na'wē Dxus yuwe pta'sxsawe'sx we'weçxa', Dxus jxkaahwa'j en ãjaçpkaçxha', Elias pa'jana jĩ'tx txãak yu' Juan Bautista'.

¹⁵ Na'wē pta'sxya'wath txã'sna wēse'jwa'jsa ũsçxa', mwēese'jwe. ¹⁶ Naa ensu nasatxi' çma'wē kaaja'da'the wejx ewki? Nawa txãawe'sxa' luuçx le'çxkuē na'wēsata': luuçxçxáatx plaasasu pweesa'jya' kaçxçxa', txãawe'sx namikutx na'jĩna sus we'we': ¹⁷ Zhiçxkwetha'w kuvxí', nawa ku'ju'çmeei'kwe. Sa' nxus nxustha'w memu', nawa ũ'ne'çmeei'kwe jĩnatx we'we'. ¹⁸ Txã'wēsaxa i'kwe Juan Bautista's na'wē we'we': Eçx jĩ'phçxak txã'wē ũ'we'çmée, sa' vxinowa tudxi'çme' jĩna i'kwe açewe'we'. ¹⁹ Txãa e'su Dxus Nçxi'k Nasa Yuusáa pa'jçxa txã'wē ũ'na tudxna yuute', na'wēi'kwe açewe'we': Wala pũ'we', sa' txã'wēyku wala tudxi'. Pkalsawe'sx vxite' gobierno jĩ vxyu pkhakhsawe'sx yakh namiku' jĩna i'kwe açewe'we'. I'kwe'sxa' jĩmeeçxai'kwe txã'jĩ'. Nawa maawa jiyuwa'jsa yuutxi' Dxusa' kaajiyu'juna adx ma'wēsatewa jĩk.

*Çxhab nwëese'jsamée yakh ùukhùukhsa
(Lk 10.13-15)*

²⁰ Txajũ' Jesusa' juuna'k we'we maa çxhabsuçxahne' wejx wala txã'wë kim yuhwa ãjanimeesa's kaavxya'ja'jna ùsu' kxsũuwe'sx nasatx. Txãa nasa' pkaltxi nvxihtçxa Dxus tasxte sxawedmeene'ta naa pa'ga na'jĩk:

²¹ —Korazín çxhabte nasa vxite' Beçaida çxhabte nasa txãawe'sx yakha' wala yuh seena' ùukhùukha'. Txã'wë Tiro çxhabte nasa vxite' Sidon çxhabte nasa txãawe'sx ksxavxysu txã'wë kim yuhwa ãjanimeesa's kaavxya'ja'jwaça', txãawe'sxa' pkaltxi nvxihtçxa Dxus tasxte sxawedni yã'j yuutxna. ²² Nawa na'jĩ'th na': Dxus kastigãywa'j en ãhte', Tiro çxhabte nasa vxite' Sidon çxhabtewe'sxte jxthaakwe txãawe'sxa' ya'kastigaĩtxna. ²³ Aça' Kapernaum çxhabte nasa i'kwe'sx yu' cielute u'kawa'jsa yuhne'tka'w çsũju'kwe'? Txã'wëmée wejx infxiernoteçxáa u'jwa'jsa i'kwe. Txã'wë Sodoma çxhabte kim yuhwa ãjanimeesa's kaavxya'ja'jwaça', txãa çxhaba' ãçxpkaçx ùs yuuna. ²⁴ Txãa pa'ga na'jĩ'th na': Dxus kastigãywa'j en ãhte', Sodoma kiwesu nasate jxthaakwe i'kwe'sxa' ya'kastigaĩne'kwe jĩk.

*Jesus tasxte jxkaaseya' pa'yani
(Lk 10.21-22)*

²⁵ Txãa ensu' Jesusa' na'jĩnak Dxus yakh puutx we'we:

—Tata, cielute vxite' naa kiwete jxkaahsa idxa' txakwe wala kĩhtewa jxuka jiisawe'sx yuutxi'

kaajiyu'jmeeçxawa, pxthaa ãhmeekwesa yu-
utxi' kaajiyu'jg, txãa pa'gath txakwe wala weçxá'
idxa's. ²⁶ Idxa' txã'wëg yüu, iidx jxthãasni'
txã'wëne' yu' naa pa'ga.

²⁷ Adx Tata' kîhnawa jxuka adxçxaçxáanak
dukh. Nawa Dxus Nçxi'k ma'wësatewa kim
yuhwa ew yu' jiimeeta', naasáa adx Tata
yuuçxáa jiia'. Txã'wëy kim yuhwa ew yu'
jiimeeta' adx Tata's, naasáa Nçxi'k yuuçxáa
ew jiia' Ney'a's. Txãasak maawa jiyu wëesa
yuutxi' Nçxi'ka' kaajiyu'ju' Ney kimtewa.

²⁸ Maawa üuste wëtmée wahtxna fxi'zesa' adx
tasxte myuhwe jxukaysa, aça' adxa' weçxana
thëymée fxi'zewa'ja's üsu'nja. ²⁹ Adx jxkaahni's
wa'lmée jxpa'gaçxa, adx na'wëy fxi'zeya'
mpiyawe, txãa pa'gatey adxa' juuna'meekwe
üusuh jxuka peeygãhnath jxkaaja'. Txãa pa'ga
weçxana thëymée fxi'zewa'ja's ji'phune'kwe.

³⁰ Adx jxkaahni' walame', sa' nwëese'jwa'jwa
thëymesata' jîk.

12

Jxkaase entewa skuutxhtxi çxuktedeçxa ü'ni
(Mr 2.23-28; Lk 6.1-5)

¹ Txãa ensu' Jesusa' skuutxh ehsuk skhëuuç yu'
sapatu jxkaase ente. Aça' txãa yakh u'jusawe'sxa'
wëeçxa skuutxhtxi çxuktedeçxa ü'tx. ² Txã'wë
yüute', fxariseowe'sx uyçxa' na'wëtx we'we Je-
susa's:

—¿Uyu'gá' idx yakh u'jusawe'sxa' na'wë
yuuçta' mjîi enmée jxkaase entewa? jîte',

³ Jesusa' na'wëk pta'sx:

—I'kwe'sxa' ¿iilēeymeewá'kwe? Teeçx ente' Davxida' txāa yakh u'jusawe'sx yakh wēçxa' na'wēk yūu: ⁴ Dxuus yatte u'kaçxa', kxtee pantxi ũ'k txāatxi' kim yuhwa ũ'wa'j ji'phmeeta' naasáa sacerdote yuuçxáatx ũ'wa'jsa yu'. ⁵ I'kwe'sxa' Moises leytewa ¿iilēeymeewá'kwe? Kxte pta'sxçxa', dxuus yatte sacerdotewe'sxa' jxkaase'çmeeta' makwe jxkaase entewa jĩ'k. Txā'wē jxkaase ente jxkaasemeete', pkalna ¿sūju'çmeekwe'? ⁶ I'kwe'sxa' mjiyuwe: Ayte' dxuus yatte jxthaakwe jxtuhtesa ũsa'. ⁷ I'kwe'sxa' jiyu'çmeewá'kwe Dxus librute na'jĩ'k: Vxitetx peeygāaniçxá'sthu adxa' jxthāasu', tajkx ikhçxa altalte kabni's peejxmeeth jĩ'k. Txā'jīni's jiyuwaça', kwe'sxtxi' ũusaçxana açewe'wemeene'kwe, txā'wēçxáa yūunisa' pkalme' naa pa'ga. ⁸ Txāa pa'gatey sapatu jxkaase entewa Dxus Nçxi'k Nasa Yuusáa jxkaahwa'j ji'pha' jĩk.

Teeçx piçthē'j txajx kuse udxnisa
(Mr 3.1-6; Lk 6.6-11)

⁹ Jesusa' txajū u'jçxa', judiuwe'sx pkhaakheni yattek u'ka. ¹⁰ Kxteea' teeçx piçthē'j teeçx kuse udxnisa kēese'jya' ājasameek u'p yu'. Aça' Jesusa's ewmée vxit wēçxa na'wētx pējx:

—Jxkaase entewa nuykatxhite ¿ewmanx? jĩte', ¹¹ Jesusa' na'wēk pas:

—I'kwe'sx teeçx piisxáa ji'phte' txāa piisxá' jxkaase ente ewmeekhē khēete', ¿u'jçxa kutxi'jmeema'kwe jxkaase entewa? ¹² Nasa' piisxaate jxthaakwe pa'gasa', aça' wejx txā'wē

ew yūuwa'ja' makwe jxkaase entewa. ¹³ Txã'wẽ pasçxa txãa piçthẽ'ja's na'wẽk we'we:

—Kuse's mku'le'j jĩte', txã'wẽy yuuk, naap-kaçxha' txajx kuse' ewuuk ka'tuwe'sx na'wẽy.

¹⁴ Aça' fxariseowe'sxa' kasehçxa Jesusa's ikhya' puutx we'wetx.

Jesus ma'wẽsatewa nyafxiiitey pta'sxni

¹⁵ Txã'wẽ yūuçte Jesus jiyuçxa', txajũ kasehna u'kh, aça' nasa wala u'jtx txãa yakh. Jesusa' ãça'sa ma'wẽsatxwa jxukak nuykatxhi, ¹⁶ nawa kim yuhtxwa pta'sxkaahme' nuykatxhisa kimtewa. ¹⁷ Dxus yuwe pta'sxsa Isaias we'weni kxtey yuukahnçxáak txã'wẽ neewe'we. Isaiasa' na'jĩk:

¹⁸ Adxna selpiwa'jsa naa piçthẽ'ja'sthu txhitxh. Txãasa peeygãhna weçxana ũsthu, Sa' adx Espiritu's ũsu'nja, Aça' adx ew yūuwa'ja's pta'sxina maa nasatxwa jxuka.

¹⁹ Txã' puiiwameena, sa' ãate susnawa fxi'zemeena. Txãa pa'ga txajx we'weni' kĩh yuhwa pthūusemeena klxiikhunsu.

²⁰ Makwe pxthaa ãhmeekwesatewa txã' ahçemeena, Sa' çxhãçxha fxi'zewa'ja's ji'phmeeyã'thewa, txã' ivxiitumeena, Naa kiwete zhiçxkwe txajx jxkaahwa'j en ãhpkaçx.

²¹ Aça' nasa' ma'wẽsawa jxuka txã'sçxáana ũythasutxna jĩ'k.

Dxus Espiritu's açewe'weni
(Mr 3.19-30; Lk 11.14-23; 12.10)

²² Txajũ' Jesus tasxte jxũna pa'jtx uyya' ãjasamée we'weya'wa ãjasamée eçx iiyamunisa's. Aça' Jesusa' nuykatxhite', txãa piçthê'ja' uyya' ãjak, sa' we'weya'wa ãjak. ²³ Txã'wê yũute', nasa jxukaysa ũukh yajkxna na'wêtx kuh jwed we'we':

—Naa piçthê'ja' Davxid Nçxi'k ína jĩ'tx.

²⁴ Txã'jĩni's fxariseowe'sx wêse'jçxa', na'jĩtx:

—Naa piçthê'ja' eçxtxi nasaa ũusuh kutxi'ji'k nawa eçxthê'j pu'çxteçxáak txã'wê aja' jĩ'tx.

²⁵ Txã'wê yajkxna ũste Jesus jiyuçxa', na'wêk we'we':

—Maa kiwetewa gobierno' peekx nasatxíçxáa ahçeçxa puiiçxa', çxhãçxhameena. Txã'wêy çxhab ma'k yuu meeçxa' teeçx yattewe'sx ma'tx yuu nawa puutx yahçena puiiçxa', puutx pçuutxna. ²⁶ Txã'wêy eçxthê'jwa txajx jxkaahnisa eçx yakhíçxáa puiiçxa', çxhãçxhamée puutx pçuutxna. ²⁷ Í'kwe'sx adxna we'weçxa', eçxthê'j pu'çxteçxáak eçxtxi kutxi'ji' jĩna i'kwe we'we'. Aça' txã'wê dxihte', txã'wê i'kwe'sx yakh u'jusawe'sxwa eçxtxi kutxi'jya' aja'tx jĩ'i'kwe aça' txã'wê ajawa'ja's çkimki'k ũs? Txã'wê i'kwe'sx yakh fxi'zesáiwa áate kaajiyu'ju'tx i'kwe'sx jxpubani's. ²⁸ Adxa' eçxtxi kutxi'ji'th Dxus Espiritu pu'çxte'. Nawa i'kwe'sxtxi Dxusçxaçxáa jxkaahwa'j en áhne' txãa pa'ga ne'tka txã'wê yũ'.

²⁹ Maawa piçthê'j çxhãçxhasa iiyamuni's kusa'jya' u'jçxa', txãa piçthê'j çxhãçxhasa

khuẽ'yna tudmeeçxa yu', kusa'jya' ãjameena. Txã's khuẽ'yna tudçxa yuuçxáa kusa'jya' ãjana.

³⁰ Adx ju'gu yuusame' açesaçxa txã'wẽ yu-utxna. Sa' adxa's pu'çxsame', yupsaaçxa txã'wẽ yuutxna. ³¹ Na'jĩ'th na', nasa kĩhwa ewmée yũuni kĩhwa Dxusna ewmée nuywe'wetewa txaatxi' jxuka ya'peltunaína. Nawa Dxus Espiritu's açewe'wete', bagaçxte yuhwa peltunãywa'jmée yuuna. ³² Sa' maawa Dxus Nçxi'k Nasa Yuusa's ewmée nuywe'wesa's peltunãywa'j yuuna. Nawa Dxus Espiritu's ewmée nuywe'wesa yuuçxáana peltunãywa'jmée yuuna naa kiwete cielutewa.

Ma'wẽ fxi'zeni'swa uyçxak ya'jiyu'
(Lk 6.43-45)

³³ Fxtũu tasx ewsa' ewku yũnu'. Nawa fxtũu tasx ewmeesa' ewmeek yũnu'. Fxtũu tasx ma'wẽsatewa yũnte yuuçxáak ya'jiyu'. ³⁴ Ewmeesa luuçx i'kwe'sxa' ¿ma'wẽ ew we'weya' ãjaki'kwe, ũuste yuu ewmeesa ji'phçxa'? Txãa pa'gatey ũuste yaakxni'sku ya'we'we'. ³⁵ Nasa ewsa' ewsaçxá'sku we'we', txajx ũuste' ewsaçxá's ji'phna naa pa'ga. Naapkaçxha' nasa ewmeesa' ewmeesaçxá'sku we'we', txajx ũuste' ewmeesaçxá's ji'phna naa pa'ga. ³⁶ Adxa' na'jĩ'th na': Dxus kastigãywa'j ente' jxuka pta'sxi ji'phutxna kĩhwa jxuka ewmée we'weni's. ³⁷ Idx ma'wẽ we'weni'swa jxuka paapẽyni yuuna, txajũ yuuwema'g yuu meeçxa' yuuwemeema'g yuu nawa ya'jiyuna.

*Nasa ewmeesa' cieluju k̄ihçxáawa
kaavxya'ja'khaahni*

(Mr 8.12; Lk 11.29-32)

³⁸ Txajũ' fxariseowe'sx vxite' ley
kaapiya'jsawe'sx Jesusa's na'jĩnatx p̄jx:

—Txã'wē kim yuhwa ājanimeesa's kwe'sxtxi
mkaavxya'ja' j̄ite', ³⁹ Jesus pasçxa':

—Nasa ewmeesa ĩsxiisawe'sxa' kim yuhwa
ājanimeesa'stxi kaavxya'ja'khaja'. Nawa
txã'wē yūmée Dvus yuwe pta'sxsa Jonas
fxi'zeniçxáana ya'pta'sxina. ⁴⁰ Jonaswa ma'wēga
wedx tutxhte tekhn en tekhn kus u'pu', txã'wēy
Dvus Nçxi'k Nasa Yuusaawa tekhn en tekhn kus
kiwe dxiiga ũsuna. ⁴¹ Dvus kastigāywa'j en
āhte', Niniwe çxhabetewe'sxa' naa ensuwe'sxtxi'
ewmeete nvxiitutxna, txãa pa'gatey Jonas
Dvus yuwe's pta'sxiçpkaçxa', Niniwetewe'sxa'
pkaltxi nvxihtçxa wa'lmée Dvus tasxte utxaatx.
Aça' ayte' Jonas na'wēsaçxáamée jxthaakwesa
ūsa', nawa txãa yu'sa' wa'lu'tx. ⁴² Txã'wēy Dvus
kastigāywa'j en āhte', jxu'j kiwete jxkaahsa
u'ya' naa ensuwe'sxtxi' ewmeete nvxiituna, txãa
pa'gatey txã'wē jxu'j kiwejuwa txãa u'ya' yuwe'k
Salomon pta'sxniçxá'swa wa'lmée wēse'jya'.
Aça' ayte' Salomonte jxthaakwesa ũsa', nawa
txãa yu'sa' wa'lu'tx.

Eçxa' nasa ũuste ki' sxawedni

(Lk 11.24-26)

⁴³ Eçxa' nasa ũusuh kasehçxa kiwe uhdxsu
pekūhna u'juçxawa u'pwa'j uymeeçxa':

⁴⁴ Sxawedu'nja kasehth txãa yatnay sūju'k.
Txajũ' sxawedna pa'jçxa', txãa piçthē'ja's

uyuuna yata's ma'wě ew pheu'jçxa padçxa txaahni ũs yuukx txã'wě. ⁴⁵ Txajũ' u'jçxa vxite siete eçx txãate jxthaakwe ewmeesatx jxũna pa'jçxa txãa piçthê'j ũuste jxuka khêjetxna, aça' txãa piçthê'ja' iiméh jxthaakwe ewmeesa yuuna. Txã'wě yuuya'j en pa'jana naa nasa ewmeesatxi' jĭk.

*Jesus nĭ'j vxite' txajx nyakhwe'sx
(Mr 3.31-35; Lk 8.19-21)*

⁴⁶ Jesus txã'wě nasatx we'wena ũsiyna, nĭ'j vxite' nyakhwe'sx txãa yakh we'weya' pa'jçxa ekate ũsu'tx. ⁴⁷ Aça' kxte ũssa teeçxsa' Jesusa's pta'sxku:

—Iidx mama iidx nyakhwe'sx idx yakh puutx we'weya' pa'jçxa ay ekate ũsta' jĭte', ⁴⁸ Jesusa' na'wěk we'we pta'sxsa's:

—Adx mama adx nyakhwe'sxa' kimtewa ji-imeewá'kwe jĭçxa', ⁴⁹ txãa yakh u'jusawe'sxtxi kuseju vxijxaçxa:

—Naawe'sxçxáa adx mama, adx nyakhwe'sxta'. ⁵⁰ Txãa pa'gatey maawa adx Tata cielute ũsa' txajx jxthãasni's kxtey yuusaaxáa txã'wě adx nyakh, adx npe'sx, adx mama na'wēsata' jĭk.

13

*Skuutxh uuhsa's kaaja'da'jni
(Mr 4.1-9; Lk 8.4-8)*

¹ Txãa enteyiçxáa Jesusa' yatuh kasehçxa ĭkhwala pukate ũsya'k u'j. ² Aça' txajx ũsnite wala nasa pkhaakhete', Jesusa' barkotek khêe.

Aça' nasa yu' ìkh pukatee neeyũutx. ³ Txajũk wala kaapiya'j ejemplo kaaja'da'jçxa na'jina:

—Skuutxh uuhsa' ujxa' kasejk. ⁴ Aça' uhna u'jweçte', msuuí yu' dxi'jsutx ũsxi skuutxh fxiwa'. Aça' vxiçxakwe pa'jçxa skuutxh fxiwtxi ũ'tx. ⁵ Vxite ahsu' kwet kajkwesutx ũsxi, kiwe wejkuẽçxáa ji'phsu. Aça' kxsũ ũsxisa' wala dud buçxatx kiwe walameene'ta ya'fxihb txáa pa'ga. ⁶ Nawa sek açxaate' jxuka uhdxtxi, iwehçeya' ãjameene'ta naa pa'ga. ⁷ Vxite skuutxh fxiwa' çhũçh ksxavxysutx ũsxi, aç'a' çhũçh khuẽ'y walaaçxa', skuutxha's aphçxa ivxiitutx. ⁸ Nawa vxite ahsu' kiwe wala ewsu ũsxitx, sa' wala yũntxi. Maa tasxíi yu' cien, vxite' sesenta, vxite' treinta nxinx txã'wẽtx çut. ⁹ Na'wẽ pta'sxni's jiyuwa'jsa ũsçxa', jiyune'kwe jìk.

Kìh yũupa'ga ejemplo yakhçxáa kaaja'da'jçxa pta'sxni

(Mr 4.10-12; Lk 8.9-10)

¹⁰ Txajũ' txáa yakh u'jusawe'sxa' Jesus tasxte utxaaçxa na'wẽtx pẽjx:

—¿Kìjxa'ga ejemplo kaaja'da'jçxaçxáa nasatx pta'sxi'? jìte', ¹¹ na'wẽk pas Jesusa':

—Dxus jxkaahni ensu ma'wẽ yũuwa'ja'swa kim yuhwa jiyunimeesa's i'kwe'sx yuutxi's kaajiyu'jwa'ja'. Nawa vxite yuutxi's kaajiyu'jwa'jme'. ¹² Txáa pa'gatey jiyuwa'jsa's jweeĩçxáa áate ya'kaajiyu'juna, wala jiyukahn. Nawa jiyuwa'jmeesa's ya'kaajiyu'jmeena, wejxwa le'çxkweçxáawa jiiwáa yuuna txã's yuhnawa kusa'jni yuuna. ¹³ Txáa pa'gath ejemplo kaaja'da'jçxaçxáa we'we'.

Txã'wě yuukahníi txãawe'sxa' uyçxawa,
 uysamée na'wě jiyu'çmeeta', sa' wěse'jçxawa
 wěse'jsamée na'wě nwěese'je'çmeeta'.

¹⁴ Txãawe'sx fxi'zewa'ja's Dxus yuwe pta'sxsa
 Isaias we'weni' kxtey yuuk. Txã' na'wěk we'we:
 I'kwe'sxa' wěse'jewá'kwe, nawa jiyumeene'kwe.
 Uyuwá'kwe, nawa txãana sũhmeene'kwe.

¹⁵ Txãa pa'gatey txãa nasa ũusa' jxuka
 ewmeesaçxáa yuuna pa'jni'.

Txãa pa'gatx wěse'jya' wa'lu',
 Sa' txãawe'sx yafxju uykahmén,
 Txãawe'sx thũ'wějuwa wěse'khamen,
 Yafxá' jxuka aphanita' txãawe'sx ũuste ew
 jiyukahmén.

Txãa pa'gatx adx tasxte pa'ja'çmée adx nuykatx-
 hikahn jĩ'k.

¹⁶ Nawa i'kwe'sx yakha' wala yuh weçxa
 yuja' i'kwe'sx yafxju yuu uyi'kwe, sa' i'kwe'sx
 thũ'wěju yuu wěse'ji'kwe naa pa'ga. ¹⁷ Isath
 we'we', maazkuéesawa Dxus yuwe pta'sxsa vx-
 ite' nasa ewsa nyafxiiwe'sxwa uy wěetx i'kwe'sx
 uyna ũsi'kwe txã'sna, nawa uymeeta'. Wěse'j
 wěetx i'kwe'sx wěse'jna ũsi'kwe txã'sna, nawa
 wěse'jmeeta'.

Ejemplo yakh kaapiya'jni's áate pta'sxni
(Mr 4.13-20; Lk 8.11-15)

¹⁸ Açxha' mjiyuwe skuutxh uuhsa's
 kaaja'da'jçxa pta'sxni's. ¹⁹ Naa kiwete Dxus
 jxkaahwa'ja's pta'sxni's wěse'jçxawa jiyusame',
 skuutxh fxiw dxi'jsu ũsxisáa na'wěsata': Nasa'
 Dxus yuwe's wěse'thewa, eçxthě'ja' pa'jçxa
 ũusuh kutxi'jina. ²⁰ Skuutxh fxiw kwet

kajkwesu ũsxisa' Dxus yuwe's wala weçxana jxpa'gasa na'wēsata'. ²¹ Nawa Dxus yuwe's açxamée çxhãçxha yaakxsa' çxhãçxha'çmeeta'. Txã'wē Dxus yuwe's jxpa'gapa'ga, pkxuwa'j en pa'theçxáa jxuka fxĩykaja'tx. ²² Skuutxh fxiw çhũçh ksxavxysu ũsxisa' Dxus yuwe's wēse'jçxawa naa kiwetewe'sxçxá's wejx wala yajkxna ji'phunisaçxá's pa'pçxusa na'wēsata'. Aça' txã'wēsaçxá's wejx wala yajkxte', txãaçxáa jxuka knayu'k Dxus yuwe yu'sa' kapeçxkana'jna. ²³ Nawa skuutxh fxiw kiwe ewte ũsxisa' Dxus yuwe's wēse'jçxa kxtey yuusáa na'wēsata': Skuutxh spiigawa ma'wēga cien vxite' sesenta vxite' treinta nxinx ji'phu', txã'wēyku txãawe'sx ũuste Dxus yuwe' wala pena' jĩk.

Jxũth ewmeesa skuutxh ksxavxyte buçxasa

²⁴ Jesusa' vxite ejemplo na'wēk kaaja'da'jçxa pta'sx:

—Naa kiwete Dxus jxkaahni ente Dxus yuwe ewsaçxá's pta'sxtewa, na'wē yuuna: Teeçx mjĩisa' txajx kiwete fxiw ewsa'sku uh. ²⁵ Nawa jxukaysa dejeçpkaçxha', uuthasx namu's açesa pa'jçxa ũ'nimeesa'sku skuutxh ksxavxyte uhçxa u'j. ²⁶ Aça' skuutxh buçxaçpkaçxha', txãa ksxavxyte jxũth tasx ũ'nimeesawa vxyaak. ²⁷ Txã'wē yũute', selpisaawe'sxa' na'jĩnatx namu's pta'sxya' u'j: Idxa' fxiw ewsaçxá'sgu uh, aça' naa jxũth tasx ewmeesa' ¿ma'wē yũuçxaga buçxa? jĩte', ²⁸ namu' na'wēk pas: Maa açesa uhne'ta jĩk. Txajũ' selpisaawe'sxa' pějxtxi: ¿Txãa jxũth tasx ewmeesa's khubeya'

u'jmtha'w? jīte', ²⁹ namu' na'wēk we'we: Kuçx yuunuwe. Txã'wēme', petx skuutxh tasx yã'jçxa ya'khubeetxna. ³⁰ Manvxihtwe, peekx walaatxna, skuutxh wakawa'j en âhpkaçx. Txãa ente adxa' jxkaaja'nja mjïisatxi', aç'a' jxũth tasx ewmeesa khuē'yna jxuka khubeçxa tudutxna kabwa'j. Txã'wē yūuçxa skuutxha's adx yatte jxaawuutxna jīk.

Mostasa fxiwa's kaaja'da'jnisa

(Mr 4.30-32; Lk 13.18-19)

³¹ Jesusa' na'wēk pta'sx vxite ejemplo kaaja'da'jçxa:

—Naa kiwete Dxus jxkaajxa' takhni ena' na'wēsa': Teeçx mjïisa' mostasa fxiwa's kiwete ujk. ³² Txãa fxiwa' maa maa fxiwtewa thaakwe le'çxkuēesa'. Nawa buçxayã'jçxa', maa ũ'tasxtewa jxthaakwek walá'. Aç'a' txã'wē seena' walaate', vxiçxakwe yuhwa pa'jçxa ku'tasu yaatu'tx jīk.

Lewadura's kaaja'da'jnisa

(Lk 13.20-21)

³³ Vxite ejemplo kaaja'da'jçxa na'wēk pta'sx:

—Naa kiwete Dxus jxkaahni ena' na'wē yūuwa'jsa': Teeçx u'y panu'juççxa', tekh libra skuutxh ũ'wete lewadura's ka'dte ma'wē jxuka pēethejekx txã'wē yūuwa'jsa' jīk.

Ejemplo yakh kaapiya'jwa'ja's pta'sxni

(Mr 4.33-34)

³⁴ Jesusa' ejemplo kaaja'da'jçxa yuuçxáak pta'sxi' nasa jxukaysatx. Ejemplo kaaja'da'jmée yu', pta'sxi'çme'. ³⁵ Txã'wē yūuwa'ja's Dxus

yuwe pta'sxsa na'jĩna fxi'kh txãak kxtey yuu.
Na'wëk fxi'j:

Kim yuhtxwa kaajiyu'jnimeesa ũsyã'jtx yu' naa
kiwe's vxitiyna txã'sna pta'sxi'nja ejemplo
kaaja'da'jçxa yuuçxáa jĩnak fxi'j.

Jxũth tasx ewmeesa's ãate kaajiyu'jnisa

³⁶ Txajũ' Jesusa' nasa tasxuh txuteeçxa yat-
tek u'ka, açã' txãa yakh u'jusawe'sxa' utxaaçxa
na'wëtx pëjx:

—Jxũth tasx ewmeesa's kaaja'da'jna we'weni's
ãate mkaajiyu'j jĩte', ³⁷ Jesusa' pta'sxku:

—Fxiw ewšana uuhsa' Dxus Nçxi'k Nasa Yu-
usá'. ³⁸ Açã' uuthasx jĩnisa' naa kiwe'. Fxiw
ewsa jĩna we'we'th txãa yu' nasa Dxus jxkaah-
nite ũswa'jsatxthu txã'jĩ'. Sa' eçxthë'j nasa
yuutxi' jxũth tasx ewmeesa jĩ'th. ³⁹ Açã'
jxũth tasx ewmeesa's uuhsa yu', eçxthë'jjiçxá'.
Skuutxh wakawa'j en jĩ'th txãa yu' naa kiwe
pçuwa'ja'sthu txã'jĩ'. Açã' ũ'a's pkhakhsa',
Dxus angeleswe'sxta'. ⁴⁰ Jxũth tasx ewmeesa's
ma'wëta pkhakhçxa ipxte abu' çxhavxykahn,
txã'wëy yũuni yuuna naa kiwe pçuute'. ⁴¹ Dxus
Nçxi'k Nasa Yuusá' angeleswe'sxtxi kajana
txã'wë ewmëe yũuna vxitetx pkalte kweete'jna
ũssawe'sxtxi txajx jxkaahna ũsnijũ kutxi'jçxa
⁴² ipx walate akhkahn. Kxteea' seena' yuh pe-
beetxna ki'thtxi ksuusu'jna. ⁴³ Naapkaçxha' Dxus
jxthãasni's kxtey yuusa' sek na'wë eena' kweet-
hetxna Tata cielute jxkaahna ũsnite. I'kwe'sxa'
jiyuwa'jsa ũsçxa', jiyune'kwe.

Iméh pa'gasa's sũthçxa txahnisa

44 Naa kiwete Dxus jxkaahna ūsni ena' iiméh seena' pa'gasa's kiwe dxiite sūthçxa txaahni na'wēsa': Teeçx piçthē'jwa ma'wē txā'wē pa'gasa's uyçxa', âçxhíi yu' jxūna u'jya' âjameeçxa kxteyçxáa wejx ew sūthçxa txajakx, sa' wala weçxana u'jçxa txajx ji'phuni's jxuka txweyçxa txāa vxyuju kiwe's weyuukx mteene' ewsa's sūthçxa txah txāa kiwe's txā'wēysa'.

Perla iiméh pa'gasa's uyni

45 Naa kiwete Dxus jxkaahna ūsni ena' na'wēsa': Perla zhiçxkwesa's weysaawa ma'wē pakweçxa ⁴⁶ teeçx perla iiméh pa'gasa's uyçxa', txajx ji'phuni's jxuka txweyçxa txāa vxyuju perla's weyuukx txā'wēysa'.

Wedx ukhe yakh kaaja'da'jçxa kaapiya'jni

47 Naa kiwete Dxus jxkaahna ūsni ente' na'wē yūuwa'ja': Wedx ukhe'swa ma'wē îkhwalkhē akhte', wedx ma'wēsaxwa jxuka pkhakhekx. ⁴⁸ Aça' wedx uwesá' ukhe's tuhmete kutxi'jçxa wedxtxi txhitxhya' kaçççxa ewsa's kanastate âsxçxa', ewmeesatxi' îkhwalkhē âsxitxki ⁴⁹ txā'wēy yuutxna Dxus angeleswe'sxa' naa kiwe pçuwa'j en ähte'. Sa' txāawe'sxa' ewmeesatxi' ewsa ksxavxyuh txhitxçxa ipx walate akhetxna. ⁵⁰ Kxteea' seena' yuh pebeetxna ki'thtxi ksuusu'jna.

Nyafxíi kaapiya'jni'swa jiisa u'sesa'swa jii-sawe'sx

⁵¹ Txā'wē kaapiya'jni's Jesusa' na'jīnak pējx:
—¿I'kwe'sxa' jxuka jiyukwe' na'wē pta'sxni's? jīte', txāawe'sxa':

—Jiyuíitha'w jĩnatx pas.

⁵² Aça' Jesusa' na'wěk we'we:

—Dxus jxkaahwa'j ena's jiyusa' ley kaapiya'jsawa ma'wě nyafxíi kaapiya'jni's piyaçxa kaapiya'jni u'sesa'swa jxpa'gaçxa wala jiisa yuukx txã'wěy e'z jwed jiisa yuutxna jĩk.

Jesusa' Nasaretna u'jni

(Mr 6.1-6; Lk 4.16-30)

⁵³ Naa ejemplotx Jesusa' pta'sxna jxã'jçxa', txajũ u'kh txajx kiwen. ⁵⁴ Kxteea' judiuwe'sx pkhaakhenitek kaapiya'jna ũsu'. Aça' nasa' kuh yajkxna na'jĩ'tx:

—Naa piçthē'ja' ¿mteeki'k txakwe wala piya txã'wě ājaya'? ¿Ma'wě yũuçxaga txã'wě kim yuhwa ājanimeesa's kaavxya'ja'ja'? ⁵⁵ Naafi ¿karpintero nçxi'k meená', aça' njĩ'ja' Maria meená'? Aça' txajx nyakhwe'sxa' Jakobo, Jose, Simon, vxite' Judas txãawe'sxta', ⁵⁶ aça' tx-ajx npe'sxwe'sxwa ayte kwe'sx yakh ũsta'. ¿Majũki'k piya na'wě kĩhnawa jxuka ājawa'ja's? ⁵⁷ Txã'wě jũitx yu', txãa pa'gatx Jesus we'weni's kxtey yuumée. Nawa Jesusa' na'wěk we'we:

—Dxus yuwe pta'sxsa' peekx kiwesu vxite' peekx yattewe'sx weeçxni yuuçxáa fxi'zetxna maawa jĩçxa', ⁵⁸ kim yuhwa ājanimeesa's jwee yu' kaavxya'ja'jme', txãawe'sxa' txajx we'weni's kxtey nwēese'jmeeta' naa pa'ga.

14

Juan Bautista uuní

(Mr 6.14-29; Lk 9.7-9)

1 Txãa ensu' Herodesa' Galilea kiwetek ne'jwe'sx yu', sa' Jesus kĭjkĭhwa ew yũuni's jiyuçxa', 2 txãa yakh ũssawe'sxtxi na'wĕk we'we:

—Txãa piçthĕ'ja' Juan Bautistane' ki' ĭtxi yuu. Txãasane' txã'wĕ kim yuhwa ājanimeesa'swa kaavxya'ja'jya' āja' jĭk.

3 Herodesa' Juan Bautista's na'wĕ yũuçxaga ikh: Juana's tudçxa karcelte ktxaaja'kha, nawa Herodes nyakh Fxelipe nyu Herodias pa'gaçxáane' txã'wĕ karcelte ktxaaja'j. 4 Txãa ensu' Juan Bautista' Herodesa's we'weçxa':

—Iidx yakthĕ'j nyua's kusa'jçxa iidx nyu na'wĕ jxpe'jwa'j ji'phmeeg jĭte', 5 Herodesa' Juana's ikhe'nja sũhne'. Nawa nasa jxukaysa Juan ju'guçxaçxáane'ta ũsu', Juana' Dxus yuwe pta'sxsapa'ga. Txãa pa'gane' ũukhçxa ikhmĕe karcelteçxáa txah. 6 Nawa teeçx ente' Herodesa' txajx upxni en anxu āhte fxiesta vxitte', Herodias niisa' nasa pi'kxnisa dxi'pte wala zhiçxkwe ku'jya' kasehne'. Txãa pa'ga Herodesa' iimĕh wala weçxaçxa, 7 kĭh pĕjxtewa jxuka ũsu'nja jĭnane' puutx we'we txãa kna'sa's. 8 Txajũ' njĭ'j yu'kxpehte', txãa kna'sa' na'wĕga pĕjx Herodesa's:

—Juan Bautista dxikthea's plaatute akhçxa ũsune'ga jĭte', 9 ne'jwe'sx Herodesa' wala nxusçxawa, txã'wĕ yã'jne' kĭh pĕjxtewa ũsya' puutx we'we nasa pi'kxnisa dxi'pte, txãa pa'ga kxtey yũuya' neeyũuyã'jçxa', 10 Juan dxikthea's spĕ'thkaahne' karcelte. 11 Aça' dxikthea's plaatute akhçxa ũste', txãa kna'sa yu' njĭ'ja'sne' dukh.

¹² Txã'wẽ yũute', Juan Bautista yakh pi'kxna u'jusawe'sxa' pa'jçxa uuníi kakwe's jxũna u'jçxa pedaane'ta. Sa' u'jçxa Jesusa's pta'sxne'ta.

Cinko mil nasatx Jesus sã'jĩni

(Mr 6.30-44; Lk 9.10-17; Jn 6.1-14)

¹³ Txã'wẽ Herodesa' Juan Bautista's ikhku jĩni's Jesusa' jiyuçxa', barkote khẽeçxa u'kh teeçx ahte kim yuhwa u'pnimeesate pa'jya'. Nawa Jesus mtee pa'jya' u'thewa jiyuçxa nasa' çxhabu kasehçxa Jesus pa'jwa'the pakwena u'jtx çxidaçxáa. ¹⁴ Aça' Jesusa' barkoju kasejeççxa' uyku nasa wala kuh ũste, sa' txãawe'sxtxi peeygãhçxa nuykatxhik aç'a'satx pe'jçxa nuypa'jnisatxi'. ¹⁵ Txajũ' kusna kijaçte', txãa yakh u'jusawe'sxa' Jesus tasxte utxaaçxa na'wẽtx we'we:

—Kusuçyã'ja', naapkaçxha' aysu' kim yuhwa u'pnimeesa'. Aça' nasatxi' mkaah çxhabu pa'jçxa kĩhçxáawa weyçxa ũ'kahn jĩte', ¹⁶ Jesusa' na'wẽk pas:

—Txãawe'sxa' ũ' weyya' u'jwa'j peejxmeena. I'kwe'sx mpuuçwe jĩte', ¹⁷ na'wẽtx pas:

—Kwe'sxa' kĩhwa wala yu' ji'phmeetha'w. Tahç pan e'z wedxçxáa ji'phtha'w jĩte', ¹⁸ Jesusa':

—Txãatxi' mneejxũhwe jĩnak jxkaah.

¹⁹ Txajũ' nasatx kaçxkaakh txaksũ. Sa' tahç pan e'z wedxtxi jxpa'gaçxa, cielute pagayçxa Dxusa's weçxaçxa pantxi pe'lteдек. Txã'wẽ yũuçxak txãa yakh u'jusawe'sxtxi ũs, aç'a' txãawe'sxa' ũsu'stxi nasatx. ²⁰ Aça' jxukaysa ũ'çxa txikte', doce kanastate utatx kijxasaatx

pkhakh. ²¹ Ũ'sawe'sxa' cinko mil piçthê'jtx yu', u'ywe'sx vxite' luuçxwe'sxtxi yu'.

Īkh kajkwegā Jesus u'juni
(Mr 6.45-52; Jn 6.16-21)

²² Txajũ' Jesusa' txāa yakh u'jusawe'sxtxi barkote yaçte kaakh, sa' txāa yu' kxtee neeyũuk nasa txuteena u'jsatx weçxana. ²³ Txajũ' nasa jxuka txuteena u'the', thã'j vxiçna u'kh txāaçxāa Dxus yakh puutx we'weya'. Jxuka çxhi'dxni yã'thewa, Jesusa' kxtee nee ũsíçxāak yu'. ²⁴ Naapkaçxha' barko' ĩkh pxājũy u'jweçku yu'. Aça' wejxaa wala kiiteçxa, dxi'puh sēhçxa barko's yupku. ²⁵ Aça' khikhyna sējxa'wate', Jesusa' utxaana kūjk ĩkh kajkwegā çxidaçxāa.

²⁶ Aça' ĩkh kajkwegā txā'wē yuhte uyçxa', barkote u'jsawe'sxa' ũukhna na'jĩnatx sus we'we:

—Eçxa'stha'w uy jĩte', ²⁷ Jesusa' na'wēk we'we:

—Ũukhnuwe, adxthu jĩte', ²⁸ Pedro we'weçxa' na'jĩk:

—Adxthu jĩ'g na' txāa dxihçxa', adxwa txā'wēy ĩkh kajkwesu çxidaçxāa yujxa' ājakahn mkaah jĩte', ²⁹ Jesusa':

—Txā'wēçxa' myuh jĩnak we'we.

Aça' Pedro' barkojũ sa'jçxa, Jesus tasxte pa'j u'jya' u'jweçku yu' ĩkh kajkwesu. ³⁰ Nawa wejxa seena' çxhãçxha ũste', ũukhku. Sa' txā'wē ũukhpa'gaçxāa ĩkh dxiikhē khējeççxa', susku we'we:

—Meen nwe'we jĩçpkaçxha', ³¹ Jesusa' pu'kisçxa na'jĩk:

—¿Kĩjxa'ga Dxusa's yu' yajkxmée, ũukhwa'jçxá's yajkx? jĩçxa', ³² Jesusa' barkote

Pedro yakh khêjeçpkaçxa', wejxaa wala' jxuka yujuk. ³³ Aça' barkote ùssa' Jesus tasxte peejxūkweçxa na'wêtx we'we:

—Isa, idxa' Dxus Nçxi'k yuh yu'ga jĩtx.

Genesarettewe'sxtxi Jesus nuykatxhini
(Mr 6.53-56)

³⁴ İkhuy ktejkaçxa', Genesaret kiwete pa'jtx. ³⁵ Aça' kxsũ nasa' Jesus pa'jni's jiyuçxa txãa kiwesu nasatx jxuka pta'sxte', nasa' aça'satx jxuka Jesus tasxte nuypa'jtx, ³⁶ na'jĩna pxthaa we'wena:

—İidx atxh vxiçteçxáawa makhya'dxi'j jĩçxa, txã'wê jxa'dxsa' jxuka katxhiçxatx neeyũ'.

15

Nasa's ewmée vxit-sa
(Mr 7.1-23)

¹ Fxariseowe'sx vxite' ley kaapiya'jsa txãawe'sxa' Jerusalem çxhabu pa'jçxa', maaii yu' na'jĩnatx Jesus tasxte utxáa:

² —İdx yakh u'jusawe'sxa' ¿kĩh yũuçxata yaçgawe'sx kaapiya'jnitxi' kxtey yu'çmée, txã'wê kusekhê yu' kaahmée ù'wé'?

³ Txã'jĩte', Jesuswa pêjxku na'jĩna:

—İ'kwe'sxwa ¿kĩh yũuçxakwe i'kwe'sx yaçgawe'sx kaapiya'jniçxá's nwēese'jçxa' Dxus jxkaahni yu'sa' kxtey yu'çmée? ⁴ Dxusa' na'wêk jxkaaja': İidx tata iidx mama txãawe'sxtxi' peeygãhna pu'çxwa'ja'. Aça' txã'wê yũumée neywe'sxtxi açewe'wesa' uu ena's ji'phuna jĩ'k. ⁵ Nawa i'kwe'sxa' yaçga kaapiya'jniçxá's nwēese'jçxa Dxus jxkaahni

yu'sa' kxtey yuumée ũsi'kwe. ⁶ I'kwe'sx yaçgawe'sxa' na'wêtx kaapiya'ja': Maa nasawa neywe'sxtxi peeygâhna pu'çxmée, adx ji'phuni i'kwe'sxtxi pu'çxwa'ja's Dxusna dukhe'nja jîna we'weçxaçxáa, neywe'sxtxi' pu'çxmeetewa ewa' jî'tx. ⁷ Yuwejuçxáa ew we'weçxa', ũuste yu' ewmeeçxáa yaakxsai'kwe, aça' Dxus yuwe pta'sxsa Isaiasa' isa yuh Dxus we'weni's na'jîna fxi'jne':

⁸ Naa nasa' yuweju yu' adxa's yaaki'tha'w jîçxawa, ũusuh yu' adxa's yaaki'çmeeta'.

⁹ Naa kiwete nasaa kaapiya'jniçxá's kxtey yuuna ũsçxa, txã'wê Dxus jxkaahni'stha'w kxtey yu' jîte', kxul yuhna jî'k.

¹⁰ Txajũ' nasatx pa'yaçxa na'wêk we'we Jesusa': —Jiyuya' mwêese'jwe. ¹¹ Kîh ũ'wa tutxhteçxáa khêesa yu', nasatx ewmeesa vxitu'çme', naasáa ũusuh ewmée yaakxnisa yuuçxáak nasatx ewmeesa vxitu'.

¹² Txajũ' Jesus yakh u'jusawe'sxa' utxaaçxa na'wêtx we'we:

—Idx txã'wê we'wete', fxariseowe'sxa' ũusaçxanatx neeyũu jîte', ¹³ Jesus paçxa':

—Kîh tasxwa adx Tata cielute ũssa uuhnísamée yu'sa' khubeni yuuwa'ja'. ¹⁴ Aça' ũukhnuwe. Txãawe'sxa' yafx ji'phmeesa, yafx ji'phmeesa nwe'sxtxi pe'jna u'jusaçxáata'. Txã'wê yafx ji'phmeesa yafx ji'phmeesa nwe'sxtxi pe'jna u'juçxa', e'zîi kafxkhê khêjetxna.

¹⁵ Txã'jîte', Pedro' Jesusa's na'jînak pějx:

—Ejemplo kaaja'da'jçxa we'weni's äate mpeeta'sx jîte', ¹⁶ Jesusa' na'jînak we'we:

—¿I'kwe'sxwa jiyu'çmeewá'kwe? ¹⁷ Kîh ũ'wa tutxhkhêçxáak u'jwe', sa' txajũ ki' kaseje'k. ¹⁸ Nawa ũusuh yaakxnisa yuuçxáak nasa's ewmeesa vxitu'. ¹⁹ Txãa pa'gatey ũusujk kaseje' ewmée yaakxnisa, nasatx ikh wēenisa, ptamçxawa vxitesa yakh fxi'zeni, ma'wēsa yakhwa pkal yuuna fxi'zeni, pesweeni, ĩsxiina ewmée nuywe'weni, Dxusna açewe'weni. ²⁰ Txã'wē yaakxnisatx nasa's ewmeesa vxitu'. Nawa kusekhē yu' kaahmée ũ'nisaçxáa yu', nasatx ewmée vxitu'çme'.

Teeçx u'y judiu ji'jmeesa Jesusa's jxpa'gasa
(Mr 7.24-30)

²¹ Jesusa' txajũ kasehçxa u'kh Tiro vxite' Sidon kiwen. ²² Aça' teeçx u'y Kanaanuwe'sx txãa kiwete pa'jçxa u'psa' Jesus tasxte pa'kh pxthaa we'wena:

—Davxid ji'j, ũ'kwe's meen peeygāh. Ũ'kwe niisa's eçx iiyamute', iiméh wala pxthaa yuuna ũsa' jítewa, ²³ Jesusa' ma'wēçxáa yuhwa pasme'. Aça' Jesus yakh u'jusawe'sxa' Jesusa's we'wetx na'jīna:

—Kwe'sx e'ste kuçx susna yuukahmen yatna mkaah jíte', ²⁴ Jesusa' na'jīnak pas:

—Piisxakuē na'wē vxituna ũssa Israelwe'sxçxáatxku pakweya' kaah Dxusa' jítewa, ²⁵ txãa u'ya' sxuuna' yuumée utxaana kühçxa txajx tasxte peejxūkwek:

—Ũ'kwe's meen pu'çx jīna. ²⁶ Aça' Jesusa' na'jīnak we'we:

—Luuçx ũ'wa'ja's kusa'jçxa alkutx ũswa'jme' ²⁷ jítewa, txãa u'y pasçxa':

—Isa yuh we'we'g. Nawa alku' pejka ũ'we'tx mesa tasxsu pan pe'la ũsxisaçxáatxwa jíte',
²⁸ Jesus we'weçxa':

—Dxusa' pu'çxyujuna sũhwa'j yuuçxá's i'kwe yaaki', txãa pa'ga i'kwe pẽyni' kxtey yuuna jĩçpkaçxha', txãa dudtey txãa u'y niisa' katxhinik neeyũu.

Maazkuẽe aç'a'satxwa Jesus nuykatxhini

²⁹ Jesusa' txajũ kasehçxa Galilea ìkh puka-suk u'j. Sa' thã'j vxĩçtek tejka. ³⁰ Aç'a' nasa wala pa'jtx txajx tasxte aç'a'satx pe'jçxa, legsa, uyya' ājasamée, we'weya' ājasamée, ēseya' ājasameetx. Aç'a' txã'wẽ wala kuh aç'a'satx Jesus tasxte nuypa'the', txã' nuykatxhik. ³¹ Txã'wẽ we'weya' ājasameewa we'weya' ājatx, aç'a' ēseya' ājasameewa katxhitx, aç'a' legsawa ew u'jya' ājatx, naapkaçxha' uyya' ājasameewa uyya' ājatx. Aç'a' nasa' wala kuh yajkxna Is-raelwe'sx Dxusa's wala weçxatx.

Kuatro mil nasatx Jesus sã'jĩni

(Mr 8.1-10)

³² Txajũ' Jesusa' txãa yakh u'jusawe'sxtxi pa'yaçxa na'wẽk we'we:

—Naa nasa' ayte adx yakh tekh en yã'j ũsta', sa' kĩh yuhwa ũ'wa'j ji'phmeeta', txãa pa'gath peeygãja', sa' puuçmée yu' kaahme'nja. Txã'wẽme' dxi'the u'jya' çxhãçxhameetxna jíte',
³³ na'wẽtx pas:

—Nawa çkĩhte txakwe wala ũ' uyuukxtha'w nasa txãazkuẽesa ũ'wa'j? Ayte' kim yuhwa u'p kiweme' aç'a' jíte', ³⁴ Jesusa' pẽjxku:

—I'kwe'sxa' ¿maz pan ji'phkwe? jīte',
txāawe'sx pasçxa':

—Siete pan, wedx kuhmeekuēçxáa ji'ptha'w
jīnatx pas.

³⁵ Aça' nasatxi' kiwesu kaçxkaahçxa', ³⁶ siete
pan vxite' wedxtxi jxpa'gana'wa Dxusa's
weçxak. Txā'wē yūuçxak pe'ltedeçxa txāa
yakh u'jusawe'sxtxi ūs, aça' txāawe'sxa' nasatx
ūsu'stxi. ³⁷ Jxukaysa ū'çxa txikte', kijxaasa's
pkhakhtxi, aça' siete kanastate utak neeyūu.

³⁸ Ū'sawe'sxa' kuarto mil āhtx yu', nawa u'y
vxite' luuçx txāawe'sx yuutxi' isaniméek kxaz
yu'. ³⁹ Txā'wē yūuçxa Jesusa' nasatx kaahçxa',
txāa yu' barkote khēeçxa Magdala kiwenku u'j.

16

*Fxariseo vxite' saduceowe'sx cieluju
kīhçxáawa kaavxya'ja'khaahni*

(Mr 8.11-13; Lk 12.54-56)

¹ Fxariseowe'sx vxite' saduceowe'sxwa
pa'jçxa', Jesus ewmée yūutewa kpajkxya' sūhçxa
pējxtxi:

—Cieluju kīhçxáawa mkaavxya'ja'j jīna.

² Nawa Jesus pasçxa' na'jīk:

—Kusna sek khējeçte', kuskusa' sekuuna,
ew kusuça' jī'i'kwe. ³ Sa' kusíi we'weçxa',
āçxha' en ewmée yuuna, tāaphçxáa ūsa'
jī'i'kwe. Yuwejuçxáa ew we'weçxa',
ūuste yu' ewmeeçxáa yaakxsa, en ma'wē
yūuwa'ja'swa jiyu'i'kwe i'kwe'sxa'. Nawa
naa ensu na'wē seena'sa vxyaça' txāa yu'sa'
jiyuya' āja'çmeei'kwe kīh yūuya' txā'wē

yũuçtewa. ⁴ Naa nasa ewmeesa' cieluju seena'sa's kaavxya'ja'j jxthãasu'tx. Nawa peena yu' kaavxya'ja'jmeete ewna, naasáa Jonasa' ma'wēga yuu txã'sçxáana ya'pta'sxina jĩna we'weçxaçxáa nvxihtçxa u'kh.

Fxariseowe'sx kaapiya'jni's lewadura yakh kaaja'dajni

(Mr 8.14-21)

⁵ Jesus yakh u'jusawe'sxa' ìkhwala kuten u'jweççxawa, peçxkanaçxa pan yu' jxũmeeta u'j. ⁶ Kxtee pa'jçxa', Jesusa' na'wēk we'we:

—Mpa'yajkxwe, fxariseo vxite' saduceowe'sx lewadura ewmeesa's jĩte', ⁷ txãawe'sxa' na'wētx puutx paapēyi':

—Pan jxũmeetha'w aça' kxahne' txã'wē we'we' jĩ'tx.

⁸ Txã'wē we'weni's Jesus jiyuçxa' na'jĩk:

—¿Maa sũhçxakwe pan ji'phmeetha'w jĩna we'wé'? Pan ji'phmeetewa, Dxusa' thēymée sã'jĩna sũhwa'j yu'sa' ji'phmeewá'kwe. ⁹ Adxa' na'wē tahç pan yakhçxáa cinko mil nasatx thēyméeth sã'jĩ aça' kijxaasa's maz kanasta pkhakhçxawa txã'sa' yaakiçmeewá'kwe. ¹⁰ Vxite ente' txã'wēy siete pan yakhçxáa kuarto mil nasatx thēymeeth sã'jĩ aça' kijxaasa's maz kanasta pkhakhçxawa yaakiçmeewá'kwe. ¹¹ I'kwe'sxa' jiyumeewá'kwe adxa' pana's we'weçxa txã'wē mpa'yajkxwe fxariseo vxite' saduceowe'sx lewadura ewmeesa's jĩ'çmeeth.

¹² Txajũ' jiyutx Jesusa' txã'wē pante ka'dnisa lewadura's we'wemée, fxariseo vxite' saduceowe'sx kaapiya'jni's we'weçxa txã'jĩni's.

*Pedro' jiyuk Jesusa' Dxus tasxu yuusaatewa
(Mr 8.27-30; Lk 9.18-21)*

¹³ Jxkaahsa Fxilipo vxitni çxhab Cesarea ja'dasu pa'jçxa', Jesusa' na'jïnak pêjx txâa yakh u'jusawe'sxtxi:

—Dxus Nçxi'k Nasa Yuusa's çkimna jïnata we'we' nasa'? jïte', ¹⁴ na'wêtx pta'sx:

—Maaii' yu' Juan Bautistana jï'tx. Vxite we'wesa' Eliasna jï'tx. Aça' vxite we'wesa' Jeremiasna meeçxa' vxite kasehne' Dxus yuwe pta'sxsa jï'tx jïna pta'sxte', ¹⁵ Jesus pêjxçxa':

—I'kwe'sxa' çkimna jï'kwe? jïte', ¹⁶ Simon Pedro' na'wêk pas:

—Idxa' Dxus îtxisa Nçxi'kgu, txajx tasxu yuusa jïte', ¹⁷ Jesusa' pasku na'jïna:

—Jonas nçxi'k Simon, idx yakha' wala weçxa yuja'. Idxa's naa kiwete piçthê'j kaajiyu'jmeeta'. Adx Tata cielute ũssa yuuk kaajiyu'j adxa' Dxus îtxisa Nçxi'ktewa. ¹⁸ Idxa' Pedro yaaseg aça' idxwa ma'wêga adxa's ew jiyu txã'wêy maawa ew jiyuwa'ja's idx yakh nvxiitu'nja. Aça' txã'wê ew jiyunijũ' eçxthê'j yuhwa knaymeena Dxus luuçxtxi'. ¹⁹ Dxus jxkaahna ũsnite pa'jwa'j dxi'ja's phadewa'ja's idxa's ũsu'nja, aça' idxa' maatxwa we'weçxa': Pkaltxi' Dxusa' peltunaïna jïte', peltunāyni yūutxna. Nawa peltunaïmeena jïte', peltunāynimée neeyūutxna jïk.

²⁰ Txajũ' Pedrowe'sxtxi neewe'wek, Jesusa' Dxus tasxu yuusa yuh yu'ga jïna maa yuhtxwa pta'sxkahn.

*Jesusa' txajx uuwa'ja's pta'sxni
(Mr 8.31-9.1; Lk 9.22-27)*

²¹ Txãa entek Jesusa' nyafxçxah pta'sx txãa yakh u'jusawe'sxtxi na'jïna:

—Jerusalenna u'jwa'j ji'pthu. Kxteea' wala pku-uuni yu'nja judiu nthê'jsawe'sx vxite' sacerdote npiiçthê'jwe'sx vxite' Dxus leya's kaapiya'jsa txãawe'sx kusete. Txãawe'sxa' ikhetxna, nawa tekh ente' ki' îtxi yu'nja jïna pta'sxte', ²² Pedro' Jesusa's fxiite pe'jna u'jçxa na'wêk yu'kxpeh:

—Idxa's txã'wê yûuwa'j yu'sa' Dxusa' jx-thãasmeewaça', ewna jïte', ²³ Jesusa' yu'thegçxa na'wêk we'we Pedro's:

—Eçxthê'j, adx tasxuh mtzutée. Idxa' suw wëenaçxáa ùsgu. Dxus jxthãasni yu'sa' kxtey yuumée, naa kiwega nasaa yaakxniçxá'sgu kxtey yuu wêje'.

²⁴ Txajû' Jesusa' txãa yakh u'jusawe'sxtxi ki' we'wek:

—Maawa adx yakh yuu wëeçxa', peekx kakwe jxthãasni's kïhnawa jxuka nvxihtçxa yuuçxáa adx yakh yujxa' ãjane'kwe, makwe pxthaa yuwa'j seena'sa ma'k yuu nawa txã'sa' ùukhmée. ²⁵ Txã'wême', naa kiwete peekx îtxi fxi'zewa'jçxá's ya'nwe'wesa', Dxus yakh fxi'zewa'j yu'sa' ivxiituna. Nawa adx yakh fxi'zepa'gaçxáa naa kiwete îtxi fxi'zeni's ya-jkxmée ivxiitusa', Dxus yakh fxi'zewa'j yu'sa' ivxiitumeena.

²⁶ Makwe naa kiwetewe'sx yu'sa' jxuka knayçxawa peekx ùus yu's ivxiitute', ¿kïhteçxá' selpiima'k? Peekx ùusa's ivxiituyã'the', ¿kimçxa' nwe'wema'k? ²⁷ Jxpa'yakxmeete', Dxus Nçxi'k Nasa Yuusa' ki' kïjana Ney eena' kweethni pxãhte txajx angeleswe'sx yakh, açá'

ma'wěçxah yūsaaçxawa teeçxa na'wěçxah jxpa'gaxna. ²⁸ Isath we'we', ayte ũssa maai' yu' nee uumey uyuune'kwe txā'wě Dxus Nçxi'k Nasa Yuusa' jxkaajxa' pa'jni's jīnak pta'sx.

17

Jesusa' zhiçxkwe yu'pthehçxa vxyaani (Mr 9.2-13; Lk 9.28-36)

¹ Seis en skhěwniite', Jesusa' pe'jna u'kh Pedro vxite' pxakhsa Jakobo Juan txāawe'sxtxi teeçx vxiç walate. ² Sa' kxtee pa'jçxa', txāawe'sx dxi'pte Jesusa' wala zhiçxkwe yu'pthehçxak vxyaa. Txajx dxi'pa' sek na'wěk eena' khi'khi', aça' txajx athni ropa' seena' zhiçxkwe çxihme yuuk. ³ Naapkaçxha' Moises vxite' Elias txāawe'sxa' Jesus yakh puutx we'wenatx vxyaa. ⁴ Txā'wě uyçxa', Jesusna na'wěk we'we Pedro':

—Ayte' kwe'sx ũswa'j wala ewa'. Aça' idx ewna jīte', tekh wa'kuē txaja'nja'w, vxite' iidx jī vxite' Moises jī vxite' Elias jī.

⁵ Txā'jīna Pedro' we'wena ũsiyna, tāaph seena' zhiçxkwe çxihmesa kühçxa aphku. Aça' txāa tāaphte na'jīnak we'weni pthūuse:

—Na' adx Nçxi'k wala wedxnisa', txāa pa'ga wala weçxana ũsthu. Txā'sa' nwēese'jna kxtey myuuwe jīni's ⁶ Pedrowe'sxa' wēse'jçxa', wala ũukhçxa kiwega pkipha wetetx. ⁷ Aça' Jesusa' txāawe'sxtxi jxa'dxçxa na'wěk we'we:

—Ūukhmée mkiitewe jīte', ⁸ kiiteçxa' Moiseswe'sxtxi' uymeeyā'tha', naasáa Jesusçxáa yā'kh ũs yu'.

9 Txajũ' thã'ju sa'jna u'jweççxa', Jesusa' na'jĩnak jxkaah:

—Kim yuhtxwa pta'sxmeene'kwe txã'wẽ uyni's, Dxus Nçxi'k Nasa Yuusáa uuçxawa ki' ĩtxi yuupkaçx jĩte', 10 Pedrowe'sxa' Jesusna na'wẽtx pẽjx:

—Dxus leya's kaapiya'jsawe'sx pta'sxçxa', Elias khuẽ'y yaçte pa'jana jĩ'tx, sa' ¿ma'wẽ yu-uwa'jsakx açki'tx txã'jĩ'? jĩte', 11 Jesusa' na'wẽk pta'sx:

—Isa, Elias khuẽ'y yuh yaçte pa'jwa'jsa yu'k, aça' isa yuh pta'sxi'ne'ta. 12 Adxa' na'jĩ'th na', Eliasa' yaçte pa'jyujk. Txã'wẽtewa nasa' jiyumeeçxa, txã'sa' kĩjkĩhwa yũutx. Aça' Dxus Nçxi'k Nasa Yuusáawa wala pkxuuní yuuna txãawe'sx kusetey jĩk. 13 Aça' Pedrowe'sxa' jiyutx Jesusa' Juan Bautistana yajkçxa we'weçtewa.

*Teeçx luuçx wẽeçxpa'jsa's Jesus nuykatxhini
(Mr 9.14-29; Lk 9.37-43)*

14 Txajũ' txãawe'sxa' sxawedna kĩaçte', nasa wala pkhaakhena ũsu'tx. Aça' teeçx piçthẽ'j Jesus tasxte peejxũkwena kũhçxa', na'wẽk pxthaa we'we:

15 —Adx nçxi'ka's meen peeygãh, wẽeçxpa'jçxa iiméh seena' pxthaa yuuna ũsa'. Maa enteya' ipxkhẽwa khẽje'k, sa' yu'khẽwa khẽje'k. 16 Aça' idx yakh u'jusawe'sx tasxte jxũna kũhtewa, nuykatxhiya' ãjameeta' jĩte', 17 Jesusa' na'jĩnak pas:

—Dxusa' pu'çxhina sũhwa'j yu'sa' ji'phmeesata' naa nasa'. ¿Bagaçxpkçaçx i'kwe'sx

yakh pu'çxna ũs ya'watka? ¿Bagaçxpkaçx
 ãjamée fxi'ze ya'wakwe? Luuçxa's ayte
 mneejxũhwe jĩte', ¹⁸ jxũna kũjuçpkaçxha',
 Jesusa' eçxa's juuna' we'weçxa kutxi'kh luuçx
 ũusu, aç'a' txãa dudtey katxhinik neeyũu.

¹⁹ Jesus yakh u'jusawe'sxa' Jesusa'sçxáa fxii
 pa'yaçxa, na'jĩnatx pějx:

—Kwe'sxa' ¿kĩh yũuçxakxtha'w eçxa's
 kutxi'jya' ãjamée? jĩte', ²⁰ Jesusa' pta'sxku:

—Dxusa' pu'çxhina sũhwa'j yuuçxá's
 yaakxpa'gamée i'kwe ãjamée. Isath we'we',
 Dxusa' pu'çxhina sũhwa'ja's mostasa fxiw na'wé
 le'çxkuêesaçxáawa ji'phwaça', naa vxiç wala's
 we'weni yakhçxáa fxiite ki'pxa' ãjane'kwe.
 Dxusa' pu'çxhina sũhwa'j yuuçxá's yajkwawaça',
 i'kwe'sx yakha' kĩh yuhwa thěysameena.
²¹ Na'wěsa eçxa' thěymée yu' kasehmeena, wala
 yũunaana Dxus yakh puutx we'wete yuuçxáa
 kasejena jĩk.

Jesusa' txajx uuwa'ja's ki' pta'sxni

(Mr 9.30-32; Lk 9.43-45)

²² Txajũ' Galilea kiwete ũçxa', Jesusa' txãa
 yakh u'jusawe'sxtxi' pta'sxku:

—Dxus Nçxi'k Nasa Yuusa's nasa ewmeesa
 kusete dukhni yuuwa'ja'. ²³ Aç'a' ikhetxna,
 nawa tekh ente' ki' ĩtxi yuuna jĩna pta'sxte',
 txãawe'sxa' wala nxustxi.

Dxuus yatpa'ga vxyu dukhni

²⁴ Jesusa' txãa yakh u'jusawe'sx yakh Kaper-
 naum çxhabte pa'the', dxuus yattewe'sx vxyuu
 pkhaksawe'sxa' Pedro's thegya' u'jçxa na'wětx
 pějx:

—I'kwe'sxtxi kaapiya'jsa' ¿dukheçmeewá' dx-uus yattewe'sx vxyu's? jíte', ²⁵ Pedro we'weçxa':

—Dukhe'íik jīnak pas. Sa' Pedro' Jesus ūsni yatte kūjuçpkaçxha', Jesusa' na'jīnak we'we:

—Simon, idxa' ¿maa sūju'ga? Naa kiwete jxkaahsawe'sxa' vxyu kaapkhakhe'jçxa', ¿kimtxi pēywa'ja' jī'ta? ¿Jxkaahsa ji'jwe'sxwa dukhe'ta', meeçxa' txāa ji'jmée ekajuwe'sxçxāa wá'nta dukhe'? jíte', ²⁶ Pedro' na'wēk pas:

—Ekajuwe'sxçxáatx dukhe' jīk. Aça' Jesusa' na'wēk we'we:

—Txā'wēyā'the', jxkaahsa ji'jwe'sxa' dukhwa'jsameeta'. ²⁷ Nawa kim yuhtxwa kaaūusçxa'jya'mée idxa' u'jçxa íkhwálate wedx yūhza's akhene'ga, sa' nyafxte wedx kāasa's kaawayi'jçxa uyuune'ga teeçx vxyu ji'phna. Txāa yakh dukhene'ga adx pa'gate vxite' iidx pa'gate yā'jçxa jīk.

18

*Kim wejx jxthaakwe jxtuhthesakx
(Mr 9.33-37; Lk 9.46-48)*

¹ Txāa ensu' Jesus yakh u'jusa docesawe'sxa' txajx tasxte utxaaçxa na'wētx pējx:

—Naa kiwete Dxus jxkaajxa' kīi ente' ¿maa wejx jxthaakwe walasakxtha'w? jíte', ² Jesusa' teeçx luuçxkuē's pa'yaçxa txāawe'sx ksxavxyte txahçxa ³ na'wēk we'we:

—Isath we'we', i'kwe'sxa' iiwejçx yaakxni's nvxihtçxa naa luuçx na'wē yuumeçxa yu', Dxus jxkaahna ūsnite u'kaya' ājameene'kwe.

⁴ Txā'wē kīhtewa āhmeekwesa naa luuçx na'wē

yuusa yuuxáa, Dxus jxkaahna ũsnite' maatewa jxthaakwe walasa yuuna. ⁵ Maa nasawa adxna jxpa'gaççxa ma'wē weçxana jxpa'gatx txã'wēy weçxana naa luuçxkuē na'wēsatsx jxpa'gana txã' adxna jxpa'gasa yuuna.

Pkalte kweete'jya'mée jxpa'yakxwa'ja'
(Mr 9.42-48; Lk 17.1-2)

⁶ Adxna jxpa'gasa āhmeekwesatsx maawa pkalte kweete'jsa's txhikhte skuutxh ũ'khni kweta's tudçxa ĩkh wala dxiiikhē akhwaççxáa, wejx ewna. ⁷ Naa kiwete ewmeesa' bagaçxtewa nes yuutxna. Nawa naa kiwete ewmeesa yakha' seena' yuh ũukhũukha'. Sa' maawa txã'wē pkalte kweete'jena txāa yu' weh yuhwa iyumeena.

⁸ Txāa pa'ga iidx kuse ma'k yuu meeçxa' iidx çxida ma'k yuu nawa txã'wē pkalte kweete'jpçxāh yuuçte', txã'sa' spē'thçxa mwāatah. Txã'wē pçuwa'jmée ipx walate e'z kuse e'z çxida ji'ph akhni yuu na'wē', wejxwa pçumée ĩtxi fxi'zewa'the çxida ji'phmée legkuēçxáawa kxtee u'kani wejx ewa'. ⁹ Iidx yafx txã'wē pkalte kweete'jpçxāh yuuçte', kutxi'jçxa mwāatah. Infxierno ipxte e'z yafx ji'ph ũs na'wē', wejxwa pçumée ĩtxi fxi'zewa'the teeçx yafx yakhçxáawa u'kani wejx ewa'.

Piisxáa vxitusa yakh kaaja'da'jni
(Lk 15.3-7)

¹⁰ Naawe'sx āhmeekwesa maa yuhtxwa açenuwe. Na'jĩ'th na': naawe'stxxi pi'kxna u'jusa angeleswe'sxa' cielute adx Tata tasxte

nes yuusaata'. ¹¹ Txã'wēme', Dxus Nçxi'k Nasa Yuusa' vxitusatx nwe'weya'k kîh.

¹² I'kwe'sxwaççxáawa çna'wē yūumeema'kwe? Cien piisxáa ji'phçxa', teeçxa' vxitute', nowenta y nwewesatx vxiçsū nvxihtçxa piisxáa vxitusa's pakweya' çu'jmeema'kwe? ¹³ Sa' uyçxa', vxite vxitusamée nowenta y nwewesate jxthaakwe peeygâhna weçxaane'kwe. ¹⁴ Txã'wēy i'kwe'sx Tata cielute ūsawa teeçxçxáa yuhwa vxitu jxthãasu'çme' naawe'sx âhmeekwesatewa.

Peekx yakthê'ja's maz us peltunãywa'j yuukx (Lk 17.3)

¹⁵ Iidx yakthê'j idxa's ewmée yūute', txã'sçxáan pa'yaçxa mkaajiyu'j ewmée yūuni's. Iidx we'weni's nwēese'jewáana açá' iidx yakthê'j yakh kxtee yuwe ewuune'ga. ¹⁶ Nawa nwēese'jmeewáana açá' testigo teeçx meeçxa' e'z txahçxa txãawe'sx dxi'pte we'wene'ga, kxah txãa e'z testigosa' jiyutxna iidx yuwe ewuuya' pa'pçxuni's. ¹⁷ Txãa e'z testigo dxi'pte nwēese'jmeete', dxuus yatte jxkaahsawe'sxtxi mpeeta'sx. Açá' txãawe'sxtxiwa nwēese'jmeeçxa', yakthê'j na'wémée Dxusna jimeesa na'wēçxáa nvxiitni yuuna.

¹⁸ Isath we'we': I'kwe'sxa' yuwetxi's naa kiwete pheu'the', cielutewa Dxus dxi'pte pheu'jni yu-utxna. Nawa i'kwe'sxa' yuwetxi's pheu'jmeete', cielutewa Dxus dxi'pte pheu'jnimée yuutxna.

¹⁹ Na'jĩ'th na': I'kwe'sx kîh yūune'jçxawa e'zsaççxáawa txã'wē yuute ewna jîna puutx

we'weçxa, Dxusa's pi'kine'kwe ma'wẽ yuuwa'ja'swa aça' adx Tata cielute ùssa' kxtey yuuna. ²⁰ Txãa pa'gatey e'z ma'tx yuu meeçxa' tekh ma'tx yuu nawa adxa's yajxna pkhaakheçxa ùste', adxa' txãawe'sx ksxavxyte ùswa'jsath jĩk.

²¹ Txajũ' Pedro' Jesus tasxte utxaaçxa', na'jĩnak pẽjx:

—Yakhthẽ'j adxa's ewmée yũusa's ¿maz us peltunãywa'j yuukx, meeçxa' sietepkaçxçxáa ewmanx? jĩte', ²² Jesusa' na'wẽk pta'sx:

—Sietepkaçxçxáa ewna jĩya'wameeth. Siete-saçxaçxáa setenta ãhpkaçx peltunãywa'ja' jĩk.

Selpisáa peltunãyya' wa'lsa yakh kaaja'da'jni

²³ Txãa pa'gatey Dvus jxkaahwa'j en ãhte', na'wẽ yuuna: Teeçx jxkaahsa' txã'sna selpisaawe'sx yuultxi pẽyiçku yu'. ²⁴ Yuulsatx teeçxsa na'wẽçxah pẽjxna u'jweçpkaçxha', teeçx jxũna kũhtx iiméh seena' wala yuulsana. ²⁵ Txãa selpisa' kĩh yakh yuhwa dewewa'j ji'phmeek yu'. Aça' patrona' txãa yuulsa's txweykaakh txajx nyu, txajx luuçx, txajx ji'phuni yã'jçxa jxuka txãa yuula's dewewa'j. ²⁶ Txajũ' selpisa' patron tasxte peejxũkweçxa pxthaa we'wek: Adxa's meen peeygãh. Txãa yuula's jxuka dukhe'nja jĩte', ²⁷ patrona' peeygãhna yuula's peltunãyçxa ewte nvxihtku. ²⁸ Nawa txãa peltunãynisa' kasehna u'jçxa', vxite selpisáa txã'sna walameekuẽ yuulsa'sku uy, sa' txhikhte uweçxa ikheçku yu': Adxna yuulgu txã'sna mdukh jĩna. ²⁹ Txajũ' txãa yuulusa' peejxũkweçxa na'jĩnak pxthaa we'we: Adxa's

meen peeygāh, jxuka dukhe'nja jītewa, ³⁰ kxtey yuumée wejxwa karcelna jxūna u'jçxa kxtee txajk txāa yuula's dukhpkaçx. ³¹ Txā'wē yuuçte vxite selpisaawe'sx uyçxa', wala nxustxi. Sa' u'jçxa pta'sxtxi txā'wē ewmée yūusāa patrona's. ³² Aça' patrona' ewmée yūusa's pa'yaçxa na'wēk we'we: Selpisāa peethāhwe, adxa' iidx yuula's jxuka peltunāythu, pxthaag we'we txāa pa'ga. ³³ Aça' idxwa txā'wēy idxna yuulusa's peeygāhna peltunāywa'j ji'phgu, adxwa ma'wētka peeygāh idxa's txā'wēy jīçxa', ³⁴ txāa patrona' wala ūusaçxaçxa, kastigāykaakh yuula's jxuka dukhpkaçx.

³⁵ Txā'jīçxa', Jesusa' na'wēk pta'sx:

—Teeçxsa na'wēçxah ūusuh jxuka peltunaimeewá'kwe i'kwe'sx yakhthē'jwe'sxtxi, aça' adx Tata cielute ūssawa txā'wēy kastigaīna i'kwe'sxtxi' jīk.

19

Ptamsa txuteewa'jme's Jesus kaapiya'jni
(Mr 10.1-12; Lk 16.18)

¹ Txā'wē we'wena jxā'jçxa', Jesusa' Galileaju kasehna u'jçxa Judea kiwesu Jordan yu'kutetek pa'j. ² Kxte ūste', nasa wala pa'jtx, aça' nuykatx-hik āça'satx.

³ Naapkaçxha' fxariseowe'sx maaíi yu' Jesus tasxte utxaana kūhçxa na'wētx pējx, pasya' sxi-igte' ewmée vxit-ya' sūhçxa:

—Ptamsaçxawa, nyu kījkuēçxāa āhmée yūuteçxāa txāapa'ga wāatahte ¿ewmanx? jīte',
⁴ Jesusa' na'wēk pas:

—I'kwe'sxa' ¿Dxus librute iilēymeewá'kwe? Kxtee we'weçxa': Dxusa' nyafxiiitey e'zúitx ja'daçxajk vxit piçthē'j petx u'y yā'jçxa. ⁵ Txāa pa'ga piçthē'ja' peekx neywe'sx tasxu txuteeçxa peekx nyu yuuwa'jsa yakh utxaawa'jsa', txā'wē e'zçxawa teeçxsaçxáa na'wē yuuna pa'jya' jī'k Dxus librute'. ⁶ Txā'wē yūunijū', e'zmée teeçxçxáak yuuna pa'ja'. Txāa pa'ga Dxus pūpxçxa nvxiitnijū' ptamsayā'ja' txuteewa'jsameeta'.

⁷ Txā'jīte', na'wētx pējx:

—Txā'wēte', Moisesa' ¿kījxa'ga peekx nyu yakh txuteeçxa eç vxitçxa nyu's ūsçxa txuteewa'ja' jīna jxkaaja'? jīte', ⁸ Jesusa' na'wēk pas:

—I'kwe'sx txā'wē Dxus jxkaahni's nwēese'jmeeçxa nyu yakh txuteena fxi'zepa'ga íiçxáak Moisesa' txā'wē yūuwa'ja's nvxiht. Nawa txā'wē yūuwa'ja's nyafxiiitey Dxus nvxiitnisa yu'çme'. ⁹ Adxa' na'jī'th na': Nyu txā'wē vxite piçthē'j yakh pkal yuuna fxi'zesameete wáa nyu's wāatahçxa vxite u'y yakh ptamuuna na' txā'wē vxite yakh ptamuupa'ga pkal kazx yuusáa yuuna. Meeçxawa nmi' wāataanisa u'y yakh maawa ptamuuna na' txā'wē u'y wāataanisa yakh ptamuupa'ga pkal kazx yuusaaiçxáa yuuna jīte', ¹⁰ Jesus yakh u'jusawe'sxa' na'wētx we'we:

—Txā'wēte', ptamumée fxi'zeni wejx ewna jītx. ¹¹ Aça' Jesusa' na'wēk pas:

—Txā'wē yuja', nawa jxukay yu' ptamumée fxi'zeya' āja'çmeeta', naasáa kimnane' Dxusa' ptamumée fxi'zewa'ja's nvxiht txāaçxáa

ptamumée fxi'zeya' ājana, vxite' ptamumée Dxusçxáana selpiina fxi'zewa'jsata'. ¹² Na'wěsa yu' ptamumée fxi'zeya' āja'tx: Maaíi yu' ptamumée fxi'zeya' upxsatxna, aça' vxitetxi's naa kiwete piçthě'jwe'sx íiçxáatx ptamumée fxi'zewa'ja's vxitu', aça' vxite' ptam yuumée Dxusçxáana selpiina fxi'zewa'jsata'. Ptamumée fxi'zeya' ājasa', ptamumée fxi'zetxna jík.

Luuçxkuētx Jesus bedekīyni

(Mr 10.13-16; Lk 18.15-17)

¹³ Txajū' Jesus tasxte luuçxkuē nuypa'jtx, luuçx dxikthesu peekizeçxa Dxus kusete neewe'wekahn. Nawa Jesus yakh u'jusawe'sxa' ũusçxa we'wetx nuypa'jsatx. ¹⁴ Aça' Jesusa' na'wěk we'we:

—Luuçxkuē adx tasxte yuusaatxi' kuçx yup-nuwe, txāa pa'gatey cielute Dxus jxkaahna ũsnisa' naa luuçxkuēwe'sx na'wěsa jīi íiçxá'.

¹⁵ Txā'jīçxa', luuçxkuēwe'sx dxikthesu peekizeçxa Dxus kusete neewe'weçxa', txajū u'kh.

Piçtakx wala ji'phsa Jesus yakh puutx we'weni

(Mr 10.17-31; Lk 18.18-30)

¹⁶ Txāa e'su' teeçx piçtakx Jesus tasxte pa'jçxa na'wěk pějx:

—Kaapiya'jsa wala ewsa, mpeeta'sx. ¿Kīh ew yūuçxa pçumée itxi fxi'zewa'ja's ji'phuki'th? jīte', ¹⁷ Jesus paçxa':

—¿Kīh yuupa'gaga adxa's ewsa jī'? Ew yūusa' teeçx yuuçxáa ũsa' txā' Dxusa'. Aça' pçumée itxi fxi'zewa'ja's ji'phu wēeçxa', Dxus jxkaahnitxi' kxtey myuu jīte', ¹⁸ piçtakxa':

—¿Maatxna? jīna pějxte', Jesusa' pta'sxku:

—Dxusa' na'wěk jxkaaja': Nasa ikhwa'jme', ptamsayã'ja' vxite yakh pkal yuuwa'jme'. Pesweewa'jme'. Vxitetx ĩsxiina nuywe'wewa'jme'. ¹⁹ Neywe'sxtxi peeygãhna ewçxáa yũuna fxi'zewa'ja'. Peekíi ma'wēga ya'peeygãja' txã'wēy mpeeygãh vxite nasatxwa jíte', ²⁰ piçtakx paşçxa':

—Txãatxi' le'çxkuějũjx kxtey yuunath waláa, aça' ¿kĩh wejx peejna? jíte', ²¹ Jesus paşçxa':

—Dxus jxkaahnitxi' jxuka kxtey nwēese'jsa yuu wēeçxa', u'jçxa iidx ji'phunitxi' jxuka txweyçxa ji'phmeekuēsatsx mes. Sa' txã'wē yũuçxa' cielute ji'phsa yuune'ga. Txã'wē yũuçxa adx yakh myuh jíte', ²² txãa piçtakxa' txã'wē wēse'jçxa' nxusnak u'j, wala ji'phsa yu'k txãa pa'ga.

²³ Txajũ' Jesusa' na'wěk we'we txãa yakh u'jusawe'sxtxi:

—Isath we'we', ji'phsa yakha' wala yuh thēya' Dxus jxkaahna ũsnite u'kawa'j. ²⁴ Na'jĩ'th na': kamelxo txakwesa' ¿ma'wē yũz kafxga khēwya' ājakx? Aça' ji'phsa yakha' txãate jxthaakwe thēya' Dxus jxkaahna ũsnite u'kawa'j.

²⁵ Txã'jĩni's wēse'jçxa', Jesus yakh u'jusawe'sxa' wala kuh yajkxtxi, sa' txãawe'sx pwe'sx na'wētx puutx ya'paapēyi':

—Txã'wēte', ¿kimçxá' ewte neeyũuya' ājama'k? jíte', ²⁶ Jesus thegçxa' na'wěk we'we:

—Nasa' Dxus yakhmée yu', ewte neeyũuya' ājameeyuhtxna. Nawa Dxus yakh yu', kĩh yuhwa thēysa meea'.

²⁷ Txã'jíte', Pedro' na'wěk pějx:

—Kwe'sxa' idx yakh yujxa' kwe'sx ji'phuni's jxuka nvxihttha'w, sa' ¿kĩh jxpa'gaxtha'w? jĩte',
²⁸ Jesusa' na'jĩnak pta'sx:

—Isath we'we', naa kiwete pkalsa's jxuka yu'pthehçxa ewsaçxaçxáa yuuwa'j en áhte', Dxus Nçxi'k Nasa Yuusá' pa'jçxa jxkaajxa' takheçpkaçha', adx yakh yuusáa i'kwe'sx docesawa adx yakh jxkaahsa yuune'kwe Israel ji'j docesatx. ²⁹ Maawa jxukaysa txã'wẽ adx yakh yujxa'çxáa txãawe'sx yat, kiwe, nyakhwe'sx, npe'sxwe'sx, neywe'sx, nyu, nçxi'kwe'sx, niisawe'sx txãatx jxuka nvxiit-sa' txãa nvxiitnisate jxthaakwe wala jxpa'gatxna, sa' pçumée ĩtxi fxi'zewa'ja'swa jxpa'gatxna. ³⁰ Nawa jxpa'yakxmeete', makwe yaçtewe'sxçxawa, nmehtewe'sx yuutxna; naapkaçxha' nmehtewe'sx yu', yaçtewe'sx yuutxna jĩk.

20

Mjĩisa yakh kaaja'da'jçxa Jesus kaapiya'jni

¹ Dxus jxkaahni ente mjĩisa' na'wẽ yũuni yuutxna: Teeçx mjĩi namu' kusí kasehçxa mjĩisa pakweya' u'kh, uuthasxte uwa udewa'jsa. ² Sa' mjĩiwa'jsa yakh puutx we'wek teen mjĩini's áh dukhya'. Txã'wẽ yũuçxa mjĩi ehn kaakh. ³ Sa' kusí las nwewe yuuçpkaçxha', ki' kasejk, sa' vxite kĩh mjĩiwa' ji'phmée plaasasu u'jusatx uyçxa', ⁴ txãatxi' na'wẽk we'we: Me'jwe mjĩiya' adx mjĩi ehte, teen uta mjĩinite áh dukhe'nja jĩte', txãawe'sxa' u'jtx mjĩiya'. ⁵ Txajũ' mjĩi namu' ēepxãh wala ki' kasejk, sa' kusuçte

las trestewa ki' kasejk, txāatxwa txā'wēy mjīiya' kaakh. ⁶ Txajū' kusuçte las cinkote plaasasu ki' kasehçxa', vxite uyku kīh mjīiwa ji'phméé u'jusatx. Txāawe'sxtxiwa na'wēk we'we: I'kwe'sxa' ¿kīh yūuçxa mjīi ji'phméé u'jukwe teen uta? jīte', ⁷ txāawe'sxa' na'wētx pas: Kimwa mjīiya' pa'yameeta' jīte', mjīi namu' kaakh txajx mjīi ehte: U'jçxa adx mjīi ehte mjīine'kwe aç'a' adxa' wala ew dukhe'nja jīk. ⁸ Txajū' jxuka kuste', mjīi namu' pa'yak kxtee kmāaji'jsa's na'jīna: Mjīisatxi' pa'yaçxa mdukh, nawa nmeh mjīiya' pa'jsatx khuē'y nyafxte dukhçxa teen uta mjīisatxi' nmehte dukhna jxā'jane'ga jīte', ⁹ kxtey yuuk. Aç'a' kusuçte las cinkote mjīiya' pa'jsa khuē'y utxaaçxa teeçxsa na'wēçxah jxpa'gatx teen uta mjīinite āhçxaçxáa. ¹⁰ Txajū' kusīi mjīiya' pa'jsa': Kwe'sxa' jxthaakwe jxpa'ga'nja'w sūhna ūsçxawa, txakweíçxáa jxpa'gaçxa' ¹¹ ūsçxa we'wētx mjīi namu's na'jīna: ¹² Naawe'sxa' nmeh pa'jçxa naasáa teeçx ora yuuçxáatx mjīi. Nawa dukhni yu'sa' kwe'sx nakweíçxáatx jxpa'ga. Naapkaçxha' kwe'sx yu' teen utatha'w mjīi, sekte yaaçxana wantāyna jīte', ¹³ mjīi namu' na'jīnak pas: Namiku, idx yakh ewméé yūuçmeeth. Adxa' teen uta mjīini's āh dukhe'nja jīna idx yakh puutx we'wete', ewna ¿jīmeegá'? ¹⁴ Txāasa iidx mjīini's āh dukhni's jxpa'gaçxa me'. Idxna nakweth dukh txakweçxaçxáa dukheçthu nmeh mjīiya' pa'jsatxwa. ¹⁵ Nawa adx jī'sa' ma'wē yūuweçxtewa kxtey yu'nja. Meeçxa' adx ew yūuni's idxa' ¿açe'wá'ga? jīk mjīi

namu'. ¹⁶ Txã'wě yũuwa'jsata' nmehtewe'sxa' yaçtewe'sx yuutxna, naapkaçxha' yaçtewe'sxa' nmehtewe'sx yuutxna. Txãa pa'gatey pa'yanisa yu' wala kuhta', nawa txhitxhnisa yu' kuhmeeta' jĩk.

Jesusa' txajx uuwa'ja's ki' pta'sxni
(Mr 10.32-34; Lk 18.31-34)

¹⁷ Jesusa' Jerusalen dxi'the u'jweççxa', txãa yakh u'jusawe'sx docesatx fxiite pe'jna u'jçxa na'jĩnak pta'sx:

¹⁸ —I'kwe'sxa' jii i'kwe Jerusalenna u'jweçthaw. Kxteea' Dxus Nçxi'k Nasa Yuusa's uweçxa dukhni yuuna sacerdote npiičthē'j vxite' ley kaapiya'jsawe'sx kusete. Aça' txãawe'sxa' ikhwa'j vxitçxa ¹⁹ judiu ji'jmée vxite nasatx dukhetxna, txãawe'sxa' weeçxna pãpana kluuskhē ki'pçxa ikhkahn. Nawa tekh ente' ki' itxi yuuna jĩk.

Jakobowe'sx njĩ'j Jesusa's pēyni
(Mr 10.35-45)

²⁰ Txajũ' Jakobo Juan njĩ'j Zebedeo nyua' txãa e'z nçxi'ksa yakh Jesus tasxte peejxũkwena utx-aatx, txãawe'sx pēyni's Jesusa' kxtey yuukahn.

²¹ Aça' Jesusa':

—¿Kĩjke yũu jxthãasu'? jĩte', Jakobowe'sx njĩ'ja' na'wěk we'we:

—Idxa' naa kiwete jxkaajxa' kĩhçxa', ũ'kwe luuçx naa e'zsatx iidx pukakhē pdxi'p kaçxwa'ja's ũsune'ga jĩte', Jesus we'weçxa':

²² —I'kwe'sxa' jiimeeçxai'kwe txã'wě pēyi'. Adx na'wěy pxthaa yuuçxa uuwa'ja's ũukhmée jxpa'gaya' ¿ãjama'kwe i'kwe'sxa'? jĩte':

—Āja'nja'w jĩnatx pas.

²³ Aça' Jesusa' pta'sxku:

—Isa, i'kwe'sxa' adx na'wěy pxthaa yuuçxa uuwa'ja's ji'phuyujune'kwe. Nawa txã'wě adx pukakhě pdxi'p kaçxwa'j yu'sa' adx ũsu'çmeeth. Txã'sa' naasáa adx Tata yuuçxáa ũsuna kiim jii pheu'jçxa ji'phna txã'sna jĩk.

²⁴ Aça' diezsawe'sxa' ũusaçxatx Jakobowe'sx txã'wě pěyni's wěse'jçxa. ²⁵ Nawa Jesusa' pa'yaçxa na'wěk we'we:

—I'kwe'sxa' peekx jii i'kwe, naa kiwete jxkaahsa' txãawe'sx nasatx juuna'tx jxkaaja', aça' txã'wěy npiiçthě'jsawa txãawe'sx jxpe'jnisatx juuna'tx jxkaaja'. ²⁶ Nawa i'kwe'sx yu' txã'wě juuna' jxkaahwa'jsamée i'kwe, wejx yuuwa i'kwe'sxa' walasa yuu wěeçxa', vxitesa kusete selpisáa yuuwa'j ji'phi'kwe. ²⁷ Aça' i'kwe'sx maawa txã'wě vxitesatx jxkaahsa yuu wěeçxa', vxitee jxkaahni fxi'zewa'ja'. ²⁸ Txãa pa'gatey Dxus Nçxi'k Nasa Yuusáa yuhwa txã'sna selpii jxthāasya' kīhme', wejxwa nasatx nwe'wena selpiia' kīhçxak ya'dukh nxuste uuya' jĩk.

E'z piçthě'j uyya' ājasameetx Jesus nuykatx-hini

(Mr 10.46-52; Lk 18.35-43)

²⁹ Txajū' Jeriko çxhabuh kasehna u'jweçte', nasa' iimeh wala yuwe'tx Jesus e'ste. ³⁰ Txãa dxi'the e'ztxi kaçxçxa u'p yu' uyya' ājasamée. Sa' Jesus skhěwni's wěse'jçxa' sustxi we'we:

—Davxid ji'j, kwe'sxtxi meen peeygãh jïte',
³¹ nasa' ũusçxa we'wetx sxuuna' yuukahñ. Nawa
 txãawe'sxa' jweeíçxáatx sus we'we:

—Davxid ji'j, kwe'sxtxi meen peeygãh jïna.

³² Aça' Jesusa' yujuçxa txãa uyya' ájasameetxi'
 pa'yaçxa na'wêk pêjx:

—¿Kïjkwe yïu jxthãasu'? jïte', ³³ txãawe'sx
 pasçxa':

—Kwe'sx yafxtxitha'w phaade jxthãasu'
 jïte', ³⁴ Jesusa' peeygãhçxa txãawe'sx yafxsu
 jxa'dxiçpkaçxa', txãa dudtey uyya' ájaçxa Jesus
 yakh u'jtx.

21

Jesus Jerusalente u'kani

(Mr 11.1-11; Lk 19.28-40; Jn 12.12-19)

¹ Jerusalente utxaana pa'jaççxa', Betfxagé
 çxhabkuête khuê'y pa'jtx. Txãa çxhabkuê' Oli-
 wos vxiç utxagak ũsu'. Txajũ' Jesusa' txãa yakh
 u'jusawe'sx e'zsats na'jïnak kaah:

² —Ay dxi'pga çxhabkuê ũsa' kxtee me'jwe,
 sa' kxteea' uyuune'kwe buçxu luuçx njï'jsa
 tudni ũsna txã'sa' jxũkhwedeçxa jxũne'kwe.

³ Jxũna yuhte uyçxa' pêyiwáatxna aça'
 kwe'sxtxi jxpe'jsa' peejxa', nawa txaçxmeyna
 kaasxwedu'juna jïne'kwe.

⁴ Dxus yuwe pta'sxsa we'weni' kxtey yuuk.
 Txã' na'jïnak fxi'j:

⁵ Sion çxhabte nasats na'jïna pta'sxine'kwe:

Mthegwe, i'kwe'sxtxi jxkaahsa yuja',

Pxthaakwesa na'wê thegna, buçxu luuçxte
 a'jçxa,

Aça' txãa buçxu njĩ'ja' ktũ'se'jnisa' jĩna fxi'jni'.

⁶ Txajũ' txãawe'sxa' u'jçxa Jesus ma'wẽ jxkaathe', kxtey yuutx. ⁷ Sa' buçxu njĩ'ja's jxũna pa'jtx luuçx yã'jçxa. Txajũ' buçxu luuçx kastx-aja'jnimeesa's txãawe'sx atxhtxi pustxi, aça' Jesusa' txãate a'kh. ⁸ Nasa wala kuh pi'kxna u'jsawe'sx yu', txãawe'sx atxhtxi dxi'jsutx pusna u'jwe' Jesus skhẽwwa'jsu. Maai' yu' ejxa spẽ'thçxa txã'wẽytxi dxi'jsu pusna u'jwe'. ⁹ Aça' nasa' yaçte u'jsa vxite' e'ste yuusa txãawe'sx jxukaysa na'jĩnatx sus we'wena u'jwe':

—Dxus kaahnisa wala yuh jxtuhthesa yuja' jxkaahsa Davxid ji'j. Dxusa's weçxaaga wala ew yũupa'ga jĩ'tx.

¹⁰ Txajũ' Jesusa' Jerusamente u'kate', kxtee nasa jxukaysa seena' wala sustxi na'jĩna paapẽjxna:

—Na' çkimna? jĩte', ¹¹ pta'sxtxi na'jĩna:

—Naai' Dxus yuwe pta'sxsa Jesusa', Galilea kiwesu Nasaret çxhabetewe'sx jĩ'tx.

*Dxuus yatte txweysaatx Jesus kasxisxni
(Mr 11.15-19; Lk 19.45-48; Jn 2.13-22)*

¹² Txã'wẽ yũuni e'su' Jesusa' dxuus yatte u'kaçxa jxuka eka kasxisxku kxtee txweyna ki' weyna ũssatx. Sa' vxyu yu'pthehna ũsni mesa vxite' tub çxihme txweyna u'pnitxwa jxuka pũsxku. ¹³ Sa' na'wẽk we'we:

—Dxus librute' na'wẽk we'we': Adx yata' Dxus yakh puutx we'wena ũswa'jçxá' jĩ'k. Nawa i'kwe'sxa' peswée pkhaakhena ũsni kafx na'wẽçxáa vxitçxa ji'phi'kwe jĩk.

¹⁴ Kxtee dxuus yatte maai' yu' Jesus tasxte utxaatx, uyya' ajasamée, çxida legsa, aça'

txãawe'sxtxi' nuykatxhik. ¹⁵ Nawa sacer-
dote npiiçthê'jwe'sx vxite' ley kaapiya'jsawe'sx
txãawe'sxa' üusaçxatx, txã'wê kim yuhwa
ãjanimeesa's kaavxya'ja'the' kxtee dxuus yatte
üssa luuçxa' sus we'weçxa' jxkaahsa Davxid
ji'ja's wala weçxa'tha'w jina susni's wêse'jçxa.

¹⁶ Sa' Jesusa's pêjxtxi:

—Na'wê we'wena üsta' txã'sa' ¿wêse'je'ga'?
jite', Jesusa' pasku:

—Wêse'je'íith. Nawa i'kwe'sxa'
¿iilëeymeekwe'? txã'wê yüuwa'ja's Dxus librute
na'jînak we'we':

Luuçx le'çxkuê vxite' çxu'çxsawa txã'wê
zhiçxkwe tuuthe'jwa'ja'sgu vxit jî'k.

¹⁷ Txajü' Jesusa' kxtee nvxihtçxa u'kh çxhabu
kasehna sa' Betania çxhabtek pe'te.

*Higwera fxtüu tasx yünsame's Jesus
açewe'weni*

(Mr 11.12-14, 20-26)

¹⁸ Kuskuskhê' Jesusa' çxhabna ki' sxawedna
u'jweççxa', wêek. ¹⁹ Sa' dxi'j pukate higwera
fxtüu tasx üste uyçxa', thegya' utxaak. Nawa kîh
yün yuhwa uyme', eççxáak ji'ph yu'. Aça' txãa
fxtüu tasxa's na'wêk we'we:

—Åçxha' peena yu' yünmeene'ga jîçpkaçxha',
naa dudtey fxtüu tasxa' uhdxku. ²⁰ Txãa yakh
u'jusawe'sxa' txã'wê uyçxa', wala kuh yajkxna
na'wêtx pêjx Jesusa's:

—Fxtüu tasxa' ¿kîh yüuçxaga txakwe wala dud
uhdx? jite', ²¹ Jesusa' na'wêk pas:

—Isath we'we': Kuh jwed yajkxmée Dxusa'
pasyujuna sühwa'jçxá's yajkçxa', adx vxitthu

txã'wěçxáamée, na'wě yũuya'wa ãjane'kwe: Naa vxix̄ wala ayjxu u'jçxa ìkh walate tee khēe jĩne'kwe, aça' kxtey yuuna. ²² I'kwe'sxa' kĩh pějxçxawa Dxus yakh puutx we'wene'kwe Dxusa' pasuna sũhna, sa' txã'wě yũuçxa' jxpa'gane'kwe jĩk.

Dxuus yatte Jesusa' juuna' yũuni's pēyni
(Mr 11.27-33; Lk 20.1-8)

²³ Txajũ' Jesusa' dxuus yatte u'kaçxa kaapiya'jaçpkaçxha', sacerdote npiichthē'jwe'sx vxite' judiu nthē'jsawe'sx kũhçxa' na'wětx pějx:

—¿Kĩh yũupa'gaga txã'wě dxuus yatte jxuka suw? ¿Kimga jxkaah txã'wě yũuwa'ja's? jĩte', ²⁴ na'wěk pas:

—Adxwa i'kwe'sxtxi pějx ya'wath, aça' adx pēyni's pasya' ãjate', adxwa pta'sxi'nja kim jxkaathe txã'wě yũuçxawa. ²⁵ Juana's ¿kinga jxkaah yu'te bautisãykahn? ¿Dxus wá' jxkaah, meeçxa' naa kiwete piçthē'jwe'sx wáa ne'ta jxkaah? jĩte', txãawe'sx pwe'sx puutx ya'paapēyi'tx:

—Dxusne' jxkaah jĩna paste', txã'wēte' ¿mjĩitekwe nwēese'jmée? jĩna. ²⁶ Aça' naa kiwega nasa jxkaahnine' yu' jĩya'wa ãjame'nja'w. Txã'wēme', nasa jxukaysa Juan ju'guçxaçxáatx we'we', Dxus jxkaahnine' yu' jĩna txáatxtha'w ũukhu' jĩnatx puutx we'we. ²⁷ Sa' ãjameeçxa', Jesusa's na'wěçxáatx pas:

—Jiimeetha'w jĩna. Aça' Jesuswa txã'wěyçxáak pas:

—Adxwa pta'sxme'nja kim jxkaathe txã'wě yũuçxawa jĩk.

E'z nçxi'ksatx kaaja'da'jçxa kaapiya'jni

²⁸ Txajũ Jesusa' na'wëk we'we:

—I'kwe'sxa' ũus miijajkxwe, na'wë kaaja'da'jçxa pëjxya'wath: Teeçx piçthë'ja' e'z nçxi'kku ji'phu', sa' teeçxsa's na'wëk jxkaah: ãçxha' adx mjii ehte uwa uhdeya' me'j jite',
²⁹ nçxi'k pasçxa': U'j wëemeeth jičxawa, ũus yajkxna u'pçxa', mjiiya' u'kh. ³⁰ Txajũ neya' vxite nçxi'ka'swa txã'wëy jxkaakh. Aça' txã' na'wëk pas: Ewna, u'jwe'nja jičxawa u'jme'. ³¹ ãçxha' i'kwe'stxi ¿ma'wëga thegu? ¿Maasaga ney jxthãasni's kxtey yuu? jite', txãawe'sx pasçxa': Nyafxte jxkaahnisa nçxi'k jitx. Aça' Jesusa' na'wëk we'we:

—Isath we'we', gobierno jii vxyu pkhakh-sawe'sx vxite' u'ywe'sx pkal yuuna fxi'zesa txãawe'sx khuë'y Dxus jxkaahnite u'katxna, naapkaçxha' i'kwe'sxa' u'kaya' ãjamée ũsi'kwe. ³² Txãa pa'gatey Juan Bautista' kaapiya'jna pa'kh pçumée itxi fxi'zewa'ja's. Txã'wëtewa, i'kwe'sxa' jxpa'gamee'i'kwe. Naapkaçxha' gobierno jii vxyu pkhakhsawe'sx vxite' u'ywe'sx pkal yuuna fxi'zesa txã'wësa yu' jxpa'gatx. Nawa i'kwe'sxa' yafxju uyçxawa pkaltxi nvxihtçxa Dxus tasxte sxawedmee'i'kwe.

Mjüsawe'sx patron nçxi'ka's ikhni yakh kaaja'da'jni

(Mr 12.1-12; Lk 20.9-19)

³³ Vxite ejemplo na'sna mwëese'jwe: Teeçx kiwe namu' uuthasx vxitku, sa' peeku'j uphçxa teeçx ahte uwa's ku'swa'j txajk, sa' ëete tejkaçxa jxuka thegwa'j yatwa txajk. Txã'wë yũuçxa

txãa kiwe's mj̄isatx pki'jçxa jxu'j dxi'kh u'j.
³⁴ Uwa thẽ'jwa'j en ãhte', txã'sna selpisaatx
 kaakh kiwee pki'jnipa'ga pẽjxya'. ³⁵ Nawa
 kiwee pki'jsawe'sxa' txãa selpisaatx uweçxa
 maai' yuutxi' pãpana vxitetx ikhna vxitetxi'
 kwet wãatatahnatx yũu. ³⁶ Txã'wẽ yũute',
 kiwe namu' jweeíçxáak kuh kaahna ũsu'
 selpisaatx. Nawa kiwee pki'jsawe'sxa' jxukaytxi
 txã'wẽçxaçxáatx yũu.

³⁷ Txajũ' nmehte' txajx nçxi'k yuunak kaah:
 Adx nçxi'ka's kuçx txã'wẽ yũumeewáatxna
 sũhçxa. ³⁸ Nawa kiwee pki'jsawe'sxa' nçxi'ka's
 uyçxa', txãawe'sx pwe'sx na'wẽtx puutx we'we':
 Ney uute' naa txã'wẽ kiwe's iiyamuwa'jsa', açá'
 txã'sa' ikhega kiwe' kwe'sx j̄i yuukahn j̄i'tx.
³⁹ Txã'j̄iã'jçxa', uweçxa txãa kiwejũ kutxi'jçxa
 ikhtxi.

⁴⁰ Txã'wẽ pta'sxçxa', Jesusa' na'j̄inak pẽjx:

—Txã'wẽ yũute', kiwe namu pa'jçxa', ¿k̄ih
 yũukx kiwee pki'jsawe'sxtxi'? j̄ite', ⁴¹ na'wẽtx
 pas:

—Txãa ewmeesatxi' peeygãhmée ikhçxa txãa
 kiwe's vxitetx pki'jina kiwee pa'ga namu's
 wa'lmée dukhwa'jsatx j̄itx.

⁴² Açá' Jesusa' na'wẽk we'we:

—I'kwe'sxa' ¿bagaçxte yuhwa
 iilẽeymeewá'kwe Dxus librute na'j̄ina fxi'jni's?
 Yat txaahsawe'sxa': Naa kweta's selpime' j̄içxa
 wãatahtx.

Nawa txãa íik yat makwesanawa çxhãçxha
 neewewa'jsa yuuna pa'j.

Txã'wẽ neewewa'jsa yuuna pa'jwa'ja's Dxusku
 vxitçxa nvxiht.

Txãa pa'ga kwe'sx yakha' wala weçxa yuja' çjĩ'çmeena'?

⁴³ Txã'wê açepa'ga iıçxáath na'jĩ': Dxus jxkaahni's i'kwe'sxtxi kusa'jçxa vxite nasatx ũsni yuuna, kiwe namu's pki'pha'ga wa'lmée dukhkahn. ⁴⁴ Sa' maawa txãa kwet kajkwega wetesa' jxuka çxkateteena, meeçxawa txãa kwet nasa kajkwekhẽ weteçxa' jxuka ku'çxina jĩk.

⁴⁵ Aça' sacerdote npiiçthẽ'jwe'sx vxite' fxarise-owe'sxa' jiyutx txãawe'sxtxi iıçxáa we'weçxa txã'jĩni's. ⁴⁶ Sa' tud wẽeçxawa ũukhtxi, txã'wê nasa' Jesus ju'guçxaçxáatx ũs yu', Dxus yuwe pta'sxsa' jĩna txãa pa'ga.

22

Boda fxiesta yakh kaaja'da'jçxa kaapiya'jni

¹ Jesusa' vxite ejemplo kaaja'da'jçxak pta'sx na'jĩna:

² —Dxus jxkaahni ente' na'wê yũuna: Teeçx jxkaahsa' txajx nçxi'ka's kaaba'jçxa fxiesta vxitku. ³ Sa' txãa jxkaahsa' selpisaatx jxkaakh pi'kxnisatx pa'yakahn. Nawa txãawe'sxa' wa'lçxa yuwe'çmeeta'. ⁴ Txã'wêtawa, ki' jxkaakh vxite selpisaatx na'jĩna: Pi'kxnisatxi' yuukajane'kwe. Ũ'wa'ja's jxuka pheu'jniyã'j ji'pthu, tajkx kaaniisxi'jnisatx kiikhe'th, aça' myuhwe boda fxiestate jĩ'k jĩne'kwe. ⁵ Txã'wê kxtey yuutewa, pi'kxnisawe'sxa' nwẽese'jmée wejxwa txãawe'sx uuthasxsu vxite' txãawe'sx vxyu knaynisuçxáatx u'j. ⁶ Aça' vxite yu' selpisaatx uweçxa wala pãpatx ikhpkaçx.

7 Txã'wě yũute', jxkaahsa' seena' wala ũusaçxak, sa' txajx soldauwe'sxtxi kaakh txãa nasa ikhsatx ka'tuwa ikhçxa txãawe'sx çxhaba's jxuka kabkahn. 8 Txajũ' jxkaahsa' na'wěk we'we txã'sna selpisaatx: Boda fxiestate ũ'wa'j jxuka pheu'jniyã'j ũsa', nawa pi'kxnisawe'sxa' wa'lçxa pa'jmeeta'. 9 Aça' açxha' me'jwe klxiikhunsuwe'sxtxi pi'kxya' maatxwa jxuka boda fxiestate yuukahn. 10 Txã'jĩte', selpisaawe'sxa' klxiikhunsu u'jçxa maatxwa jxuka pkhakhtxi ewsa ma'k yuu meeçxa' ewmeesa ma'k yuu nawa jxuka. Aça' fxiesta yatte jxuka nasa utatx.

11 Txajũ' jxkaahsa' pi'kxnisatx thegya' u'kaçxa', uyku teeçx piçthě'j txã'wě boda fxiestate athni ropa yakhmée u'pte. 12 Sa' na'wěk we'we: Namiku, idxa' çkĩjxa'ga ayte u'ka', boda fxiestate athni ropa ji'phmeeçxa'? Txã'jĩte', txãa piçthě'ja' pasmée sxuuna'k neeyũu. 13 Aça' jxkaahsa' mesate puuçuçsatx na'jĩnak jxkaah: Naa piçthě'ja's uweçxa mtudwe çxida petx kuse yã'jçxa, sa' ekaju kutxi'jçxa çxhi'dx walate makhwe, kxte' ki'thtxi ksuusu'jna ũ'nena ũukhkahn. 14 Txãa pa'gatey wala yuh pa'yatewa, jxukay yu' utxaawa'jsameeta' jĩk.

Gobierno's dukhwa'ja'swa pěyni

(Mr 12.13-17; Lk 20.20-26)

15 Txajũ' fxariseowe'sxa' u'jçxa txãawe'sx pwe'sx puutx we'wetx Jesusa's ewmeete nvxiit wěeçxa. 16 Txã'wě yũuçxa' txãawe'sx ju'gu ũssa vxite' Herodes nasa txãawe'sxtxi' kaahtx Jesusa's na'jĩna pěykahn:

—Kaapiya'jsa, idxa's jiitha'w, kīhtewa isasaçxáanag we'we'. Sa' Dxus tasxte pa'jwa'j dxi'ja'swa ew yuuçxáag kaapiya'ja'. Nasaa jxkaahna yu'kxpehnitx nwēese'je'çmeeg, txāa pa'gatey idxa' nasa ewsa na'wē thegsatx jiyumey ju'gu yu'çmeeg. ¹⁷ Idxa' ¿ma'jīki'g? Jxkaahsa Cesara's vxyu dukhte ¿ewmanx? Meeçxa' ¿dukhmeete wáa ewna? jīte', ¹⁸ Jesusa' na'wēk pas txāawe'sx ewmée yaakxni's jiyuçxa':

—Adx dxi'pteçxáa ew we'weçxa', ũuste yu' ewmée yaakxsawe'sx, ¿kījxa'kwe adxa's ewmeete nvxiit wēeçxa txā'wē pēyí'? ¹⁹ Dukhwa'j vxyu's mneejxūhwe jīte', teeçx vxyu's jxūna kūhtx. ²⁰ Aça' Jesusa' thegçxa' na'wēk pējx:

—¿Kiim dxi'pa's ki'pnina, sa' kiim yase's fxi'jnina naa vxyste'? jīte':

²¹ —Cesar dxi'pa's ji'pha', sa' txajx yase's fxi'jni' jīnatx pas. Txajū' Jesusa' na'wēk jxkaah:

—Cesar jī's Cesara's dukhwa'ja', sa' Dxus jī's Dxusna dukhwa'ja' jīte', ²² paapēysawe'sxa' wala kuh yajxna neeyūtx, sa' txajū u'jtx.

*Uusaawe'sx ki' itxi yuuwa'ja'swa pēyni
(Mr 12.18-27; Lk 20.27-40)*

²³ Txāa entey saduceowe'sx maaíi yu' Jesusa's thegya' pa'jtx. Nasa' uuyā'jçxa' peena yu' itxi yuuwa'jsameeta' jīna we'wesatx yu' txāa saduceowe'sxa'. Txāasa na'wētx paapējx:

²⁴ —Kaapiya'jsa, meen peeta'sx. Moises we'weçxa': Maa piçthē'jwa luuçx ji'phumey nyu's nvxihtçxa uute', uusáa nyakha' txāa u'y neeyūusáa yakh kabawa'jsa', aça' txāate

luuçxa' uusáa nçxi'k na'wě neeyũuna jĩ'k.
²⁵ Aça' kwe'sxa' jiitha'w siete piçthě'j pxakhtxi
 u'pu'. Aça' nyafxtewe'sxa' kabaçxawa luuçx
 ji'phumey uuk, txajx nyua's nyakh e'stewe'sx
 jĩi nvxihtçxa. ²⁶ Aça' nyakh e'stewe'sxwa
 txã'wěyçxáa nyakh tekhtewe'sx jĩi nvxihtçxak
 uu, sa' txã'wěçxaçxáatx yũu siete pxakhsay.
²⁷ Aça' nmehte' txãa u'ywa uuk. ²⁸ Txã'wě
 uuçxawa ki' itxi yuu ente', ¿maa yakh isa nyu
 yuuwa'jsakx? txã'wě kxaz pxakhsatxíi txãa
 u'yçxaçxáa iimi'sa' na' jĩte', ²⁹ Jesusa' na'wěk
 pta'sx:

—I'kwe'sxa' Dxus librate fxi'jni ũsa' txã' isa
 yuhna sũju'çmeee'kwe, sa' Dxusa' kĩjxa'wa jxuka
 ājana sũju'çwameei'kwe. Txãasa jxpubana
 ũsi'kwe. ³⁰ Uusaawe'sxa' ki' itxi yuuçxa' peena
 yu' kabana fxi'zewa'jsameeta'. Txãawe'sxa'
 cielute ũssa Dxus angeleswe'sx na'wěsaçxáa
 yã'tha'. ³¹ Nawa uuçxa ki' itxi yuuwa'ja's
 i'kwe'sxa' iilēymeewá'kwe Dxusiwa na'wěk
 we'we: ³² Abrahan, Isaak, Jakob txãawe'sx
 Dxusthu adxa' jĩ'k. Uuçxawa ki' itxi yuusaawe'sx
 Dxusthu jĩçxak txã'jĩ'.

³³ Txã'wě wěse'jçxa', wala kuh yajkxna
 neeyũutx txã'wě zhiçxkwe Jesus kaapiya'pha'ga.

Dxus ley maatewa jxthaakwesa

(Mr 12.28-34)

³⁴ Jesus txã'wě saduceowe'sxtxi sxuuna' vx-
 itni's fxariseowe'sx jiyuçxa', pkhaakhetx. ³⁵ Sa'
 Dxus ley kaapiya'jsa teeçxsa' Jesus tasxte utxaak
 pějxya' ewmée pastewa jiyu wěeçxa. Sa' na'wěk
 pějx:

³⁶ —Dxus leya' maatewa jxthaakwesa' ¿maana? jíte', ³⁷ Jesus pasçxa':

—Dxusa's ũusuh jxuka yajkxçxa txãa yuuçxáana selpiina fxi'zewa'ja' bagaçxte yuhwa txutemée uu entepkaçx. ³⁸ Naa txã'wē jxthaakwesa'. ³⁹ E'stewe'sxa' txã'wēydxia': Peekii ma'wēga ya'peeygãja', txã'wēy mpeeygãh vxite nasatxwa. ⁴⁰ Dxus jxkaahni naa e'zsaçxáa Moises leytxi jxuka ãhsata', txã'wēy Dxus yuwe pta'sxsawe'sx kaapiya'jnitxwa jxuka jík.

Dxus tasxu yuusa' ¿kiim nçxi'kki? jına Jesus pēyni

(Mr 12.35-37; Lk 20.41-44)

⁴¹ Fxariseowe'sx pkhaakheçxa kxtee nee ũsiyna, ⁴² Jesusa' na'wēk pējx:

—Kristo' ¿kimna sūju'kwe i'kwe'sxa'? ¿Kiim nçxi'kna sūju'kwe? jíte', txãawe'sx pasçxa':

—Davxid nçxi'kna sūju'tha'w jíte', ⁴³ Jesusa' na'wēk we'we:

—Txã'wēte', ¿ma'wēçxaga Davxida's Dxus Es-
piritu kaayaki'the' Kristo's we'weçxa' na'jĩ:

⁴⁴ Adxna jxpe'jsa Kristo's Dxusa' na'jík:

Adx pukate paçu ju'gte mkaaçx,

Idxna açesatx idxçxaçxáana nwēese'jwa'ja's vx-
itna jxã'phkaçx jík.

⁴⁵ Txã'wē Davxidíwa Kristo's we'weçxa': Adxna jxpe'jsa jínak kxsusu' aç'a' Kristo' ¿ma'wēçxa Davxid nçxi'k yuukx? jíte', ⁴⁶ kim yuhwa teeçx yuweçxáawa pasya' ãjameeta', sa' txajüyã'ja' peena yu' pējxmeeta' kim yuhwa.

23

*Fxariseo vxite' ley kaapiya'jsawe'sxtxi yuuwesa
Jesus nvxiitni*

(Mr 12.38-40; Lk 11.37-54; 20.45-47)

¹ Txajũ' Jesusa' na'jĩnak we'we txãa yakh u'jusawe'sx petx vxite nasa yã'jçxa:

² —Ley kaapiya'jsa vxite' fxariseowe'sx txãawe'sxa' Moises leya's wala ew jiisa txãa leya's nwēese'jwa'ja's jxkaahsatha'w sũju'tx. ³ Txã'wēyã'the', i'kwe'sxa' mwēese'jwe ley ewsa ma'wē jxkaathe' txãa yu'sa' jxuka. Nawa txãawe'sx na'wē yu' yũuna fxi'zenuwe. Txãawe'sxa' nasa yuutxi' leya's nwēese'jwa'ja's jxkaahçxawa txãawe'sx yu' leya's nwēese'je'çmeeta'. ⁴ Tũ'swa'j iiméh wala duhsa pheu'ju'tx txã'sa' kim yuhwa çxhãçxhameena. Txã'wēsa'stxi nasatx ktũ'se'je', nawa txãawe'sx yu' le'çxkuē kusetexãa yuhwa at pu'çxhi'çmeeta'. ⁵ Maawa uykahn sũhçxa iiwejçx iiwejçx yajkxna âate yu' kĩhwa yu'tx Dxusna yaakiçtha'w jĩna. Txãasatx Dxus jxkaahni's eçte fxi'jçxa kajate akhçxa dxiktheuy vxite' kusesu tudçxa fxi'ze'. Sa' nasa jiyuni fxi'zeya' sũhçxa athni ropawa thaakwe jxu'jsa iijxũçxatx fxi'ze'. ⁶ Fxiesta yat-su pi'kxni u'jçxa', kaçxni wejx ewsaçxáanatx pakwe' iiwejçx yajkxna. Sa' judiuwe'sx pkhaakhenisuwa txã'wēytxi yu'. ⁷ Klxiikhunsu msuuwa nasatx wala ewçxáa we'wena weçxaa jxthãasnatx pekũju', kaapiya'jsa jĩna kxsus jxthãasna.

⁸ Nawa i'kwe'sxa' txã'wē kaapiya'jsa jĩna kxsus jxthãasna fxi'zenuwe. Txãa pa'gatey

i'kwe'sxa' kaapiya'jsamée maa yakhwa jxuka pxakhsaçxáai'kwe, naasáa kaapiya'jsa' teeçx yuuçxáa ji'phi'kwe txã' Dxus kaahni Kristo'. ⁹ I'kwe'sxa' naa kiwetewe'sxtxi' kim yuhnawa tata jĩna kxsusnuwe, txãa pa'gatey teeçx Tata yuuçxáa ji'phi'kwe txã' cielute ũsa'. ¹⁰ Sa' npiičthē'j jxpe'jsa jĩna kxsus jxthãasnawa fxi'zenuwe, txãa pa'gatey Npiičthē'j jxpe'jsa' teeçx yuuçxáa ji'phi'kwe txã' Kristo'. ¹¹ Maatxwa selpiina fxi'zeçxa yuuçxáa jxtuhthesa yuune'kwe. ¹² Txã'wēme', maawa peekiçxáa walasath sũhna iwejçx iwejçx yaakksa' āhmeekuēsa yuuna, nawa āhmeekwesath sũhna fxi'zesa' walasa yuuna.

¹³ Ley kaapiya'jsa vxite' fxariseowe'sx āateçxáa ew we'weçxa' ũuste yu' ewmeeçxáa yaakksa, i'kwe'sx yakha' seena' yuh ũukhũukha', txã'wē Dxus jxkaahnite u'kawa'ja's apha'i'kwe maawa u'kakahmén. Sa' vxitesatx ka'ga'jmeeçxa', i'kwe'sxçxáa yuhwa u'kaçmeei'kwe, txãa pa'ga ũukhũukha'.

¹⁴ Ley kaapiya'jsa vxite' fxariseowe'sx āateçxáa ew we'weçxa' ũuste yu' ewmeeçxáa yaakksa, i'kwe'sx yakha' seena' yuh ũukhũukha'. Vxiudawe'sx yattxi kusa'jçxa txãa kusa'jnitx kaapeçxkana'jya' sũhçxa wala jxu'j lisa'i'kwe. Txã'wē yũupa'ga i'kwe'sxa' jxthaakwe Dxus kastigãyni yuune'kwe.

¹⁵ Ley kaapiya'jsa vxite' fxariseowe'sx āateçxáa ew we'weçxa' ũuste yu' ewmeeçxáa yaakksa, i'kwe'sx yakha' seena' yuh ũukhũukha'. Mtee mteewa pekũju'i'kwe nasatx i'kwe'sx ju'gu tuphy wēeçxa i'kwe'sx kaapiya'jni's pta'sxna.

Nawa nasatx knayçxa', txãa nasatxi' i'kwe'sx ũswa'j infxiernotey nvxiit-sa i'kwe yu'.

¹⁶ I'kwe'sx yakha' seena' yuh ũukhũukha', jiimeeçxa na'jĩna i'kwe kaapiya'ja' naa pa'ga: Pu-utx we'weni's kxtey yu'nja jĩçxa dxuus yata'sçxáa kxsusna jurãyni's kxtey yuumeetewa, kĩh yu-umeena. Nawa dxuus yatte vxyuu beja's kxsusna jurãyni's yuuçxá' kxtey yuuwa'j yuja' jĩ'i'kwe. ¹⁷ Jiimée luuku we'wesa, Dxus dxi'pte' ¿kĩh wejx jxthaakwe ewsakx, vxyuu beja' meeçxa' dxuus yata'? E'zĩi ¿Dxus jĩiçxaçxáa meetxna'? ¹⁸ Txã'wěy na'jĩ'i'kwe: Dxuus yatte altala'sçxáa kxsusna jurãynisa's kxtey yu-umeetewa, kĩhwa yuumeena. Nawa altalte kabwa'ja's kxsusna jurãynisa's yuuçxá' kxtey yuuwa'j yuja' jĩ'i'kwe. ¹⁹ Jiimée luuku we'wesa, Dxus dxi'pte' ¿kĩh wejx jxthaakwe ewsakx, dxuus yatte altala' meeçxa' altalte kabnisa'? E'zĩi ¿Dxus jĩiçxaçxáa meetxna'? ²⁰ Maawa dxuus yatte altala's kxsusna jurãysa' txã'sçxáana kxsussa yu'çme'. Altalte kabnisa'swa jxukak kxsussa yu'. ²¹ Txã'wěy maawa dxuus yata's kxsusna jurãysa' txã'sçxáana kxsussa yu'çme'. Kxtee ũssa Dxus ĩtxisa's kxsussak yu'. ²² Txã'wěy cielu's kxsusna jurãysa' cieluçxáana kxsussa yu'çme'. Dxus jxkaahna ũsni's jxukak kxsussa yu' petx Dxus yã'jçxa.

²³ Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha'. I'kwe'sx ũusteçxáa yajkxçxa kaapiya'jçxa', putatxhã' ma'k yuu meeçxa' me'sukwe ma'k yuu

komino ma'k yuu txã'wēsatsx diez eç uhdeçxa' teeçx eça's kutxi'ji'kwe Dxus jĩ' jĩna. Nawa Dxus ley jxkaahçxa': Dxus dxi'pte ew fxi'zena, vxite nasatsx peeygãhna, Dxusa's ũusuh jxuka yajkxna txã'wē yũuwa'ja' jĩ'k txãa isa jxkaahni yu's kxtey yu'çmeei'kwe. Nawa na'wē Dxus jĩ' jĩ'i'kwe txãa yu's nvxiitwa'j yu'me'. ²⁴ Jiimée kaapiya'jsa, fxĩsx le'çxkwesa yuutxi' a'çha'i'kwe, nawa kamelxo walasa yu'sa' uymeeçxa jxkhēje'i'kwe.

²⁵ Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha'. Waso ma'k yuu meeçxa' plaatu ma'k yuu txã'wēsatsx ekaju yu' wala ew pki'khi'i'kwe, nawa dxiikhē yu' vxite jĩitx pesweeçxa abnisaçxáa uta ji'phta'. ²⁶ Fxariseo jiyu'çmeeg. Dxiikhē khuē'y pki'kxwa'ja' waso vxite' plaatutx, kxah ekajuwa jxuka ate yuuna.

²⁷ Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha'. Uusáa pedani's kajkwekhē pçxiime'the', zhiçxkwek vxya'. Nawa dxiite yu' uusáa dxi'thçxáa utak kazx putana ũsu'. ²⁸ I'kwe'sxa' txã'wēysa i'kwe. ãakhē yu' nasaa dxi'pte wala ew na'wē thegu'i'kwe. Nawa ũuste yu' kazx ewmée yaakxnisaçxáa uta ũsa'.

²⁹ Ley kaapiya'jsa vxite' fxariseowe'sx ãateçxáa ew we'weçxa' ũuste yu' ewmeeçxáa yaakxsa, i'kwe'sx yakha' seena' yuh ũukhũukha'. I'kwe'sxa' ewkuē pheu'jna nes yu' Dxus yuwe pta'sxsa vxite' nasa ewsa txãawe'sxtxi

pedaní kafxsu. ³⁰ Sa' na'jĩ'i'kwe: Kwe'sx yaçgawe'sx fxi'zeni ente kwe'sx ũswaça', kwe'sxa' ikhwa'jme'ntka'w yu' Dxus yuwe pta'sxsatxi' jĩ'i'kwe. ³¹ I'kwe'sxa' Dxus yuwe pta'sxsawe'sxtxi ikhsa nwe'sxi'kwe, txãasa i'kwe txãa ikhsawe'sxtxi' kwe'sx ji'j yaçgawe'sx jĩna we'we'. ³² I'kwe'sx yaçgawe'sx kĩhne'ta yũusa yu', aça' i'kwe'sxwa txã'wěy yũuna nes yuune'kwe.

³³ Ul weeswée seena'sa ji'j, çma'wě yũuçxa infxiernote kastigãywa'the pa'jmée yuuki'kwe?

³⁴ Txã'wěsa yã'ji'kwe na' i'kwe'sxa' maaĩtxi' kluuskhē ki'pna ikhna, vxitetxi's judiuwe'sx pkhaakheni yaçu pãpana, vxitetxi's ahçeçxa çxhab iisa ikhya' pakwena nes yuukahn adxa' kaajxa'wath Dxus yuwe pta'sxsa vxite' kĩhtewa wala jiisa vxite' kaapiya'jsa txãawe'sxtxi.

³⁵ Txã'wě Abela's ikhnijũjx nasa ewsatx ikhya' takhçxa Berekias nçxi'k Zakariasas Dxus altal pukate ikhi'kwe txãa entepkaçx ikhnisatx i'kwe'sxçxaçxáa yuuwesa yuune'kwe.

³⁶ Isath we'we' nyafxiitey ikhnisatxi's nasa naa ensuwe'sx txã'wě yuuwesa yuutxna.

Jesusa' Jerusalena's thegçxa ũ'neni
(Lk 13.34-35)

³⁷ Jerusamente nasa, i'kwe'sxa' Dxus jxkaahnisa txajx yuwe's pta'sxsawe'sxtxi ikhe'i'kwe, maaĩtxi' kwet wãatatahna. Maz uswa pkhakhçxa nwe'we wěeth i'kwe'sx luuçxtxi, atalxwa ma'wěga luuçxkuētxi's fxuu ku'ta dxiite ãsxi' txã'wěy, nawa wa'li'kwe. ³⁸ Mwěese'jwe: i'kwe'sx ũsni' thegnimée neeyũuna. ³⁹ Na'jĩ'th

na': peena yu' adxa's uymeene'kwe, Dxus tasxu yuusa wala ewsa yuja' jīna we'wewa'j en āhpkaçx.

24

Dxuus yat pçuwa'ja's Jesus pta'sxni
(Mr 13.1-2; Lk 21.5-6)

¹ Dxuus yatu kasehçxa Jesusa' u'jweçpkaçxha', txãa yakh u'jusawe'sxa' utxaaçxa we'wetx dxuus yata's pta'sxna. ² Aça' Jesusa' na'wêk pas:

—Txã'wê yuh seena' zhiçxkwe wala'. Nawa na'jī'th na': jxuka pçuuna, aça' txãa yat-tewe'sx teeçx kwetçxáa yuhwa kēese'jnimeesa yu' neeyūumeena jīk.

Naa kiwe pçuwa'j en ājaçte seena'sa vxyaawa'j
(Mr 13.3-23; Lk 21.7-24; 17.22-24)

³ Txajū' Oliwos vxiçnatx u'j. Kxtee pa'jçxa Jesus kaçxçxa u'pte', txãa yakh u'jusawe'sx maaii yu' na'jīnatx we'we paaçte:

—Meen peeta'sx, ¿bagaçx txã'wê jxuka pçuukx? Sa' iidx kīiwa'j en vxite' naa kiwe pçuwa'j en ājaçte', ¿kīh seena'sa vxyaakx? jīte',

⁴ Jesusa' pta'sxku:

—Mpa'yajkxwe, i'kwe'sxtxi kaypuba'jwe'sxte.

⁵ Txã'wême', wala pa'jatxna adx yase's kxsusna na'jīna: Dxus kaahnisa Kristoth jītxna, sa' txã'wê yūuçxa wala kaypuba'jatxna īsxiina. ⁶ I'kwe'sxa' wēse'jene'kwe gweçxa msuu msuuwa u'pa'jīni. Txã'wê yūutewa i'kwe'sxa' ūukhnuwe, txã' nmeh en yu' me'. ⁷ Gobierno' vxite kiwete gobierno yakh puiitxna, naapkaçxha' puutx jxu'j kiwejū pwe'sxwa puiitxna. Txã'wê mtee

mteewa jxuka gweçxa kiiteena. Sa' wêje enwa pa'jana, wee seena'sawa pa'jana, ehdwa seena'sa u'jwetxna mtee mteewa. ⁸ Txã'wê seena'sa pa'jçxawa txãa yu' nyafxte nxusya' takhnisaçxáa yuuna.

⁹ Txajũ' i'kwe'sxtxi uweçxa dukhetxna pãpana ikhkahn, sa' naa kiwete mteewe'sxwa jxukaysa açetxna adx jxkaahni's nwêese'pha'gaçxáa.

¹⁰ Txã'wê yũute', maazkuêesawa Dxus tasxu txuteetxna, sa' puutx yahçena vxitesa uweçxa ikhwa'ja's vxitutxna. ¹¹ Wala ãxiisa vxyaatxna, adxa' Dxus kaahni yuhth jĩna nasa maazkuêesatxwa ãxiijatxna.

¹² Sa' ewmêe yũuna fxi'zewa'jçxáa txakwe wala pa'the', puutx ya'peeygãhna fxi'zewa'j yu'sa' ivxiitutxna maazkuêesawa. ¹³ Nawa uu entepkaçx Dxus yakh txutemêe fxi'zesa' ewte neeyũutxna. ¹⁴ Naapkaçxha' Dxus jxkaahwa'ja's pta'sxnisa' maa kiwetewa jxuka pta'sxni yuuna mteewe'sxwa jxuka jiyukahn. Txã'wê yũunijũ nmeh ensa pa'jana.

¹⁵ Na'wê yũuwa'ja's jxpa'yakx lëeyçxa jii mfxi'zewe Dxus yuwe pta'sxsa Daniela' pta'sxna fxi'kh dxuus yatte kazx ewmêe yũuna pa'jwa'ja's. Aça' txã'wê seena' kazxsa pa'jçxa dxuus yatte u'kaçte uyçxa', ¹⁶ Judea kiwesuwe'sxwa jxuka ũphna u'jwene'kwe vxiç walasu ũsya'. ¹⁷ Sa' êe yat-su ũssawa sa'jçxa kĩhçxáanawa kutxi'jwa'j en ji'phumeetxna. ¹⁸ Txã'wêy mjĩi ehsu u'jusawa txajx atxha's nikxya' yatna u'jwa'j ençxáa yuhwa ji'phumeetxna. ¹⁹ Txãa ente' u'ywe'sx nasa ji'phsa meeçxawa luuçx ãpãkuê ji'phsawe'sxa' wala yuh pxthaa yuutxna. ²⁰ I'kwe'sxa' Dxusa's

mpějxwe txã'wě nus ente meeçxawa jxkaase ente ũphna u'jwa'j yuukahmén. ²¹ Txã'wě txãa ente' seena' yuh wala nxuswa'j yuuna. Naa kiwe's pheu'jiyna bagaçxte yuhwa txã'wěsa yu' iiu'pume', sa' txã'wěsa skhēwniijūyã'ja' peena yu' u'pumeena txã'wěysa yu'. ²² Dxusa' en txã'wě seena'sa's txaçxmée vxitmeete yu', kim yuhwa ĩtxi neeyũumeetxna. Nawa txajx nasa txhitxhnisatx peeygãhçxa, en txã'wě seena'sa's txaçxmeeçxáa vxituna.

²³ Maawa i'kwe'sxtxi we'weçxa', mthegwe Kristo ayte ũsa' jĭtxna, meeçxawa kxtee ũsa' jĭtxna, nawa txã'jĭni's nwēese'jnuwe. ²⁴ Txãa pa'gatey wala ĩsxiisa pa'jatxna, adxa' Dxus yuwe pta'sxsath sa' Dxus kaahnisa Kristoth jĭtxna, txã'wě kim yuhwa ājanimeesa's kaavxya'ja'jatxna kaypuba'j wēeçxa. Txã'wě yũuçxa maaiĩtxi' kaypuba'jatxna Dxus txhitxhnisa yuhtxwa. ²⁵ Txã'wě yũuwa'ja's pta'sxyã'th i'kwe'sxtxi dxiikhēy. ²⁶ Txãa pa'ga nwēese'jmeene'kwe makwe txã'wě kxtee ũsa' nasa u'pnimeete jĭtewa meeçxa' ay dxiite ũsa' jĭtxna. ²⁷ Txãa pa'gatey Dxus Nçxi'k Nasa Yuusáa kĭi ente', kpi'sxwa ma'wēga sek kãanijũ kwehneçxa' sek khēenijūwa vxya' txã'wěyçxáa yuuna naa dudte jxukaysa dxi'pte. ²⁸ Kakwe uuniisa mkaa ũstewa kxtee pkhaakhetxna mēewějxa' ũ'ya'.

Dxus Nçxi'k Nasa Yuusáa seena' zhiçxkwe vxyaana

(Mr 13.24-37; Lk 21.25-33; 17.26-30, 34-36)

29 Txã'wě seena' nxuswa'j en skhēuucpkaçxa', seka' çxi'dxina, aç'a' a'te' kweethmeena. Naapkaçxa' estrelxa ũsxitxna, êe walasu kîh seena'sawa jxuka kêese'jni yuutxna. 30 Txã'wě yūunijū', Dxus Nçxi'k Nasa Yuusáa kīwa'ja's kaajiyu'jsa vxyaana cieluju, aç'a' naa kiwete nasa maazkuēsawa ũ'netxna Dxus Nçxi'k Nasa Yuusáa txã'wě cieluju tãaph pxãhte seena' zhiçxkwe vxyaana yuhte uyçxa. 31 Sa' txajx angeleswe'sxtxi jxkaajana seena' sus tujkaçxa txajx txhitxhnisatxi' pkhakhkahn naa kiwetewe'sx mtee mteewe'sxwa jxukaysatx.

32 Naa ejemplo's peçxkananuwe: higwera fxtūu tasxa' eç ubuçxa ki' u'se yeeçuçte uyçxa', yūnya'watewa jiyu'i'kwe. 33 Txã'wěy na'wě seena'sa vxyaaçte uyçxa', jii mfxi'zewe, pçuwa'j en utxaaçte txã'wě yuuna. 34 Isath we'we', naa ensu nasa' uumey txã'wě seena'satx uyu-une'kwe. 35 Cielu naa kiwe jxuka skhēuutxna, nawa adx we'weni yu' kxtey yuume yu' skhēwmeetxna.

36 Nawa kîh ente kîh orate txã'wě yūuwa'j yu'sa' kim yuhwa jiimeeta', cielute angeleswe'sx Dxus Nçxi'k txãawe'sx yuhwa, naasáa Dxus yuuçxáa jiia'.

37 Noe entewa ma'wēga yuu txã'wěyçxáa yuuna, Dxus Nçxi'k Nasa Yuusáa kī entewa. 38 Txãa ensu nasa' îkh utameyna yu' wala weçxana ũsu'tx ũ'na tudxna kabana Noe arkate u'kapkaçx. 39 Sa' Dxus kastigo's jiiimée ũsí, îkh utate jxuka pçuuçyã'jçxaçxáatx jiyu, txã'wěyçxáa jiyumeetxna Dxus Nçxi'k Nasa Yuusáa kī entewa. 40 Txãa ente' e'z piçthē'j mjīina

ih ũsutxna, aça' teeçxsa's jxūna u'jni yuuna, nawa vxite's nvxiitni yuuna. ⁴¹ Txã'wěy e'z u'y ih ũ'khna ũsutxna, aça' teeçxsa's jxūna u'jni yuuna, nawa vxite's nvxiitni yuuna.

⁴² I'kwe'sxa' jxpa'yakx meswe. Txã'wěme', kīh ente kīh orate Dxus Nçxi'k kīiwa'jsatewa jiimeei'kwe. ⁴³ Nawa jxpa'yakx meswe. Yat namuwa ma'wě peswée kīh orate yuhtewa jiyuçxa' dehmée jxpa'yakx ũythasna u'pukx yatte pesweekahmén, txã'wěy myūuwe. ⁴⁴ Txãa pa'ga i'kwe'sxwa jxuka pheu'jçxa meswe. Txã'wěme', yajkxmée ũsiyna Dxus Nçxi'k Nasa Yuusa' kīhçxáa yuuna.

Selpisáa ewsa vxite' ewmeesa
(Lk 12.41-48)

⁴⁵ Selpisáa ¿maa ewki patron neewe'weçxa nvxihtte kxte yattewe'sxtxi kwěeje'jmée sã'jīwa'jsa? ⁴⁶ Patron neewe'weçxa nvxiitni's jxuka kxtey yuuna ũste patrona' thegna pa'the', txãa selpisáa yakha' wala yuh weçxa yuhna. ⁴⁷ Isath we'we': txã'wě yūusa's patrona' txajx ji'phuni's jxuka neewe'weçxa nvxiituna. ⁴⁸ Nawa selpisáa ewmeesa' patron pa'jya' jxthēeyuuna sūhçxa ⁴⁹ kxte vxite selpisaatx pkxuuna tūusaawe'sx yakh tudxna ũ'na yūuna ũste', ⁵⁰ yajkxmée ũsiyna patrona' kīh ente kīh oratewa pa'jçxáa yuuna. ⁵¹ Sa' seena' wala nxus nxus kastigãina txã'wě yuwejuçxáa ew we'weçxa' ũuste yu' ewmeeçxáa yaakxsawe'sxtxi na'wěy. Txajyūyã'ja' txãa selpisáa ewmeesa' seena' wala pebeena ki'thtxi ksuusu'jna.

25

Diez kna'sa yakh kaaja'da'jni

¹ Dxus jxkaahwa'j en âhte', na'wě yuuna: Diez kna'sawa ma'wěta lampara aceite awniisa's atçxa boda yatna u'j novxio's jxpa'gaya', txã'wěy yuutxna. ² Txãa kna'sawe'sx tahçsa' jxpa'yakxmeeçxa pheu'jmeetx u'j, sa' vxite tahçsa' jxpa'yakxçxa jxuka pheu'jçxatx u'j. ³ Tahçsa' ew ũus yajkxmeeçxa', lampara yu'sa' jxũçxa u'jçxawa aceite yu' jxũmeetx u'j pçuute ki' awwa'j. ⁴ Nawa vxite tahçsa' aceite jxũçxatx u'j lamparatewe'sx pçuute' ki' awwa'j. ⁵ Novxio pa'jya' jxthěeyuute', txãawe'sxtxi wala deewěe yuute' dehtx. ⁶ Txajũ' kuspxãh yuuçte', pthũusek na'jĩna sus we'weni: Novxio yujxã'ja', aç'a' jxpa'gaya' myuhwe jĩni. ⁷ Naapkaçxha' kna'sawe'sx kxazíi kiiteçxa lampara's pheu'jtx. ⁸ Aç'a' tahçsa' jxpa'yakxmée u'jsawe'sxa' vxite tahçsatx aceite thãastxi: Le'çxkuẽçxáawa peesune'kwe. Txã'wěme', kwe'sx pki'tanisa' ũçxhaça' jĩnatx we'we. ⁹ Nawa kna'sawe'sx jxpa'yakx pheu'jçxa u'jsa' na'wětx pas: Ũsme'nja'w. Txã'wěme', kwe'sx jĩi yuhwa âhmée jiptha'w, aç'a' i'kwe'sxtxi ũswa'j yu' wejx âhmeena. Wejx yuuwa me'jwe weyya' jĩ'tx. ¹⁰ Txã'wě tahçsa' jxpa'yakxmeeçxa aceite weyya' u'jweçpkaçxha', ptamusá novxio' pa'kh. Aç'a' jxpa'yakx ũythãssawe'sxa' boda yatte novxio yakh u'kaçpkaçxha', vxitxa's aphtxi. ¹¹ Txãa e'suyã'jtx vxite kna'sawe'sx kũhçxa: Meen phaade jĩna we'we. ¹² Nawa pasçxa': Isa, adxa' i'kwe'sxtxi' jiimeeth jĩk.

13 I'kwe'sxa' jxpa'yajkx meswe. Txã'wēme', kīh ente kīh orate Dxus Nçxi'k Nasa Yuusáa pa'jwa'ja's jiimeei'kwe.

Mjüya' ājawa'jsatx vxyu's neewe'weçxa u'jni yakh kaaja'da'jni

14 Teeçx piçthē'jwa ma'wēga vxite kiwen u'jweççxa', txã'sna selpisaawe'sxtxi pa'yaçxa tx-ajx vxyu's neewe'weçxa ũsçxa u'j, txã'wē yūuna Dxus jxkaahwa'j en ähte'.

15 Txãa piçthē'ja' selpisáa teeçxsa's vxyu taçç milku ũs, sa' vxite's e'z milku ũs, sa' vxite's teeçx milku ũs, teeçxsa na'wēçxah makwesa's sxiigmée iijxūya' ājawa'jsatewa txakweçxáak ũsçxa u'j. 16 Teeçx selpisáa taçç mil vxyu jxpa'gasa', txãa vxyu's kmãaji'jçxa ki' vxite taçç mil íik äh knay. 17 Txã'wēy e'z mil jxpa'gasawa ki' vxite e'z mil íik äh knay. 18 Nawa teeçx milçxáa jxpa'gasa' patron vxyu's kafxi'jçxa ki-wetek pedáa.

19 Patrona' wala txaçxte ki' sxawedna pa'jçxa', txãa selpisaawe'sxtxi vxyu ũsni's ki' pējxku. 20 Nyafxte' taçç mil vxyu jxpa'gasa khuē'y utxaana kūhçxa ki' vxite taçç mil íik äh kaasxwedu'j na'jīna patrona's: Idxa' taçç milgu ũs, aça' ki' vxite taçç mil íith knay kmãaji'jçxa jīte', 21 patrona' na'wēk we'we: Idxa' vxyu'sa' psuwmeeg wala ew kmãaji'j. Txã'wē le'çxkuēçxáasanawa psuwmeé kmãaji'pha'ga, wejx walasanawa neewe'weçxa iidx kusete nvxiitu'nja. Äçxha' me'ka adx yakh weçxana ũsya' jīk. 22 Txajū' vxite selpisáa e'z mil jxpa'gasawa kūjk na'jīna patrona's: Idxa' e'z

milçxáag ũs, nawa txã'sa' kmãaji'jçxa ki' vxite e'z mil iith ãh knay jíte', ²³ patrona' na'wêk pas: Idxa' vxyu'sa' psuwmeeg wala ew kmãaji'j. Txã'wê le'çxkweçxáasanawa psuwmeé ewgu kmãaji'pha'ga açxha' txáate jxthaakwe walasanawa nvxiitu'nja iidx kusete. Me'ka adx yakh weçxana ũsya' jĩk. ²⁴ Txajũ' teeçx milçxáa jxpá'gasawa kũjk patrona's na'jĩna: Idxa' wala weesweetewa jiith, sa' iidx uuthasxmeesuwa jxukag pkhakhe' kĩhwa uhmeeçxawa. ²⁵ Txãa pa'ga ũukhçxa iidx vxyu's jxaawthu kiwete pedaaçxa. Nawa açxha' dukheçthu idx makwene'ga ũs txã'sa' jíte', ²⁶ patrona' na'wêk pas: Idxa' seelpimée watxkuëg. Adxa' txã'wê juuna'çxa kĩhwa uhmeeçxawa vxite jĩitx pkhakhsatewa jiith jĩ'g na', ²⁷ çmjĩtega adx vxyu's bankoga jxaawmée txáate jxthaakwekuë nuypenhnaçxa kaasxwedu'jya? jĩçxa', ²⁸ kxtee ũssatx na'wêk jxkaah: Txãa piçthê'j vxyu mil ji'phsa's kusa'jçxa diez mil ji'phsa's meswe. ²⁹ Txãa pa'gatey ji'phsa's jweeíiçxáa jxthaakwe ũswa'ja' wala ji'phukahn. Nawa ji'phmeesa's jxuka kusa'jwa'ja' le'çxkuëçxáa ji'phuni'swa. ³⁰ Sa' txãa piçthê'j seelpimeesa's uweçxa ekaju çxhi'dx walate makhwe. Kxte' seena' yuh pebeena ki'thtxi ksuusu'jna ũswa'ja' jĩk.

Naa kiwetewe'sxtxi jxuka ewsatx fxii txudeni

³¹ Dzus Nçxi'k Nasa Yuusa' jxkaahsa yuuçxa angeleswe'sx ksxavxyte kĩhçxa txajx jxkaahwa'the kaçxhiina. ³² Txajũ' nasa' naa kiwete mtee mteewe'sxwa jxuka pkhaakhetxna

txajx tasxte, aça' teeçxsa na'wēçxah txhitxhçxa txudena, piisxáa-thegsawa ma'wēga fxii txudé' piisxáa vxite' kaplatx txã'wēy. ³³ Sa' piisxaatxi' paçu ju'gu txahçxa', kaplatxi' jebu ju'gu txajana. ³⁴ Txã'wē yūuçxa jxkaahsa' we'wena paçu ju'gu ũssatxi' na'jĩna: Adx Tata peeygāanisa, i'kwe'sxa' myuhwe txã'wē naa kiwe's vxitiyna i'kwe'sx jxkaahwa'j pheu'jni ũsa' txã'sna jxpa'gaya'. ³⁵ Txãa pa'gatey i'kwe'sxa' adxa's sã'jĩ i'kwe wēena u'jute'. Sa' yũ'wēena u'jute', yusi'kwe. Nasa ekajuwe'sx na'wē u'jute', deewa'j pki'ji'kwe. ³⁶ Athwa'j ropa ji'phméé u'jute', ropa ũsi'kwe. Uuya' ũste', thegya' pa'ji'kwe. Karcelte ũste', kxteewa thegya' pa'ji'kwe jĩte', ³⁷ nasa ew yũusa' na'jĩtxna: Idxa' ¿bagaçx wēena u'jutetka'w uyçxa ũ' puuç? ¿Bagaçx yũ'wēena u'jutetka'w tudxwa'j ũs? ³⁸ Idxa' ¿bagaçx txã'wē ekajuwe'sx na'wē u'jute uyçxatka'w deewa'j pki'j? ¿Bagaçx txã'wē ropa ji'phméé u'jutetka'w ropawa ũs? ³⁹ ¿Bagaçx âça'na ũstetka'w thegya' pa'j? ¿Bagaçx karcelte ũstetka'w kxteewa thegya' pa'j? jĩtxna. ⁴⁰ Aça' jxkaahsa' na'wē pasuna: Isath we'we', adx yakhthē'jwe'sx makwe wala pxthaa āhmeekwesaçxawa ayte ũsta' txāatx txã'wē yũusa' adxna pu'çxsaçxa i'kwe txã'wē yũu jĩna.

⁴¹ Txajũ' jebu ju'gu ũssatxi' jxkaahsa' na'jĩna we'wena: Adx tasxu mtxuteewe, i'kwe'sxa' ewmeetewe'sx yã'ji'kwe. Txãa pa'ga eçxthē'j jĩ eçxthē'j angeleswe'sx jĩ pheu'jni ũsa' infxierno ipx wala kxtee me'jwe jĩna jxkaajana. ⁴² Txã'wē adx wēena u'jutewa,

puuçmeei'kwe. Yũ'wēena u'jutewa tudxwa'j ũsmeei'kwe. ⁴³ Nasa ekajuwe'sx na'wē u'jutewa, deewa'j pki'jmeei'kwe. Ropa ji'phmēe u'jutewa, athwa'j ũsmeei'kwe. Āça'na ũstewa, thegya' pa'jmeei'kwe. Sa' karcelte ũstewa, kxteewa thegya' pa'jmeei'kwe jīte', ⁴⁴ txāawe'sxa' na'wē pasutxna: Idxa' ¿bagaçx wēena u'jutetka'w puuçmēe? ¿Bagaçx yũ'wēena u'jutetka'w tudxwa'j ũsmēe? ¿Bagaçx ekajuwe'sx na'wē u'jutetka'w deewa'j pki'jmēe? ¿Bagaçx ropa ji'phmēe u'jutetka'w athwa'j ũsmēe? ¿Bagaçx āça'na ũstetka'w thegya' pa'jmēe? ¿Bagaçx karcelte ũstetka'w kxteewa thegya' pa'jmēe? jītxna. ⁴⁵ Aça' jxkaahsa' na'wē pasuna: Isath we'we', naa nasa pxthaa āhmeekuēsatsx kīhte yuhwa pu'çxmeei'kwe na' adxna pu'çxsameeçxai'kwe txā'wē yuu jīna. ⁴⁶ Txāa pa'ga ew yūusame' infxierno ipx pçuwa'jmeete khēeya' u'jwetxna, naapkaçxha' ew yūusawe'sxa' bagaçxtewa pçuwa'jmēe ĩtxi fxi'zewa'ja's ji'phutxna.

26

*Jesusa's ikhwa'ja's puutx we'weni
(Mr 14.1-2; Lk 22.1-2; Jn 11.45-53)*

¹ Jesusa' txā'wē pta'sxna jxā'jçxa', txāa yakh u'jusawe'stxi na'jīnak we'we:

² —I'kwe'sxa' jii i'kwe Paskua fxiesta ājxa' e'z ençxáa yā'j peejxa', aça' txāa ente' Dxus Nçxi'k Nasa Yuusa's uweçxa dukhni yuuna kluuskhē a'kxçxa ikhkahn jīk.

³ Txãa entey sacerdote npiiçthê'jwe'sx, ley kaapiya'jsawe'sx, judiu nthê'jsawe'sxa' pkhaakhety sacerdote npiiçthê'j Kaifxas yat patxute, ⁴ sa' txãawe'sx pwe'sx puutx we'wetx nasa jiyunimeete paaçte Jesusa's uweçxa ikhya'. ⁵ Txãasatx fxiesta ente yu' txã'wê ikhya'mée puutx we'we nasa wala suskahmen.

Aceite pa'gasa's teeçx u'y Jesus dxikthekhê awni

(Mr 14.3-9; Jn 12.1-8)

⁶ Txãa ensu' Jesusa' Betania çxhabte Simon wã'jy weiju katxhisa yattek ũsu'. ⁷ Aça' teeçx u'y utxaana kũjk aceite wêt putasa's fxraskote uta awniisa wala pa'gasa's atçxa. Sa' Jesus kaççxa u'pte', txajx dxikthekhêk jxuka aw. ⁸ Txã'wê yũuni's Jesus yakh u'jusawe'sx uyçxa', na'jĩnatx ũusçxa we'we:

—¿Txakwe yuja' wala psuwmanx? ⁹ Txã'wê yũupkaçxte wejxwa pa'gate txweyçxa txãa vxyu's puuplesatx peeswaçne' wejx ew yu' jĩte', ¹⁰ Jesus wêse'jçxa' na'wêk we'we:

—¿Kĩjke kuçx susu' naa u'ya's? Na'wê yũunisa' psuwnisame'. ¹¹ Puuplesa' bagaçxtewa i'kwe'sx yakh nes yuutxna. Nawa adxa' i'kwe'sx yakh nes yuuwa'jsameeth. ¹² Naa u'y adx kakwekhê aceite wêt putasa's awku, nawa adx uute pedaawa'ja's pheu'jnaçxáak txã'wê yũu. ¹³ Isath we'we': Naa kiwete mtee mteewa Dxus yuwe's pta'sxna pekũhsa' naa u'y txã'wê yũuni'swa ja'da pta'sxni yuuna peçxkanamée jĩk.

Jesusa's preesu'jwa'ja's Judas ũus yaakxni
(Mr 14.10-11; Lk 22.3-6)

14 Txajũ' Jesus yakh u'jusa docesatewe'sx Judas Iskariote yaasesa' sacerdote npiiçthê'jwe'sx yakh puutx we'weya' u'jçxa 15 txãawe'sxtxi na'jĩk:

—Jesusna uweçxa dukhte' ¿maz deweeki'kwe? jĩte', txãawe'sxa' treinta vxyutx deweya' neeyũu. 16 Txajũ' Jesusa's ma'wẽ yũuçxa txãawe'sx kusete dukhya' ãjawa'ja's wala pakwek.

Jesusa' docesawe'sx yakh nmeh ã'ni

(Mr 14.12-25; Lk 22.7-23; Jn 13.21-30; 1 Ko 11.23-26)

17 Pan lewadura ji'phmée ã'ni fxiesta en ãjaçte', Jesus yakh u'jusawe'sxa' txajx tasxte utxaaçxa na'wẽtx pẽjx:

—Paskuate ã'wa'ja's ¿mteega pheu'j jxthãasu'? jĩte', 18 na'wẽk jxkaah:

—Jerusalenna me'jwe, kxtee teeçx piçthê'ja's jii i'kwe txã'sna na'jĩne'kwe: Kwe'sxtxi kaapiya'jsa' na'jĩnak yuwe kaah: Adx uuwa'j en utxaak, aça' iidx yatte Paskua's yu'skhẽwya'wath adx yakh u'jusawe'sx yakh jĩne'kwe jĩte', 19 txãa yakh u'jusawe'sxa' Jesus jxkaahni's kxtey yuutx, sa' ã'wa'ja's pheu'jtx.

20 Txajũ' jxuka çxhi'dxiçte', Jesusa' docesawe'sx yakh kaçxku mesate ã'ya'. 21 Sa' ã'na u'pçxa', na'wẽk we'we:

—Isath we'we', i'kwe'sx yakh u'jusa teeçxsa' adxa's açesawe'sx kusete dukhya'wa' jĩte', 22 txãawe'sxa' wala nxusçxa paapẽjxtxi teeçx teeçxçxah:

—¿Adx ma'th? jĩna. 23 Aça' Jesusa' pta'sxku:

—Maa txã'wě adx yakh ja'daçxah kuse's akhena plaatukhẽ txãa txã'wě adxa's açesawe'sx kusete dukhwa'jsa'. ²⁴ Dxus Nçxi'k Nasa Yuusa' ma'wě uuwa'jsatewa Dxus librute pta'sxi'k txã'sa' kxtey yuuya'wa'. Nawa adxa's açesawe'sx kusete dukhsa' įseena' yuh nxuste khẽjena! Txãa piçthẽ'ja' naa kiwete wejx yuuwa upxmeewaçne' wejx ew yu' įite', ²⁵ Judasa' pějxku:

—Meeçxa' įadxwá'ntkakx? įite', Jesus pasçxa':

—Idxíig įĩk.

²⁶ Ũ'na u'pçxa', Jesusa' pana's jxpa'gana'wa Dxusa's weçxaçxa pe'ltedek, sa' txãa yakh u'jusawe'sxtxi ũsu'sku na'įina:

—Mě'we, naa pana' adx kakwe na'wěsa' įiçxa', ²⁷ waso'swa jxpa'gana'wa Dxusa's weçxaçxa txãawe'sxtxi ũsku na'įina:

—Jxukaysa mtudxwe naa wasotewe'sxa's. ²⁸ Naa wasotewe'sxa' adx ee na'wěsa'. Dxusa' maazkuěesa pkaltxiwa khũkhçxa nwe'wewa'ja's vxitku, nawa adx eea's pkawçxa yuuçxáak txã'wě nwe'wewa'ja's vxit. ²⁹ Nawa na'įi'th na': açxhũyã'ja' peena yu' tudxme'nja naa uwa yu'a's, naasáa adx Tata jxkaahwa'j enteçxáa yã'į ki' i'kwe'sx yakh pkhaakheçxa tudxi'nja įĩk.

Pedro įsxiiwa'ja's Jesus pta'sxni

(Mr 14.26-31; Lk 22.31-34; Jn 13.36-38)

³⁰ Txajũ' Dxusna weçxana memna jxã'jçxa', u'įtx Oliwos thã'į vxiçna. ³¹ Aça' kxtee pa'jçxa', Jesusa' na'įinak we'we:

—Naa kuste' i'kwe'sx jxukaysa adxçxáana nvx-ihtçxa txuteene'kwe. Txãa pa'gatey txã'wẽ yũuwa'ja's Dxus librute na'jĩ'k: Piisxáa-thegsa's ikhte', piisxá' jxuka ũphuutxna jĩ'k. ³² Nawa adxa' uuçxawa ki' itxi yuuçxa' i'kwe'sx yaçte u'jwe'nja Galilean jĩte', ³³ Pedro' na'wẽk pas:

—Makwe vxite yu' idxçxáana nvxihtçxa txu-teetewa, adx yu' txã'wẽ yũume'nja jĩte', ³⁴ Jesus pasçxa':

—Isath we'we', naa kuste atalx we'wemeyna idxa' Jesusa's jiimeeth jĩna tekx us ĩsxiijane'ga jĩte', ³⁵ Pedro' na'wẽk we'we:

—Makwe idx yakh ja'datey uuwa'jma'k kaseh, nawa idxa's jiimeeth jĩna yu' ĩsxiime'nja.

Aça' txãa yakh u'jusawe'sx jxukaysa txã'wẽçxaçxáatx we'we.

*Jesusa' Geçemanite Dxus yakh puutx we'weni
(Mr 14.32-42; Lk 22.39-46)*

³⁶ Txajũ' Jesusa' txãa yakh u'jusawe'sx yakh Geçemaní yaasesate pa'jçxa', na'wẽk we'we:

—Ayte mkaaçxwe, naapkaçxha' adxa' Tata yakh puutx we'weya' u'jweçthu jĩçxa', ³⁷ Pedro vxite' Zebedeo nçxi'k e'zsatx pe'jçxak u'j. Sa' ũuste wala nxus ũusuthete', na'jĩk:

³⁸ —Txakwe wala pxthaa yuuçxa uuwa'ja's yajkxte', wala nxus yuja'. Aça' i'kwe'sxa' ay-tee neeyũuçxa dehmée jxpa'yakx me'pwe adx na'wẽy jĩçxa', ³⁹ Jesusa' jxu'jmée u'jçxaçxáa txkaa pkipha weteçxa Dxus yakh puutx we'wek na'jĩna:

—Tata, idxa's ewuweçxte', adxa's meen nwe'we txakwe wala pxthaa yuuwa'ja's

jxpa'gakahmen. Nawa adx jxthãasni yu'sa' kxtey yuumeexawa, iidx jxthãasniçxá's kxtey meen yũu.

⁴⁰ Txajũ' Jesusa' ki' sxawedku Pedrowe'sx tasxtey, sa' dehna ũste uyçxa' na'wêk we'we Pedro's:

—Adx yakh jxpa'yakx dehmée ũsya' ãjameewá'kwe teeçx oraçxáawa. ⁴¹ Ewmeete weteya'mée jxpa'yakx dehmée me'pwe Dxus yakh puutx we'wena. I'kwe'sxa' ũusuh yu' çxhãçxhai'kwe yaaki', nawa i'kwe'sx kakwe yu' çxhãçxhaçme' kxtey yuuya'.

⁴² Txajũ' Jesusa' ki'kin u'jçxa', na'jĩnak Dxus yakh puutx we'we:

—Tata, txakwe wala pxthaa yuuwa'ja's yu'pthejxa' ewuweçxmeete', iidx jxthãasni kxtey yuuwaççxáa ewna jĩçxa', ⁴³ Pedrowe'sx tasxte ki' sxawedçxa', txãawe'sx yafx çxhãçxhameete ki' dehna ũstek uy. ⁴⁴ Sa' nyafxii na'wêyçxáa we'weçxa tekx uswa ki' u'kh, Dxus yakh puutx we'weya'. ⁴⁵ Txã'wẽ yũuçxak Pedrowe'sx tasxna sxawedna kũhçxa', na'wẽ we'we:

—Ãçxh yuuçxá' mdejxujiiwe jxkaaseya'. Dxus Nçxi'k Nasa Yuusa's pkalsawe'sx kusete dukhwa'j en ãjk. ⁴⁶ Aça' kiiteçxa u'jwega. Adxa's açesawe'sx kusete dukhwa'jsa' yujxã'ja' jik.

Jesusa's preesu'jni

(Mr 14.43-50; Lk 22.47-53; Jn 18.2-11)

⁴⁷ Jesus kxtee we'wena nee ũsiyna, Judasa' pa'kh. Txã' docesatewe'sxíçxáak yu'. Aça' txãa yakh nasa wala kuh pa'jtx kçxilx vxite' fxtũ atçxa. Txãawe'sxa' sacerdote npiiçthẽ'jwe'sx

vxite' judiu nthē'jsawe'sx jxkaahnisatx yu'.
⁴⁸ Judasa' na'jīnaga yu'kxwe'weçxa pe'jna yuwé'
 Jesusa's tudkahn:

—Ma'sna dxi'pte adx weçxa'nja txã'sna tudçxa
 jxūna u'jwene'kwe jīnaga we'we.

⁴⁹ Txãasak Jesus tasxte utxaaçxa na'wē we'we:

—Kwe'sxtxi jxpe'jsa jīna'wa weçxak.

⁵⁰ Aça' Jesusa' na'jīk:

—Namiku, ¿kījxa' yuhga? jīçpkaçxha', tudtxi
 jxūna u'jya'.

⁵¹ Txã'wē tuduçpkaçxha', Jesus yakh pi'kxna
 u'jusa teeçxsa' kçxilxa's jxkuutxi'jçxa sacerdote
 npiičthē'ja's selpisáa thū'wē's spē'thku. ⁵² Aça'
 Jesusa' we'wek:

—Iidx kçxilxa's mjxaaw. Txã'wēme',
 jxukay maawa kçxilxuh puiisa', kçxilxteyçxáa
 uuwa'jsata'. ⁵³ Adx Tata's maazkuēe
 angeleswe'sxwa adxna nwe'wewa'jsa pējxte',
 kxtey yuuna sūju'çmeewá'ga. ⁵⁴ Txã'wē pējxte',
 kxtey yuuyujuna, nawa Dxus libroute' nyafxiitey
 pta'sxni yā'kh yu' āçxh na'wē tuduçta' txã' kxtey
 yuukahn, aça' nwe'wewa'jsa pējxme'nja.

⁵⁵ Txã'jīçxa' tudsatxku we'we:

—Adxa' pesweethas i'kwe adxa's tudxa' kçxilx
 petx fxtū atçxa pa'j. Adxa' kaapiya'jya' een
 isath dxuus yatte i'kwe'sx ksxavxyte nes yu'.
 Nawa txagaçxhīi yu' tudmeei'kwe. ⁵⁶ Nawa
 Dxus yuwe pta'sxsawe'sx fxi'jçxa nvxiitni kxtey
 yuukahnçxáa txã'wē yuuça' jīk. Naapkaçxha'
 Jesus yakh u'jusawe'sxa' txã'sçxáana nvxihtçxa
 jxuka ũphna u'jtx.

Kaifxas tasxte Jesusa's kuutxa'jni
(Mr 14.53-65; Lk 22.54-55, 63-71; Jn 18.12-14, 19-24)

⁵⁷ Aça' Jesusa's tudçxa jxūna u'jtx sacerdote npiiçthê'j Kaifxas tasxte. Kxteea' ley kaapiya'jsa vxite' judiu nthê'jsawe'sx txāawe'sxtxi pkhaakheçxa ūs yu'. ⁵⁸ Aça' Pedro' e'ste jxu'j neeyūuçxak yuhna ūsu', sacerdote npiiçthê'j yat patxute u'kapkaçx, sa' kxtee policiawe'sx yakh kaçxçxa neeyūuk kīh yūutewa uyya'.

⁵⁹ Naapkaçxha' sacerdotewe'sx, judiu nthê'jsawe'sx vxite' jxukay kxtee pkhaakheçxa ūssawe'sxa' Jesusa's kiikhe'jya' sūhçxa kīhçxáawa ĩsxiiwa'jsa pakwe'tx. ⁶⁰ Makwe nasa maazkuēesa kīhçxáawa pta'sxna kūhtewa, ĩsxiiniçxáak kaseje'. Nawa nmehte' e'z nasa ĩsxiisa kūhçxa na'wētx pta'sx:

⁶¹ —Naa piçthê'ja' na'jī'k: Adxa' naa dxuus yata's pētxçxa tekx ente' ki' txaja'nja jī'k jīna pta'sxte', ⁶² sacerdote npiiçthê'ja' kiiteçxa Jesusa's na'wēk we'we:

—¿Kīh yūuçxaga ma'wēçxáawa pasu'çmée? Meeçxa' ¿isa yuh txā'jīwá'nta? jītewa, ⁶³ Jesusa' pasme'. Aça' sacerdote npiiçthê'ja' na'wēk we'we:

—Dxus ĩtxisa dxi'pte jurāyçxa isasaçxá's mpeeta'sx. Idxa' ¿Kristo Dxus Nçxi'k dxihgá'? jīte', ⁶⁴ Jesus pasçxa':

—Idxa' isag we'we'. Adxa' i'kwe'sxtxi na'jī'th na': Dxus Nçxi'k Nasa Yuusa's uyuune'kwe Dxus pukate kaçxçxa u'pte sa' cieluju tāaph pxāhte kījaçtewa uyuune'kwe jīte', ⁶⁵ sacerdote

npiiçthê'ja' ũusaçxaçxa peekx athni ropa's sudek na'jîna:

—Naa piçthê'ja' txajx yuweju yuu açewe'wek Dxusa's, açà' ¿kîjxa'çxáa testigo jwee peji-ikxtha'w? Txajx açewe'weni's i'kwe'sxîiwa wêse'ji'kwe. ⁶⁶ Sa' âçxha' ¿maa sũju'kwe? jîte', txâawe'sxa' na'wêtx pas:

—Txâ' yuuwesa', txâa pa'ga ikhwa'j yuuna jîtx.

⁶⁷ Txajũ' Jesus dxi'pte fxne'sx avxythethçxa uyiitx, açà' vxite' dxi'ptetx uka'ka na'jîna:

⁶⁸ —Idxa' Kristo dxihçxa', mjiyu kimga dxi'pte ujka.

Jesusa's jiimeeth jîna Pedro we'weni

(Mr 14.66-72; Lk 22.56-62; Jn 18.15-18, 25-27)

⁶⁹ Txâ'wê yuuçpkaçxha', Pedro' ekaju patxutek kaçxçxa u'pu'. Açà' teeçx kna'sa selpisáa utxaana kũhçxa na'wêk we'we:

—Ídxwa Jesus Galileajuwe'sx yakh u'jusag jîte', ⁷⁰ Pedro' jxukaysa dxi'pte:

—I'kwe we'weni's jiimeeth jînak îsxii.

⁷¹ Txajũ' Pedro' vxitxte kasehna u'jweçpkaçxha', vxite kna'sa selpisaawa uyçxa' kxtee ũssatx na'wêk pta'sx:

—Naa piçthê'jwa Nasarettewe'sx Jesus yakh u'jute uythu jîte', ⁷² Pedro' ki' îsxiik jurâyna:

—Txâa piçthê'ja's adxa' jiimeeth jîk.

⁷³ Txaçxmeynaçxáa kxtee ũssawe'sx Pedro tasxte utxaaçxa na'wêtx we'we:

—Isa, îsxiimée idxwa txâawe'sx yakh u'jusag. Txâ'wêçxaíi iidx we'weni' peedame' jîte', ⁷⁴ ki' jurâyçxa na'wêk we'we:

—Txâa piçthê'ja's jiimeeth, isa Dxus uyte.

Txã'jĩna ũspkaçxa', atalx we'wek. ⁷⁵ Aça' Pedro' yajkxku Jesus na'jĩna we'weni's: Atalx we'wemeyna, idxa' tekh us ĩsxijane'ga jiimeeth jĩni's. Txã's yajkxçxa', Pedro' eka kasehçxa seena' wala nxusna ũ'nek.

27

Jesusa's Pilato kusete dukhni

(Mr 15.1; Lk 23.1-2; Jn 18.28-32)

¹ Txajũ' khikhyna sējeçte', sacerdote npiiçthē'jwe'sx vxite' judiu nthē'jsawe'sx txãawe'sxa' puutx we'wetx Jesusa's kiikhe'jya'.
² Sa' tudçxa jxũna u'jtx ne'jwe'sx Poncio Pilato tasxte kuutxa'jya'.

Judas uuní

³ Jesusna kuuwe'jsa Judasa' Jesusa's ikhwa'j vxitni's jiyuçxa', iiméh wala nxusku. Txã'wē yũumeewaça' ewne' yu' sũhçxa treinta vxyutxi' kaasxwedu'jya' u'kh sacerdotewe'sx vxite' judiu nthē'jsawe'sx tasxna na'jĩna:

⁴ —Adxa' āhmeeth yũu, txã'wē piçthē'j kīhtewa yuuwemeesa's ikhkahn kuuwe'pha'ga jīte', txãawe'sxa' na'wētx pas:

—Kwe'sxa' çjiitka'wá'? Txã'wē yũusa idx jiine'ga jīçxa jxpa'gameete', ⁵ Judasa' txãa vxyu's dxuus yatte wāatahna'wa u'jçxa ya'jythujkku.

⁶ Txã'wē yũute', sacerdotewe'sxa' txãa vxyu's pkhakhçxa na'wētx puutx we'we:

—Naa vxyu's ofxreda kajate akhya' ājame'nja'w. Txã'wēme', nasa's kiikhe'jni vxyua' naa pa'ga jīçxa', ⁷ txãa vxyuju mitxh umsáa kiwe'stxi wey, nasa ekajuwe'sx pa'jçxa

uusaatx pedaawa'j. ⁸ Txãa pa'ga açxpkaçx txãa kiwe' ee pkawnisa kiwe' jĩ'tx. ⁹ Aça' Dxus yuwe pta'sxa Jeremias we'weni kxtey yuuk. Txã' na'wêk we'we: Israelwe'sx makwetene'ta txweyya' puutx we'we txãa treinta vxyu's jxpa'gaçxatx ¹⁰ mitxh umsáa kiwe's wey, Dxusa' adxa's jxkaakh kiwe weykahn txã'sa' kxtey yuutx jĩnak fxi'j.

Jesusa's Pilato pēyni

(Mr 15.2-5; Lk 23.3-5; Jn 18.33-38)

¹¹ Jesusa' ne'jwe'sx tasxte jxũna u'jnik yuu, aça' txã' na'jĩnak pējx:

—Idx wáa txã'wē judiuwe'sxtxi jxkaahsane'ga jĩte', Jesus pasçxa':

—Idxa' isag we'we'. Adxa' txã'wēsaiith jĩk.

¹² Txajũ' sacerdotewe'sx vxite' judiu nthē'jsa txãawe'sxa' Jesusa's ewmeesag jĩna we'wete', Jesusa' pasu'çme'. ¹³ Aça' Pilato' na'wêk we'we:

—Idxa's na'wētx kĩhtewa jxuka ewmeesa' jĩna yuwe ũsu' aça' wēse'jeçmeewá'ga jĩtewa,

¹⁴ Jesusa' kĩhwa pasme'.

Jesusa's ikhwa'j vxitni

(Mr 15.6-20; Lk 23.13-25; Jn 18.38-19.16)

Txã'wē pasmeete', ne'jwe'sxa' ma'wē yũuya'çxáa yuhwa ãjameeçxa', na'wē yũuya'k yajkx. ¹⁵ Fxiesta ensu' ne'jwe'sxa' teeçx preesu txhweete'k ma'sna nasa pēyitxna txã'sna. ¹⁶ Aça' txãa fxiesta ensu' teeçx preesu jxtuhthesa ũsu'k Barabas yaasesa. ¹⁷ Kxajk Pilato' na'jĩna pējx txãawe'sx pkhaakheçxa ũssatx:

—I'kwe'sxa' ¿kimnakwe txhweete jxthãasu'? ¿Barabasna', meeçxa' Kristo jĩ'i'kwe txã'sna wáa kaatxhweete'je'nja?

18 Txã'wẽ Jesusa's ahçeçxa txajx tasxte dukhtewa jiyuçxak txã'jĩ.

19 Pilato' jxkaahna u'pnite u'pte', txajx nyua' na'jĩnaga yuwe kaah: Txãa piçthẽ'j yuuwemeesa yakha' kuçx yuumeena. Txã'wẽme', açxh kus iiméh seena' ũukhũukh ksxa'wthu txãa piçthẽ'j ma'wẽ yũuwa'jsatewa.

20 Txã'jĩna pta'sxtewa, sacerdotewe'sx vx-ite' judiu nthẽ'jsa txãawe'sxa' nasatx knaytxi yu'kxwe'weçxa, txã'wẽ Barabasa's txhweeteçxa Jesusa's kiikhe'jwa'ja's pẽykahn. 21 Txã'wẽtewa, ne'jwe'sxa' ki' pẽjxku na'jĩna:

—Naa e'zsatxi' i'kwe'sxa' ¿ma'snakwe kaatxhweete'j jxthãasu'? jĩte', txãawe'sxa' na'wẽtx pas:

—Barabasna metxhwete jĩte', 22 Pilato we'weçxa':

—Barabasa's txhweeteçxa', naa Jesusa's Kristo jĩ'i'kwe txã'sa' ¿kĩh yũutka? jĩte', jxukaysa pasçxa':

—Kluuste mkaafxuçu'j jĩ'tx.

23 Aça' Pilato' na'wẽk pẽjx:

—¿Kĩnga ewmée yũu? jĩte', txãawe'sxa' ki' sus we'weçxa':

—Kluuste mkaafxuçu'j jĩ'tx.

24 Txajũ' Pilato' kĩhwa yũuya' ãjanimeeteçxáa nasa' jweeíçxáa seena' wala suste', yu' jxũukaahçxa nasaa dxi'pte txajx kusetx kweeçxak na'jĩna:

—Naa piçthē'j kīhtewa yuuwemeesa's ikhni's adxa' yuuwemeesath. Txā'sa' i'kwe'sx pa-sune'kwe jīte', ²⁵ nasa jxukaysa we'weçxa':

—Txā'sa' kwe'sx luuçx yā'jçxa jxuka paswa'jsatha'w jī'tx. ²⁶ Txajū' Pilato' kaatxhweete'kh Barabasa's, nawa Jesusa's kaapeçxukwe'jçxa kluuste fxuçkahn dukhku.

²⁷ Txā'wē yūute', soldauwe'sxa' ne'jwe'sx u'pnite ka'ga'jçxa, soldauwe'sx jxukaysatx pa'yaçxa Jesusa's jxuka kxtadçxatx yuju.

²⁸ Txajū' ksūupi'jçxa atxh behsatx kaathe'j.

²⁹ Sa' çhūçha's korona na'wē vxitçxa dxikthete ki'ptxi. Paçu kuseju yu', fxtūu zuzkuēt看 kaatu'j. Txā'wē yūuçxatx txajx tasxte peejxūkwe:

—Judiuwe'sxtxi jxkaahsath jī'ne'ga jīna weeçxna. ³⁰ Sa' fxne'sx avxythethna fxtū's kusa'jçxa, dxikthegatx pekwe'kwe. ³¹ Txā'wē Jesusa's weeçxna jxā'jçxa', txāa atxh behsa's ksūupi'jçxa Jesus ropa's ki' kaathe'jtx. Txā'wē yūuçxatx kluuskhē fxuçya' jxūna u'j.

Jesusa's kluuste fxuçni

(Mr 15.21-32; Lk 23.26-43; Jn 19.17-27)

³² Txajū kasehna u'jweççxa', teeçx piçthē'j Cirenejūwe'sx Simon yaasesa yakhtxi pu'jykhēw. Sa' Jesus yakhni kluusa's txā'snatx kxaakhe'j.

³³ Txā'wē yūuçxatx pa'j teeçx ahte Golgota yaasesate. Txāa yu' Uusá Dxikthé Dxi'thçxáasa jīni'. ³⁴ Kxteea' vxinote yaasa's awçxatx Jesusa's yus wēe. Nawa txā'sa' yuwete isaçxaçxáa tudxme'.

³⁵ Kluuskhē a'kxçxa', soldauwe'sxa' swerte kaatx Jesus athni ropa's maa soldau knaytewa

jiiyuya'. Dxus yuwe pta'sxsa' na'jīnak we'we txā' kxtey yuuk: Swerte kaahçxa adx ropa's txudeedetx txāawe'sx pwe'sx jīnak we'we. ³⁶ Txā'wē yūuçxatx kxtee thegna kaçx. ³⁷ Sa' txajx dxikthē kakwey fxi'jçxa ki'ptxi kīh yūusate ikhçxawa na'jīna pta'sxna: Naaī Jesus Judi-uwe'sxtxi Jxkaahsa' jīnak fxi'jni yu'.

³⁸ Sa' Jesus pukakhē pdxi'ptxi e'z pesweetx ki'pni yuu kluuskhē. ³⁹ Aça' kluus tasxuy uykhēwsa' na'jīnatx wēesxu' dxiktheetx kaawūhna:

⁴⁰ —Dxuus yata's pētxçxa tekh ente' ki' kiis-sathē'j, idxa' ya'menwe'we. Dxus Nçxi'k dx-ihçxa', kluusuh msa'j jī'tx.

⁴¹ Txā'wēy sacerdotewe'sx, ley kaapiya'jsawe'sx, fxariseowe'sx, vxite' judiu nthē'jsawe'sx txāawe'sx pwe'sx na'jīnatx weeçx we'we':

⁴² —Vxite yuutxi' nwe'wek, nawa peekii yu' ya'nwe'weya' āja'çme'. Israelwe'sxtxi Jxkaahsa dxihçxa', kluusuh sa'jana aç yuuçxáa ĩsxiija'çmeega sūju'nja'w. ⁴³ Dxus Nçxi'kthu jī'k na' Dxusnane' neewe'we', aç'a' txā'sa' āçxhii Dxusa' nwe'wena, nwe'weya' ājaçxa yu' jī'tx.

⁴⁴ Aça' kluuskhē fxuçni ki'pnisa peswée yuhwa wēesxu pu'çxhi'tx.

Jesus uunú

(Mr 15.33-41; Lk 23.44-49; Jn 19.28-30)

⁴⁵ Txajū' ēepxāh walajūjx çxhi'dxçxa kusuçte las trestepkaçxku çxhi'dx naa kiwete jxuka.

⁴⁶ Aça' las tres ājaçpkaçxha', Jesusa' na'jīnak sus we'we:

—Eli, Eli, ¿lama sabaktani?—txã' na'jĩni': Adx Dzusgu sa' ¿mjĩi pa'gaga adxa's thegmée nvxiht? jĩni'.

⁴⁷ Aça' kxtee ũssa' txã'jĩni's wěse'jçxa', na'wětx we'we:

—Dzus yuwe pta'sxsa Eliasa's pa'yaça' jĩ'tx.

⁴⁸ Naapkaçxha' teeçxsa' wuwuuna u'jçxa esponja's vxino puste akhçxa fxtũu vxichte ki'pçxa yuwete utxak çxazxakahn. ⁴⁹ Nawa vxite yu' na'jĩ'tx:

—Kuçx yuunu. Aan Elias pa'jana nwe'weya' jĩ'tx.

⁵⁰ Txajũ' Jesusa' ki' seena' sus we'weçxa' uuk.

⁵¹ Naapkaçxha' dxuus yatte txudenisa liensu pesath a'kxnisa' puupxãjkhě sutek kute ěju kiwete kĩh. Naapkaçxha' ehdwa çxhãçxha u'the', penxa yuhwa upetx, ⁵² aça' uusaawe'sx pedaní kafxwa phaate', Dzusna jxpa'gaçxa uusaawe'sxa' ki' ĩtxi yuutx. ⁵³ Aça' Jesus uuçxawa ki' ĩtxi yuunijũ' txãawe'sxa' pedaní kafxu kasehçxa Jerusamente u'kate', maazkuĕesawa uytxi.

⁵⁴ Txajũ' kxtee Jesusna jxpa'yakx thegna ũssawe'sx vxite' soldau kpiitan txãawe'sxa' wala ũukhtxi ehd u'jna vxite' kĩhwa seena' yũuni's uyçxa. Sa' na'wětx we'we:

—Isa, naa piçthě'ja' Dzus Nçxi'k yuh yu'ga jĩ'tx.

⁵⁵ Kxteea' kuh u'ytxi ũsu' jxu'ju thegna, txãawe'sxa' Jesusna selpiina u'jusatx yu' Galileajũjx yuusa. ⁵⁶ Txãawe'sx ksxavxyte' Maria Magdalena, vxite Maria Jakobo Jose nĩ'j, vxite' Zebedeo nyu txãawe'sxtxi yu'.

*Jesusa's pedaní**(Mr 15.42-47; Lk 23.50-56; Jn 19.38-42)*

⁵⁷ Kusna kījaçte', teeçx piçthē'j wala ji'phsa Jose yaasesa Arimatea çxhabuwe'sxku pa'j. Txāawa Jesus yakh u'jusak yu'. ⁵⁸ Txāa piçthē'ja' Pilato tasxte u'jçxa', Jesus kakwe's pējxku, aça' Pilato' yuwe kaakh tee dukh jīna. ⁵⁹ Txajū' Josea' Jesus kakwe's spajkxçxa liensu fxinusatek yap. ⁶⁰ Sa' kwet penxate u'se kafxi'jçxa ji'phu'k peekx kakwe's pedaawa'j txkaa khikhçxa', u'kani kafxte yu' kwet walasaju aphçxak u'j. ⁶¹ Kxtee txā'wē yūuçte', pedaní kafx dxi'puh utxatx thegna u'pu' Maria Magdalena vxite Mariawa.

Jesusa's pedaní kafxte thegsa

⁶² Jxkaasena fxi'zeya' jxuka pheu'jna jxā'jniijū kuskuskhē' sacerdote npiçthē'jwe'sx vxite' fxariseo txāawe'sxa' Pilato tasxte u'jçxa na'wētx we'we:

⁶³ —¿Wēse'gá', ne'jwe'sx? Txāa iisxihthē'ja' nee itxi u'juçxa', uuçxawa tekh ente' ki' itxi yu'nja jīni'stha'w yajkx. ⁶⁴ Txāa pa'ga mkaah pedaní kafxte wala ew aphkahn tekh entepkaçx. Txā'wē yūumeete', txāa yakh u'jusawe'sxa' kus pa'jçxa kakwe's pesweetxna, sa' e'suyā'ja' na'jīna we'wetxna nasatx: Uuçxawa ki' itxi yuuga jītxna. Aça' txā'wē yūuçxa iisxiini' nyafxii iisxiinite thaakwesa yuuna jīte', ⁶⁵ Pilato' na'wēk we'we:

—Soldauwe'sx kxtee ūsta' txāatx pe'jçxa me'jwe, sa' pedaní kafxte wala ew maphwe. I'kwe'sxtxi ma'wē wejx ew thegte', txā'wē myūuwe.

⁶⁶ Txã'jĩte', u'jçxa pedaní kafxte wala ew aphçxa txãa aphni kajkwete selxo ki'ptxi, sa' jxpa'yakx thegna ũswa'jsa soldauwe'sx txahxt.

28

Jesus ki' ĩtxi yuuni

(Mr 16.1-8; Lk 24.1-12; Jn 20.1-10)

¹ Jxkaase en skhēwniijũ kuskuskhē mjĩwa'j en āanite wala kusĩitey Maria Magdalena vx-ite Maria yakh txãawe'sxa' u'jtx pedaní kafxte thegya'. ² Naapkaçxha' ehd seena' çxhãçxha u'kh, txã'wē Dxus angel cieluju kĩhçxa pedaní kafxte aphni kweta's kiispa'ga. Sa' txãa yu' txãa kwet kajkwete kaçxçxa ³ kpi'sx kweneni na'wēk khikhyna u'p yu', aça' txajx athni ropa' seena' zhiçxkwe çxihme yu'tx. ⁴ Aça' soldauwe'sxa' txã'wēsa's uyçxa', ũukhnite jxuka yayaçxa uuní na'wētx wete. ⁵ Aça' txãa u'ywe'sxtxi' Dxus angela' na'wēk we'we:

—Ũukhnuwe, adxa' jiith, Jesusna kluuste fxuçtxi txã'sna i'kwe'sxa' thegya' yuji'kwe. ⁶ Nawa ayte' meeyã'ja'. Uunijũ ki' ĩtxi yuuçxa u'kh ma'wēga pta'sx txã' kxtey yuuk. Mkaane'ta khikh txkaa myuhwe thegya'. ⁷ Sa' wala dud me'jwe, txãa yakh u'jusawe'sxtxi na'wē pta'sxya': Uuçxawa ki' ĩtxi yuuçxa Galilea kiwen u'jweça' i'kwe'sx yaçte. Kxtee puutx uyuune'kwe jĩna pta'sxine'kwe. Txã'wē pta'sxwa'th ji'phu i'kwe'sxtxi jĩk Dxus angela'.

⁸ Txajũ' u'ywe'sxa' wala dud wuwuuna u'jtx Jesus yakh u'jusawe'sxtxi pta'sxya' ũukhnawa ũuste wēt wēt yajkxna. ⁹ Naapkaçxha' Jesusa'

txãawe'sx u'jweçte dxi'the vxyaaçxa weçxana kũjk. Aça' txãawe'sxa' Jesus tasxte pee-jxũkweçxa txajx çxidatx psxa'dçxa weçxatx. ¹⁰ Aça' Jesusa' na'jĩk:

—Ûukhmée mejwe, sa' adx yakhthẽ'jwe'sxtxi pta'sxine'kwe Galilea kiwen u'jçxa kxtee adxa's puutx uyuune'kwe jĩnak pta'sxkaah.

Jesus itxi yuuni's soldauwe'sx pta'sxni

¹¹ U'ywe'sx txã'wẽ u'jweçpkaçxha', pedaniite thegna ùssa soldauwe'sx maaíi yu' u'jtx Jerusalente sacerdotewe'sxtxi pta'sxya' kĩh yũuni'swa jxuka. ¹² Txajũ' sacerdotewe'sxa' judiu nthẽ'jsawe'sx tasxte u'jçxa puutx we'wetx. Txã'wẽ yũuçxa soldauwe'sxtxi' wala vxyu dukhtxi. ¹³ Sa' na'wẽtx we'wekaah: Kuspãh kwe'sx deenite Jesus yakh u'jusawe'sx pa'jçxa uuníi kakwe's pesweeta jĩne'kwe i'kwe'sxa'. ¹⁴ Aça' txã'wẽ yuh dehne'ta sũhçxa ne'jwe'sxa' i'kwe'sxtxi ewmeete nvxiit wẽjewáana, nawa kwe'sx u'jçxa txãa yakh puutx we'we'nja'w i'kwe'sx ju'gu txã'wẽ yũukahmén.

¹⁵ Txã'wẽ kwe'we'the', soldauwe'sxa' vxyu's jxpa'gaçxa kxtey yuutx. Aça' txãasatx judi-uwe'sxa' açxpkaçx txã'wẽçxáa pta'sxi'.

Jesusa' txãa yakh u'jusawe'sxtxi neewe'weçxa nvxiitni

(Mr 16.14-18; Lk 24.36-49; Jn 20.19-23)

¹⁶ Txã'wẽ yũuyã'the', Jesus yakh u'jusa oncesawe'sxa' Galilean u'jtx, thã'j vxiçte mteene' Jesus pta'sx kxtee. ¹⁷ Sa' Jesusa's uyçxa', pee-jxũkweçxa weçxatx, nawa vxiteíi yu' txãamée

wáana sũhna kuhtx yaaki'. ¹⁸ Txajũ' Jesusa' txãawe'sx tasxte utxaaçxa na'wẽk we'we:

—Cielute vxite' naa kiwetewa adxnaçxaçxáak neewe'weni yuu jxkaahwa'ja's. ¹⁹ Txãasath i'kwe'sxtxi jxkaaja': Me'jwe Dxus yuwe's pta'sxya' maa kiwetewa nasa jxukaysatx. Txã'wẽ yũuçxa' yu'te bautisaĩne'kwe, Dxus vxite' Dxus Nçxi'k vxite' Dxus Espiritu txãawe'sxtxi neewe'weçxa. ²⁰ Sa' Dxusa's nwẽese'jwa'ja's kaapiya'jane'kwe kĩhtewa jxuka, adx ma'wẽtka i'kwe'sxtxi jxkaah txã'wẽy. Mjiyuwe, ãçxhũyã'ja' een isa bagaçxtewa i'kwe'sx yakh nes yuuya'wath naa kiwe pçuupkaçx jĩk.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd